

| अथ नवमं मण्डलम् |

(10)

1

(म.9, अनु.1)

ऋषिः मधुच्छन्दाः वैश्वामित्रः	छन्दः गायत्री	देवता पवमानः सोमः
-------------------------------	---------------	-------------------

स्वादिष्ठया मदिष्ठया पवस्व सोम धारया	। इन्द्राय पातवे सुतः	॥ 1 ॥
रक्षोहा विश्वचर्षणिरभि योनिमयोहतम्	। द्रुणां सृधस्थमासदत्	॥ 2 ॥
वरिवोधातमो भव् मंहिष्ठो वृत्रहन्तमः	। पर्षि राधो मघोनाम्	॥ 3 ॥
अभ्यर्ष महानां देवानां वीतिमन्धसा	। अभि वाजमुत श्रवः	॥ 4 ॥
त्वामच्छां चरामसि तदिदर्थं दिवेदिवे	। इन्दो त्वे न आशसः	॥ 5 ॥
पुनाति ते परिस्रुतं सोमं सूर्यस्य दुहिता	। वारैण् शश्वता तना	॥ 6 ॥
तमीमण्वीः समर्य आ गृभ्णन्ति योषणो दश	। स्वसारः पार्ये दिवि	॥ 7 ॥
तमीं हिन्वन्त्यगुवो धमन्ति बाकुरं दृतिम्	। त्रिधातु वारुणं मधु	॥ 8 ॥
अभीर्म्ममघ्या उत श्रीणन्ति धेनवः शिशुम्	। सोममिन्द्राय पातवे	॥ 9 ॥
अस्येदिन्द्रो मदेष्वा विश्वा वृत्राणि जिघ्रते	। शूरो मघा च मंहते	॥ 10 ॥

(10)

2

(म.9, अनु.1)

ऋषिः मेधातिथिः काण्वः	छन्दः गायत्री	देवता पवमानः सोमः
-----------------------	---------------	-------------------

पवस्व देववीरति पवित्रं सोमं रंहा	। इन्द्रमिन्द्रो वृषा विश	॥ 1 ॥
आ वच्यस्व महि प्सरो वृषेन्दो द्युम्रवत्तमः	। आ योनिं धर्णसिः संदः	॥ 2 ॥
अधुक्षत प्रियं मधु धारा सुतस्य वेधसः	। अपो वसिष्ट सुक्रतुः	॥ 3 ॥
महान्तं त्वा महीरन्वापो अर्षन्ति सिन्धवः	। यद्गोभिर्वासयिष्यसे	॥ 4 ॥
समुद्रो अप्सु मामृजे विष्टम्भो धरुणो दिवः	। सोमः पवित्रे अस्मयुः	॥ 5 ॥
अचिक्रददृषा हरिर्महान्मित्रो न दर्शतः	। सं सूर्येण रोचते	॥ 6 ॥
गिरस्त इन्दु ओजसा मर्मृज्यन्ते अपस्युवः	। याभिर्मदाय शुम्भसे	॥ 7 ॥
तं त्वा मदाय घृष्वय उ लोककृत्वमीमहे	। तव प्रशस्तयो महीः	॥ 8 ॥
अस्मभ्यमिन्द्रविन्द्रयुर्मध्वः पवस्व धारया	। पर्जन्यो वृष्टिमाँइव	॥ 9 ॥
गोषा इन्दो नृषा अस्यश्वसा वाजसा उत	। आत्मा यज्ञस्य पूर्व्यः	॥ 10 ॥

(10)

3

(म.9, अनु.1)

ऋषिः शुनःशेषः आजीगर्तिः	छन्दः गायत्री	देवता पवमानः सोमः
-------------------------	---------------	-------------------

एष देवो अमर्त्यः पर्णवीरिव दीयति	। अभि द्रोणान्यासदम्	॥ 1 ॥
एष देवो विपा कृतोऽति ह्वरांसि धावति	। पवमानो अदाभ्यः	॥ 2 ॥
एष देवो विपन्युभिः पवमान ऋतायुभिः	। हरिर्वाजाय मृज्यते	॥ 3 ॥

एष विश्वानि वार्या शूरो यत्रिवृ सत्त्वभिः	पर्वमानः सिषासति	॥ 4 ॥
एष देवो रथर्यति पर्वमानो दशस्यति	आविष्कृणोति वग्वनुम्	॥ 5 ॥
एष विप्रैरभिष्टुतोऽपो देवो वि गाहते	दधद्रत्नानि दाशुषे	॥ 6 ॥
एष दिवं वि धावति तिरो रजांसि धारया	पर्वमानः कर्निक्रदत्	॥ 7 ॥
एष दिवं व्यासरत्तिरो रजांस्यस्पृतः	पर्वमानः स्वध्वरः	॥ 8 ॥
एष प्रत्नेन जन्मना देवो देवेभ्यः सुतः	हरिः पवित्रे अर्षति	॥ 9 ॥
एष उ स्य पुरुव्रतो जज्ञानो जनयन्निषः	धारया पवते सुतः	॥ 10 ॥

(10)

4

(म.9, अनु.1)

ऋषिः हिरण्यस्तूपः आङ्गिरसः	छन्दः गायत्री	देवता पर्वमानः सोमः
----------------------------	---------------	---------------------

सना च सोम जेषि च पर्वमान महि श्रवः	अथा नो वस्यसस्कृधि	॥ 1 ॥
सना ज्योतिः सना स्वर्विश्वा च सोम सौभगा	अथा नो वस्यसस्कृधि	॥ 2 ॥
सना दक्षमुत क्रतुमपं सोम मृधो जहि	अथा नो वस्यसस्कृधि	॥ 3 ॥
पवीतारः पुनीतन सोममिन्द्राय पातवे	अथा नो वस्यसस्कृधि	॥ 4 ॥
त्वं सूर्यो न आ भज तव क्रत्वा तवोतिभिः	अथा नो वस्यसस्कृधि	॥ 5 ॥
तव क्रत्वा तवोतिभिर्ज्योक्पश्येम सूर्यम्	अथा नो वस्यसस्कृधि	॥ 6 ॥
अभ्यर्ष स्वायुध सोम द्विबर्हसं रयिम्	अथा नो वस्यसस्कृधि	॥ 7 ॥
अभ्यर्षानपच्युतो रयिं समत्सु सासहिः	अथा नो वस्यसस्कृधि	॥ 8 ॥
त्वां यज्ञैरवीवृध्न्पर्वमान विधर्मणि	अथा नो वस्यसस्कृधि	॥ 9 ॥
रयिं नश्चित्रमश्विनमिन्दो विश्वायुमा भर	अथा नो वस्यसस्कृधि	॥ 10 ॥

(11)

5

(म.9, अनु.1)

ऋषिः काश्यपः असितः देवलः वा छन्दः गायत्री 1-7, अनुष्टुप् 8-11 देवता इधमः समिद्धः अग्निः वा 1, तनूनपात् 2, इळः 3, बर्हिः 4, देवीद्वारः 5, उषासानक्ता 6, दैव्यौ होतारौ प्रचेतसौ 7, तिस्रः देव्यः सरस्वतीळाभारत्यः 8, त्वष्टा 9, वनस्पतिः 10, स्वाहाकृतयः 11

समिद्धो विश्वतस्पतिः पर्वमानो वि रजति	प्रीणन्वृषा कर्निक्रदत्	॥ 1 ॥
तनूनपात्पर्वमानः शृङ्गे शिशानो अर्षति	अन्तरिक्षेण ररजत्	॥ 2 ॥
ईळैन्यः पर्वमानो रयिर्वि रजति द्युमान्	मधोर्धाराभिरोजसा	॥ 3 ॥
बर्हिः प्राचीनमोजसा पर्वमानः स्तृणन्हरिः	देवेषु देव ईयते	॥ 4 ॥
उदातैर्जिहते बृहद्वारो देवीर्हिरण्ययीः	पर्वमानेन सुष्टुताः	॥ 5 ॥
सुशिल्पे बृहती मही पर्वमानो वृषण्यति	नक्तोषासा न दर्शते	॥ 6 ॥
उभा देवा नृचक्षसा होतारा दैव्या हुवे	पर्वमान इन्द्रो वृषा	॥ 7 ॥
भारती पर्वमानस्य सरस्वतीळा मही	इमं नो यज्ञमा गमन्तिस्त्रो देवीः सुपेशसः	॥ 8 ॥
त्वष्टारमग्रजां गोपां पुरोयावान्मा हुवे	इन्दुरिन्द्रो वृषा हरिः पर्वमानः प्रजापतिः	॥ 9 ॥

वनस्पतिं पवमान् मध्वा समङ्गिन्धु धारया । सहस्रवल्शं हरितं भ्राजमानं हिरण्ययम् ॥ 10 ॥
विश्वे देवाः स्वाहाकृतिं पवमानस्या गत । वायुर्बृहस्पतिः सूर्योऽग्निरिन्द्रः सृजोषसः ॥ 11 ॥

(9) **6** (म.9, अनु.1)

ऋषिः काश्यपः असितः देवलः वा छन्दः गायत्री देवता पवमानः सोमः

मन्द्रयां सोम धारया वृषा पवस्व देव्युः । अव्यो वारेष्वस्मयुः ॥ 1 ॥
अभि त्यं मद्यं मदुमिन्दुविन्द्र इति क्षर । अभि वाजिनो अर्वतः ॥ 2 ॥
अभि त्यं पूर्व्यं मदं सुवानो अर्ष पवित्र आ । अभि वाजमुत श्रवः ॥ 3 ॥
अनु द्रप्सास इन्दव आपो न प्रवतासरन् । पुनाना इन्द्रमाशत ॥ 4 ॥
यमत्यमिव वाजिनं मृजन्ति योषणो दश । वने क्रीळन्तुमत्यविम् ॥ 5 ॥
तं गोभिवृषणं रसं मदाय देववीतये । सुतं भराय सं सृज ॥ 6 ॥
देवो देवाय धारयेन्द्राय पवते सुतः । पयो यदस्य पीपयत् ॥ 7 ॥
आत्मा यज्ञस्य रंढ्या सुष्वाणः पवते सुतः । प्रत्नं नि पाति काव्यम् ॥ 8 ॥
एवा पुनान इन्द्रयुर्मदं मदिष्ठ वीतये । गुहां चिद्वधिषे गिरः ॥ 9 ॥

(9) **7** (म.9, अनु.1)

ऋषिः काश्यपः असितः देवलः वा छन्दः गायत्री देवता पवमानः सोमः

असृग्रमिन्दवः पथा धर्मवृत्तस्य सुश्रियः । विदाना अस्य योजनम् ॥ 1 ॥
प्र धारा मध्वो अग्रियो महीरपो वि गाहते । हविर्हविष्णु वन्द्यः ॥ 2 ॥
प्र युजो वाचो अग्रियो वृषाव चक्रद्वने । सद्भाभि सत्यो अध्वरः ॥ 3 ॥
परि यत्काव्या क्विर्नृम्णा वसानो अर्षति । स्वर्वाजी सिषासति ॥ 4 ॥
पवमानो अभि स्पृधो विशो राजेव सीदति । यदीमृण्वन्ति वेधसः ॥ 5 ॥
अव्यो वारे परि प्रियो हरिर्वनेषु सीदति । रेभो वनुष्यते मती ॥ 6 ॥
स वायुमिन्द्रमश्विनां साकं मदेन गच्छति । रणा यो अस्य धर्मभिः ॥ 7 ॥
आ मित्रावरुणा भगं मध्वः पवन्त ऊर्मयः । विदाना अस्य शकमभिः ॥ 8 ॥
अस्मभ्यं रोदसी रयिं मध्वो वाजस्य सातये । श्रवो वसूनि सं जितम् ॥ 9 ॥

(9) **8** (म.9, अनु.1)

ऋषिः काश्यपः असितः देवलः वा छन्दः गायत्री देवता पवमानः सोमः

एते सोमा अभि प्रियमिन्द्रस्य काममक्षरन् । वर्धन्तो अस्य वीर्यम् ॥ 1 ॥
पुनानासंश्चमूषदो गच्छन्तो वायुमश्विना । ते नो धान्तु सुवीर्यम् ॥ 2 ॥
इन्द्रस्य सोम राधसे पुनानो हार्दि चोदय । ऋतस्य योनिमासदम् ॥ 3 ॥
मृजन्ति त्वा दश क्षिपो हिन्वन्ति सप्त धीतर्यः । अनु विप्रा अमादिषुः ॥ 4 ॥
देवेभ्यस्त्वा मदाय कं सृजानमति मेष्यः । सं गोभिर्वासयामसि ॥ 5 ॥
पुनानः कलशेष्वा वस्त्राण्यरुषो हरिः । परि गव्यान्यव्यत ॥ 6 ॥

मृधोन् आ पवस्व नो जृहि विश्वा अप् द्विषः। इन्दो सखायुमा विश ॥ 7 ॥
 वृष्टिं दिवः परिं स्रव द्युम्नं पृथिव्या अधि । सहो नः सोम पृत्सु धाः ॥ 8 ॥
 नृचक्षसं त्वा वयमिन्द्रपीतं स्वर्विदम् । भृक्षीमहिं प्रजामिषम् ॥ 9 ॥

(9)

9

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

परिं प्रिया दिवः कृविर्वयांसि नृस्योर्हितः । सुवानो याति कृविक्रतुः ॥ 1 ॥
 प्रप्र क्षयाय पन्यसे जनाय जुष्टो अद्भुहे । वीत्यर्ष चनिष्ठया ॥ 2 ॥
 स सूनुर्मातरा शुचिर्जातो जाते अरोचयत् । महान्मही ऋतावृधा ॥ 3 ॥
 स सप्त धीतिर्भिर्हितो नृद्यो अजिन्वदद्भुहः । या एकमक्षिं वावृधुः ॥ 4 ॥
 ता अभि सन्तमस्तृतं महे युवानुमा दधुः । इन्दुमिन्द्र तव व्रते ॥ 5 ॥
 अभि वह्निरमर्त्यः सप्त पश्यति वार्वहिः । क्रिविर्देवीरतर्पयत् ॥ 6 ॥
 अवा कल्पेषु नः पुमस्तमांसि सोम योध्या । तानि पुनान जङ्घनः ॥ 7 ॥
 नू नव्यसे नवीयसे सूक्ताय साधया पथः । प्रत्वद्रौचया रुचः ॥ 8 ॥
 पवमान महि श्रवो गामर्ध्वं रासि वीरवत् । सना मेधां सना स्वः ॥ 9 ॥

(9)

10

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र स्वानासो रथाइवार्वन्तो न श्रवस्यवः । सोमासो राये अक्रमुः ॥ 1 ॥
 हिन्वानासो रथाइव दधन्विरे गर्भस्त्योः । भरासः कारिणामिव ॥ 2 ॥
 राजानो न प्रशस्तिभिः सोमासो गोभिरञ्जते । युज्ञो न सप्त धातृभिः ॥ 3 ॥
 परिं सुवानासु इन्दवो मदाय बर्हणा गिरा । सुता अर्षन्ति धारया ॥ 4 ॥
 आपानासो विवस्वतो जनन्त उषसो भगम् । सूरु अण्वं वि तन्वते ॥ 5 ॥
 अप् द्वारा मतीनां प्रत्वा ऋण्वन्ति कारवः । वृष्णो हरस आयवः ॥ 6 ॥
 समीचीनास आसते होतारः सप्तजामयः । पदमेकस्यु पिप्रतः ॥ 7 ॥
 नाभा नाभिं नू आ ददे चक्षुश्चित्सूर्ये सचा । कवेरपत्युमा दुहे ॥ 8 ॥
 अभि प्रिया दिवस्पदमध्वर्युभिर्गुहा हितम् । सूरः पश्यति चक्षसा ॥ 9 ॥

(9)

11

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

उपास्मै गायता नरः पवमानायेन्दवे । अभि देवां इयक्षते ॥ 1 ॥
 अभि ते मधुना पयोऽथर्वाणो अशिश्रयुः । देवं देवाय देव्यु ॥ 2 ॥
 स नः पवस्व शं गवे शं जनाय शमर्वते । शं राजन्नोषधीभ्यः ॥ 3 ॥
 बभ्रवे नु स्वतवसेऽरुणाय दिविस्पृशे । सोमाय गाथमर्चत ॥ 4 ॥
 हस्तच्युतेभिरद्रिभिः सुतं सोमं पुनीतन । मधावा धावता मधु ॥ 5 ॥
 नमसेदुप सीदत दुधेदुभि श्रीणीतन । इन्दुमिन्द्रे दधातन ॥ 6 ॥
 अमित्रहा विचर्षणिः पवस्व सोम शं गवे । देवेभ्यो अनुकामकृत् ॥ 7 ॥

इन्द्राय सोमं पातवे मदाय परिं षिच्यसे । मन्त्रिन्मनसस्पतिः ॥ 8 ॥
 पवमान सुवीर्यं रुयिं सोमं रिरिहि नः । इन्द्रविन्द्रेण नो युजा ॥ 9 ॥

(9)

12

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

सोमा असृगृमिन्दवः सुता ऋतस्य सादने	इन्द्राय मधुमत्तमाः	॥ 1 ॥
अभि विप्रा अनूषत् गावो वृत्सं न मातरः	इन्द्रं सोमस्य पीतये	॥ 2 ॥
मदुच्युत्क्षेति सादने सिन्धोरूर्मा विपश्चित्	सोमो गौरी अधि श्रितः	॥ 3 ॥
दिवो नाभा विचक्षणोऽव्यो वारं महीयते	सोमो यः सुक्रतुः कविः	॥ 4 ॥
यः सोमः कलशेष्वं अन्तः पवित्र आहितः	तमिन्दुः परिं षस्वजे	॥ 5 ॥
प्र वाचमिन्दुरिष्यति समुद्रस्याधि विष्टिपि	जिन्वन्कोशं मधुश्रुतम्	॥ 6 ॥
नित्यस्तोत्रो वनस्पतिर्धुनामन्तः संबुर्दुर्घः	हिन्वानो मानुषा युगा	॥ 7 ॥
अभि प्रिया दिवस्पदा सोमो हिन्वानो अर्षति	विप्रस्य धारया कविः	॥ 8 ॥
आ पवमान धारय रुयिं सहस्रवर्चसम्	अस्मे इन्दो स्वाभुवम्	॥ 9 ॥

| इति षष्ठाष्टके सप्तमोऽध्यायः समाप्तः ।

(अष्टमोऽध्यायः ॥ वर्गाः 1-31)

(9)

13

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
सोमः पुनानो अर्षति सहस्रधारो अत्यविः	वायोरिन्द्रस्य निष्कृतम्	॥ 1 ॥
पवमानमवस्यवो विप्रमभि प्र गायत	सुष्वाणं देववीतये	॥ 2 ॥
पवन्ते वाजसातये सोमाः सहस्रपाजसः	गृणाना देववीतये	॥ 3 ॥
उत नो वाजसातये पवस्व बृहतीरिषः	द्युमदिन्दो सुवीर्यम्	॥ 4 ॥
ते नः सहस्रिणं रयिं पवन्तामा सुवीर्यम्	सुवाना देवास इन्दवः	॥ 5 ॥
अत्या हियाना न हेतृभिरसृग्रं वाजसातये	वि वारमव्यमाशवः	॥ 6 ॥
वाश्रा अर्षन्तीन्दवोऽभि वृत्सं न धेनवः	दुधन्विरे गभस्त्योः	॥ 7 ॥
जुष्ट इन्द्राय मत्सरः पवमान कर्निक्रदत्	विश्वा अप द्विषो जहि	॥ 8 ॥
अपघ्नन्तो अराव्यः पवमानाः स्वर्दशः	योनावृतस्य सीदत	॥ 9 ॥

(8)

14

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
परि प्रासिष्यदत्कविः सिन्धोरूमावधि श्रितः	कारं विभ्रत्पुरुस्पृहम्	॥ 1 ॥
गिरा यदी सबन्धवः पञ्च व्राता अपस्यवः	परिष्कृण्वन्ति धर्णसिम्	॥ 2 ॥
आदस्य शुष्मिणो रसे विश्वे देवा अमत्सत	यदी गोभिर्वसायते	॥ 3 ॥
निरिणानो वि धावति जहच्छर्याणि तान्वा	अत्रा सं जिघ्रते युजा	॥ 4 ॥
नृमीभिर्यो विवस्वतः शुभ्रो न मामृजे युवा	गाः कृण्वानो न निर्णिजम्	॥ 5 ॥
अति श्रिती तिरश्चता गव्या जिगात्यण्व्या	वग्मुर्मियति यं विदे	॥ 6 ॥
अभि क्षिपुः समगमत मर्जयन्तीरिषस्पतिम्	पृष्ठा गृभ्णत वाजिनः	॥ 7 ॥
परि दिव्यानि मर्मशद्विश्वानि सोम पार्थिवा	वसूनि याह्यस्म्युः	॥ 8 ॥

(8)

15

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
एष धिया यात्यण्व्या शूरो रथेभिराशुभिः	गच्छन्निन्द्रस्य निष्कृतम्	॥ 1 ॥
एष पुरु धियायते बृहते देवतातये	यत्रामृतास आसते	॥ 2 ॥
एष हितो वि नीयतेऽन्तः शुभ्रावता पथा	यदी तुञ्जन्ति भूर्णयः	॥ 3 ॥
एष शृङ्गाणि दोधुवच्छिशीते यूथ्योऽ वृषा	नृम्णा दधान ओजसा	॥ 4 ॥
एष रुक्मिभिरीयते वाजी शुभ्रेभिरंशुभिः	पतिः सिन्धूनां भवन्	॥ 5 ॥
एष वसूनि पिबुना परुषा ययिवाँ अति	अव शादेषु गच्छति	॥ 6 ॥
एतं मृजन्ति मर्ज्यमुप द्रोणेष्वायवः	प्रचक्राणं महीरिषः	॥ 7 ॥

एतमु त्वं दश क्षिपो मृजन्ति सप्त धीतर्यः । स्वायुधं मदिन्तमम् ॥ 8 ॥

(8)

16

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र ते स्रोतारं ओण्योर् रसं मदाय घृष्वये	। सर्गा न तक्त्येतशः	॥ 1 ॥
क्रत्वा दक्षस्य रथ्यमपो वसान्मन्धसा	। गोषामण्वेषु सश्चिम	॥ 2 ॥
अनप्तमप्सु दुष्टरं सोमं पवित्र आ सृज	। पुनीहीन्द्राय पातवे	॥ 3 ॥
प्र पुनानस्य चेतसा सोमः पवित्रे अर्षति	। क्रत्वा सधस्थमासदत्	॥ 4 ॥
प्र त्वा नमोभिरिन्द्व इन्द्र सोमा असृक्षत	। महे भराय कारिणः	॥ 5 ॥
पुनानो रूपे अव्यये विश्वा अर्षन्नभि श्रियः	। शूरो न गोषु तिष्ठति	॥ 6 ॥
दिवो न सानु पिप्युषी धारा सुतस्य वेधसः	। वृथा पवित्रे अर्षति	॥ 7 ॥
त्वं सोम विपश्चितं तना पुनान आयुषु	। अव्यो वारं वि धावसि	॥ 8 ॥

(8)

17

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र निम्नेनैव सिन्धवो घ्नन्तो वृत्राणि भूर्णयः	। सोमा असृग्रमाशवः	॥ 1 ॥
अभि सुवानास इन्द्वो वृष्टयः पृथिवीमिव	। इन्द्रं सोमासो अक्षरन्	॥ 2 ॥
अत्यूर्मिर्मत्सरो मदः सोमः पवित्रे अर्षति	। विघ्नत्रक्षांसि देव्युः	॥ 3 ॥
आ कलशेषु धावति पवित्रे परि षिच्यते	। उक्थैर्यज्ञेषु वर्धते	॥ 4 ॥
अति त्री सोम रोचना रोहन्न भ्राजसे दिवम्	। इष्णन्त्सूर्यं न चोदयः	॥ 5 ॥
अभि विप्रा अनूषत मूर्धन्यज्ञस्य कारवः	। दधानाश्चक्षसि प्रियम्	॥ 6 ॥
तमु त्वा वाजिनं नरो धीभिर्विप्रा अवस्यवः	। मृजन्ति देवतातये	॥ 7 ॥
मधोर्धारामनु क्षर तीव्रः सधस्थमासदः	। चारुर्ऋताय पीतये	॥ 8 ॥

(7)

18

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

परि सुवानो गिरिष्ठाः पवित्रे सोमो अक्षाः	। मदैषु सर्वधा असि	॥ 1 ॥
त्वं विप्रस्त्वं कविर्मधु प्र जातमन्धसः	। मदैषु सर्वधा असि	॥ 2 ॥
तव विश्वे सजोषसो देवासः पीतिमाशत	। मदैषु सर्वधा असि	॥ 3 ॥
आ यो विश्वानि वार्या वसूनि हस्तयोर्दधे	। मदैषु सर्वधा असि	॥ 4 ॥
य इमे रोदसी मही सं मातरैव दोहते	। मदैषु सर्वधा असि	॥ 5 ॥
परि यो रोदसी उभे सद्यो वाजेभिरर्षति	। मदैषु सर्वधा असि	॥ 6 ॥
स शुष्मी कलशेष्वा पुनानो अचिक्रदत्	। मदैषु सर्वधा असि	॥ 7 ॥

(7)

19

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
यत्सोम चित्रमुक्थ्यं दिव्यं पार्थिवं वसु	तन्नः पुनान आ भर	॥ 1 ॥
युवं हि स्थः स्वर्पती इन्द्रश्च सोम गोपती	ईशाना पिप्यतुं धियः	॥ 2 ॥
वृषा पुनान आयुषु स्तनयन्नधि बर्हिषि	हरिः सन्योनिमासदत्	॥ 3 ॥
अवावशन्त धीतयो वृषभस्याधि रेतसि	सूनोर्वत्सस्य मातरः	॥ 4 ॥
कुविद्वृषण्यन्तीभ्यः पुनानो गर्भमादधत्	याः शुक्रं दुहते पर्यः	॥ 5 ॥
उप शिक्षापतस्थुषो भियसुमा धेहि शत्रुषु	पवमान विदा रयिम्	॥ 6 ॥
नि शत्रोः सोम वृष्ण्यं नि शुष्मं नि वर्यस्तिर	दूरे वा सुतो अन्ति वा	॥ 7 ॥

(7)

20

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
प्र कुविदेववीतयेऽव्यो वारेभिरर्षति	साह्वान्विश्वा अभि स्पृधः	॥ 1 ॥
स हि ष्मा जरितृभ्य आ वाजं गोमन्तुमिन्वति	पवमानः सहस्रिणम्	॥ 2 ॥
परि विश्वानि चेतसा मृशसे पवसे मती	स नः सोम श्रवो विदः	॥ 3 ॥
अभ्यर्ष बृहद्यशो मघवद्ध्यो ध्रुवं रयिम्	इषं स्तोतृभ्य आ भर	॥ 4 ॥
त्वं राजेव सुव्रतो गिरः सोमा विवेशिथ	पुनानो वद्वे अद्भुत	॥ 5 ॥
स वह्निरप्सु दुष्टरो मृज्यमानो गर्भस्त्योः	सोमश्चमूषु सीदति	॥ 6 ॥
क्रीळुर्मखो न मंहयुः पवित्रं सोम गच्छसि	दधत्स्तोत्रे सुवीर्यम्	॥ 7 ॥

(7)

21

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
एते धावन्तीन्दवः सोमा इन्द्राय घृष्वयः	मत्सुरासः स्वर्विदः	॥ 1 ॥
प्रवृण्वन्तो अभियुजः सुष्वये वरिवोविदः	स्वयं स्तोत्रे वयस्कृतः	॥ 2 ॥
वृथा क्रीळन्त इन्दवः सधस्थमभ्येकमित्	सिन्धोरूमा व्यक्षरन्	॥ 3 ॥
एते विश्वानि वार्या पवमानास आशत	हिता न सप्तयो रथे	॥ 4 ॥
आस्मिन्पिशङ्गमिन्दवो दधाता वेनमादिशे	यो अस्मभ्यमरावा	॥ 5 ॥
ऋभुर्न रथ्यं नवं दधाता केतमादिशे	शुक्राः पवध्वमर्णसा	॥ 6 ॥
एत उ त्ये अवीवशन्काष्ठां वाजिनो अक्रत	सुतः प्रासाविषुर्मतिम्	॥ 7 ॥

(7)

22

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
एते सोमास आशवो रथाइव प्र वाजिनः	सर्गाः सृष्टा अहेषत	॥ 1 ॥
एते वाताइवोरवः पर्जन्यस्येव वृष्टयः	अग्नेरिव भ्रमा वृथा	॥ 2 ॥
एते पूता विपश्चित्तः सोमासो दध्याशिरः	विपा व्यानशुर्धियः	॥ 3 ॥
एते मृष्टा अमर्त्याः ससृवांसो न शश्रमुः	इयक्षन्तः पथो रजः	॥ 4 ॥

एते पृष्ठानि रोदसोर्विप्रयन्तो व्यानशुः	उतेदमुत्तमं रजः	॥ 5 ॥
तन्तुं तन्वानमुत्तममनुं प्रवत आशत	उतेदमुत्तमाय्यम्	॥ 6 ॥
त्वं सोमं पणिभ्यु आ वसु गव्यानि धारयः	ततं तन्तुमचिक्रदः	॥ 7 ॥

(7)

23

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

सोमा असृग्रमाशवो मधोर्मदस्य धारया	अभि विश्वानि काव्या	॥ 1 ॥
अनुं प्रत्नासं आयवः पदं नवीयो अक्रमुः	रुचे जनन्तु सूर्यम्	॥ 2 ॥
आ पवमान नो भरार्यो अदाशुषो गयम्	कृधि प्रजावतीरिषः	॥ 3 ॥
अभि सोमास आयवः पवन्ते मद्यं मदम्	अभि कोशं मधुश्रुतम्	॥ 4 ॥
सोमो अर्षति धर्णसिर्दधान इन्द्रियं रसम्	सुवीरो अभिशस्तिपाः	॥ 5 ॥
इन्द्राय सोम पवसे देवेभ्यः सधुमाद्यः	इन्द्रो वाजं सिषाससि	॥ 6 ॥
अस्य पीत्वा मदानामिन्द्रो वृत्राण्यप्रति	जघान जघनञ्च नु	॥ 7 ॥

(7)

24

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र सोमासो अधन्विषुः पवमानासु इन्द्रवः	श्रीणाना अप्सु मृञ्जत	॥ 1 ॥
अभि गावो अधन्विषुरापो न प्रवता यतीः	पुनाना इन्द्रमाशत	॥ 2 ॥
प्र पवमान धन्वसि सोमेन्द्राय पातवे	नृभिर्यतो वि नीयसे	॥ 3 ॥
त्वं सोम नृमार्दनः पवस्व चर्षणीसहे	सस्त्रियो अनुमाद्यः	॥ 4 ॥
इन्द्रो यदद्रिभिः सुतः पवित्रं परिधावसि	अरमिन्द्रस्य धाम्ने	॥ 5 ॥
पवस्व वृत्रहन्तमोक्थेभिरनुमाद्यः	शुचिः पावको अब्दुतः	॥ 6 ॥
शुचिः पावक उच्यते सोमः सुतस्य मध्वः	देवावीरघशंसहा	॥ 7 ॥

(6)

25

(म.9, अनु.2)

ऋषिः दळ्हच्युतः आगस्त्यः	छन्दः गायत्री	देवता पवमानः सोमः
--------------------------	---------------	-------------------

पवस्व दक्षसाधनो देवेभ्यः पीतये हरे	मरुद्धो वायवे मदः	॥ 1 ॥
पवमान धिया हितोर्भि योनिं कनिक्रदत्	धर्मणा वायुमा विश	॥ 2 ॥
सं देवैः शोभते वृषा क्विर्योनावधि प्रियः	वृत्रहा देववीतमः	॥ 3 ॥
विश्वा रूपाण्याविशन्पुनानो याति हर्यतः	यत्रामृतासु आसते	॥ 4 ॥
अरुषो जनयन् गिरः सोमः पवत आयुषक्	इन्द्रं गच्छन् क्विक्रतुः	॥ 5 ॥
आ पवस्व मदिन्तम पवित्रं धारया कवे	अर्कस्य योनिमासदम्	॥ 6 ॥

(6)

26

(म.9, अनु.2)

ऋषिः इध्मवाहो दार्ढ्युतः	छन्दः गायत्री	देवता पवमानः सोमः
--------------------------	---------------	-------------------

तममृक्षन्त वाजिनमुपस्थे अदितेरधि	विप्रासो अण्व्या धिया	॥ 1 ॥
तं गावो अभ्यनूषत सहस्रधारमक्षितम्	इन्दुं धर्तारमा दिवः	॥ 2 ॥
तं वेधां मेधयाह्यन्पवमानमधि द्यवि	धर्णसिं भूरिधायसम्	॥ 3 ॥
तमह्यन्भुरिजोर्धिया संवसानं विवस्वतः	पतिं वाचो अदाभ्यम्	॥ 4 ॥
तं सान्नावधिं जामयो हरिं हिन्वन्त्यद्रिभिः	हर्युतं भूरिचक्षसम्	॥ 5 ॥
तं त्वा हिन्वन्ति वेधसः पवमान गिरावृधम्	इन्दुविन्द्राय मत्सुरम्	॥ 6 ॥

(6)

27

(म.9, अनु.2)

ऋषिः नृमेधः आङ्गिरसः	छन्दः गायत्री	देवता पवमानः सोमः
----------------------	---------------	-------------------

एष कविरभिष्टुतः पवित्रे अधि तोशते	पुनानो घ्नन्पु स्त्रिधः	॥ 1 ॥
एष इन्द्राय वायवे स्वर्जित्परि षिच्यते	पवित्रे दक्षसार्धनः	॥ 2 ॥
एष नृभिर्वि नीयते दिवो मूर्धा वृषा सुतः	सोमो वनेषु विश्ववित्	॥ 3 ॥
एष गव्युरचिक्रदत्पवमानो हिरण्ययुः	इन्दुः सत्राजिदस्तृतः	॥ 4 ॥
एष सूर्येण हासते पवमानो अधि द्यवि	पवित्रे मत्सुरो मदः	॥ 5 ॥
एष शुष्यसिष्यददन्तरिक्षे वृषा हरिः	पुनान इन्दुरिन्द्रमा	॥ 6 ॥

(6)

28

(म.9, अनु.2)

ऋषिः प्रियमेधः आङ्गिरसः	छन्दः गायत्री	देवता पवमानः सोमः
-------------------------	---------------	-------------------

एष वाजी हितो नृभिर्विश्वविन्मनसुस्पतिः	अव्यो वारं वि धावति	॥ 1 ॥
एष पवित्रे अक्षरत्सोमो देवेभ्यः सुतः	विश्वा धामान्याविशन्	॥ 2 ॥
एष देवः शुभायतेऽधि योनावमर्त्यः	वृत्रहा देववीतमः	॥ 3 ॥
एष वृषा कर्निक्रददृशभिर्जामिभिर्युतः	अग्नि द्रोणानि धावति	॥ 4 ॥
एष सूर्यमरोचयत्पवमानो विचर्षणिः	विश्वा धामानि विश्ववित्	॥ 5 ॥
एष शुष्यदाभ्यः सोमः पुनानो अर्षति	देवावीरघशंसहा	॥ 6 ॥

(6)

29

(म.9, अनु.2)

ऋषिः नृमेधः आङ्गिरसः	छन्दः गायत्री	देवता पवमानः सोमः
----------------------	---------------	-------------------

प्रास्य धारा अक्षरन्वृष्णाः सुतस्यौजसा	देवाँ अनु प्रभूषतः	॥ 1 ॥
सप्तिं मृजन्ति वेधसो गृणन्तः कारवो गिरा	ज्योतिर्जज्ञानमुक्थ्यम्	॥ 2 ॥
सुषहा सोम तानि ते पुनानाय प्रभूवसो	वर्धा समुद्रमुक्थ्यम्	॥ 3 ॥
विश्वा वसूनि संजयन्पवस्व सोम धारया	इनु द्वेषांसि सध्वक्	॥ 4 ॥
रक्षा सु नो अररुषः स्वनात्समस्य कस्य चित्	निदो यत्र मुमुचमहे	॥ 5 ॥
एन्दो पार्थिवं रथिं दिव्यं पवस्व धारया	द्युमन्तं शुष्मा भर	॥ 6 ॥

(6)

30

(म.9, अनु.2)

ऋषिः बिन्दुः आङ्गिरसः	छन्दः गायत्री	देवता पवमानः सोमः
-----------------------	---------------	-------------------

प्र धारां अस्य शुष्मिणो वृथा प्वित्रै अक्षरन्	पुनानो वार्चमिष्यति	॥ 1 ॥
इन्दुर्हियानः सोतृभिर्मृज्यमानः कर्निक्रदत्	इर्यति वृष्टुर्मिन्द्रियम्	॥ 2 ॥
आ नः शुष्मं नृषाह्यं वीरवन्तं पुरुस्पृहम्	पवस्व सोम धारया	॥ 3 ॥
प्र सोमो अति धारया पवमानो असिष्यदत्	अभि द्रोणान्यासदम्	॥ 4 ॥
अप्सु त्वा मधुमत्तमं हरिं हिन्वन्त्यद्रिभिः	इन्दुविन्द्राय पीतये	॥ 5 ॥
सुनोता मधुमत्तमं सोममिन्द्राय वृज्जिणै	चारुं शर्धाय मत्सुरम्	॥ 6 ॥

(6)

31

(म.9, अनु.2)

ऋषिः राहूगणः गोतमः	छन्दः गायत्री	देवता पवमानः सोमः
--------------------	---------------	-------------------

प्र सोमासः स्वाध्यशुः पवमानासो अक्रमुः	रुयिं कृण्वन्ति चेतनम्	॥ 1 ॥
दिवस्पृथिव्या अधि भवेन्दो द्युमृवर्धनः	भवा वाजानां पतिः	॥ 2 ॥
तुभ्यं वाता अभिप्रियस्तुभ्यमर्षन्ति सिन्धवः	सोम वर्धन्ति ते महः	॥ 3 ॥
आ प्यायस्व समेतु ते विश्वतः सोम वृष्यम्	भवा वाजस्य संगुथे	॥ 4 ॥
तुभ्यं गावो घृतं पयो बभ्रौ दुदुहे अक्षितम्	वर्षिष्ठे अधि सानवि	॥ 5 ॥
स्वायुधस्य ते सुतो भुवनस्य पते वयम्	इन्दो सखित्वमुश्मसि	॥ 6 ॥

(6)

32

(म.9, अनु.2)

ऋषिः श्यावाश्वः आत्रेयः	छन्दः गायत्री	देवता पवमानः सोमः
-------------------------	---------------	-------------------

प्र सोमासो मदुच्युतः श्रवसे नो मघोनः	सुता विदथे अक्रमुः	॥ 1 ॥
आदीं त्रितस्य योषणो हरिं हिन्वन्त्यद्रिभिः	इन्दुमिन्द्राय पीतये	॥ 2 ॥
आदीं हंसो यथा गुणं विश्वस्यावीवशन्मतिम्	अत्यो न गोभिरज्यते	॥ 3 ॥
उभे सौमावचाकशन्मृगो न तक्तो अर्षसि	सीदन्नृतस्य योनिमा	॥ 4 ॥
अभि गावो अनूषत योषा जारमिव प्रियम्	अगन्नाजि यथा हितम्	॥ 5 ॥
अस्मे धैहि द्युमद्यशो मघवद्भ्यश्च मह्यं च	सुनिं मेधामुत श्रवः	॥ 6 ॥

(6)

33

(म.9, अनु.2)

ऋषिः त्रितः आत्यः	छन्दः गायत्री	देवता पवमानः सोमः
-------------------	---------------	-------------------

प्र सोमासो विपुश्चित्तोऽपां न यन्त्यूर्मयः	वनानि महिषाईव	॥ 1 ॥
अभि द्रोणानि बभ्रवः शुक्रा ऋतस्य धारया	वाजं गोमन्तमक्षरन्	॥ 2 ॥
सुता इन्द्राय वायवे वरुणाय मरुद्भ्यः	सोमा अर्षन्ति विष्णवे	॥ 3 ॥
तिस्रो वाच उदीरते गावो मिमन्ति धेनवः	हरिरेति कर्निक्रदत्	॥ 4 ॥
अभि ब्रह्मीरनूषत युह्वीर्ऋतस्य मातरः	मर्मृज्यन्ते दिवः शिशुम्	॥ 5 ॥
रायः समुद्रांश्चतुरोऽस्मभ्यं सोम विश्वतः	आ पवस्व सहस्रिणः	॥ 6 ॥

(6)

34

(म.9, अनु.2)

ऋषिः त्रितः आत्यः

छन्दः गायत्री

देवता पवमानः सोमः

प्र सुवानो धारया तनेन्दुर्हिन्वानो अर्षति	रुजहृळ्हा व्योजसा	॥ 1 ॥
सुत इन्द्राय वायवे वरुणाय मरुद्भ्यः	सोमो अर्षति विष्णवे	॥ 2 ॥
वृषाणं वृषभिर्यतं सुन्वन्ति सोममर्षिभिः	दुहन्ति शकमना पर्यः	॥ 3 ॥
भुवत्रितस्य मर्ष्यो भुवदिन्द्राय मत्सरः	सं रूपैरज्यते हरिः	॥ 4 ॥
अभीमृतस्य विष्टपं दुहते पृश्निमातरः	चारु प्रियतमं हविः	॥ 5 ॥
समेनमर्हता इमा गिरौ अर्षन्ति सुसुतः	धेनूर्वाश्रो अवीवशत्	॥ 6 ॥

(6)

35

(म.9, अनु.2)

ऋषिः प्रभूवसुः आङ्गिरसः

छन्दः गायत्री

देवता पवमानः सोमः

आ नः पवस्व धारया पवमान रयिं पृथुम्	यया ज्योतिर्विदासि नः	॥ 1 ॥
इन्दो समुद्रमीङ्खय पवस्व विश्वमेजय	रायो धर्ता न ओजसा	॥ 2 ॥
त्वया वीरेण वीरवोऽभि ष्याम पृतन्यतः	क्षरा णो अभि वार्यम्	॥ 3 ॥
प्र वाजमिन्दुरिष्यति सिषासन्वाजसा ऋषिः	व्रता विदान आयुधा	॥ 4 ॥
तं गीर्भिर्वाचमीङ्खयं पुनानं वासयामसि	सोमं जनस्य गोपतिम्	॥ 5 ॥
विश्वो यस्य व्रते जनो दाधार धर्मणस्पतैः	पुनानस्य प्रभूवसोः	॥ 6 ॥

(6)

36

(म.9, अनु.2)

ऋषिः प्रभूवसुः आङ्गिरसः

छन्दः गायत्री

देवता पवमानः सोमः

असर्जि रथ्यो यथा पवित्रे चम्बोः सुतः	कार्ष्मन्वाजी न्यक्रमीत्	॥ 1 ॥
स वह्निः सोम जागृविः पवस्व देववीरति	अभि कोशं मधुश्चुतम्	॥ 2 ॥
स नो ज्योतीषि पूर्य पवमान् वि रोचय	क्रत्वे दक्षाय नो हिनु	॥ 3 ॥
शुम्भमान ऋतायुभिर्मृज्यमानो गर्भस्त्योः	पवते वारे अव्यये	॥ 4 ॥
स विश्वा दाशुषे वसु सोमो दिव्यानि पार्थिवा	पवतामान्तरिक्ष्या	॥ 5 ॥
आ दिवस्पृष्टमश्वयुर्गव्ययुः सोम रोहसि	वीरयुः शवसस्पते	॥ 6 ॥

(6)

37

(म.9, अनु.2)

ऋषिः रहूगणः आङ्गिरसः

छन्दः गायत्री

देवता पवमानः सोमः

स सुतः पीतये वृषा सोमः पवित्रे अर्षति	विघ्नक्षीसि देवयुः	॥ 1 ॥
स पवित्रे विचक्षणो हरिरर्षति धर्णसिः	अभि योनिं कर्निक्रदत्	॥ 2 ॥
स वाजी रोचना दिवः पवमानो वि धावति	रुक्षोहा वारमव्ययम्	॥ 3 ॥
स त्रितस्याधि सानवि पवमानो अरोचयत्	जामिभिः सूर्यं सह	॥ 4 ॥
स वृत्रहा वृषा सुतो वरिवोविददाभ्यः	सोमो वाजमिवासरत्	॥ 5 ॥
स देवः कृविनेषितोर्भि द्रोणानि धावति	इन्दुरिन्द्राय मंहना	॥ 6 ॥

(6)

38

(म.9, अनु.2)

ऋषिः रहूगणः आङ्गिरसः	छन्दः गायत्री	देवता पवमानः सोमः
----------------------	---------------	-------------------

एष उ स्य वृषा रथोऽव्यो वारैभिरर्षति	गच्छन्वाजं सहस्रिणम्	॥ 1 ॥
एतं त्रितस्य योषणो हरिं हिन्वन्त्यद्रिभिः	इन्दुमिन्द्राय पीतये	॥ 2 ॥
एतं त्यं हरितो दशं मर्मृज्यन्ते अपस्युवः	याभिर्मदाय शुम्भते	॥ 3 ॥
एष स्य मानुषीष्वा श्येनो न विक्षु सीदति	गच्छञ्जारो न योषितम्	॥ 4 ॥
एष स्य मद्यो रसोऽव चष्टे दिवः शिशुः	य इन्दुर्वारमाविशत्	॥ 5 ॥
एष स्य पीतये सुतो हरिरर्षति धर्णसिः	क्रन्दन्योनिमभि प्रियम्	॥ 6 ॥

(6)

39

(म.9, अनु.2)

ऋषिः बृहन्मतिः आङ्गिरसः	छन्दः गायत्री	देवता पवमानः सोमः
-------------------------	---------------	-------------------

आशुरर्ष बृहन्मते परि प्रियेण धाम्ना	यत्र देवा इति ब्रवन्	॥ 1 ॥
परिष्कृण्वन्ननिष्कृतं जनाय यातयन्निषः	वृष्टिं दिवः परि स्रव	॥ 2 ॥
सुत एति पवित्र आ त्विषिं दधान् ओजसा	विचक्षाणो विरोचयन्	॥ 3 ॥
अयं स यो दिवस्परि रघुयामा पवित्र आ	सिन्धोरूर्मा व्यक्षरत्	॥ 4 ॥
आविवासन्यरावतो अथो अर्वावतः सुतः	इन्द्राय सिच्यते मधु	॥ 5 ॥
समीचीना अनूषत् हरिं हिन्वन्त्यद्रिभिः	योनावृतस्य सीदत	॥ 6 ॥

(6)

40

(म.9, अनु.2)

ऋषिः बृहन्मतिः आङ्गिरसः	छन्दः गायत्री	देवता पवमानः सोमः
-------------------------	---------------	-------------------

पुनानो अक्रमीदभि विश्वा मृधो विचर्षणिः	शुम्भन्ति विप्रं धीतिभिः	॥ 1 ॥
आ योनिमरुणो रुहद्रमदिन्द्रं वृषा सुतः	ध्रुवे सदेसि सीदति	॥ 2 ॥
नू नो रयिं महामिन्द्रोऽस्मभ्यं सोम विश्वतः	आ पवस्व सहस्रिणम्	॥ 3 ॥
विश्वा सोम पवमान द्युम्नानीन्दुवा भर	विदाः सहस्रिणीरिषः	॥ 4 ॥
स नः पुनान आ भर रयिं स्तोत्रे सुवीर्यम्	जरितुर्वर्धया गिरः	॥ 5 ॥
पुनान इन्दुवा भर सोम द्विबर्हसं रयिम्	वर्षन्निन्दो न उक्थ्यम्	॥ 6 ॥

(6)

41

(म.9, अनु.2)

ऋषिः मेध्यातिथिः काण्वः	छन्दः गायत्री	देवता पवमानः सोमः
-------------------------	---------------	-------------------

प्र ये गावो न भूर्णयस्त्वेषा अयासो अक्रमुः	घ्नन्तः कृष्णामप त्वचम्	॥ 1 ॥
सुवितस्य मनामहेऽति सेतुं दुराव्यम्	साहांसो दस्युमव्रतम्	॥ 2 ॥
शृण्वे वृष्टेरिव स्वूनः पवमानस्य शुष्मिणः	चरन्ति विद्युतो दिवि	॥ 3 ॥
आ पवस्व महीमिषं गोमदिन्द्रो हिरण्यवत्	अश्वावद्वाजवत्सुतः	॥ 4 ॥
स पवस्व विचर्षण आ मही रोदसी पृण	उषाः सूर्यो न रश्मिभिः	॥ 5 ॥
परि णः शर्मयन्त्या धारया सोम विश्वतः	सरा रसेव विष्टपम्	॥ 6 ॥

(6)

42

(म.9, अनु.2)

ऋषिः मेध्यातिथिः काण्वः	छन्दः गायत्री	देवता पवमानः सोमः
-------------------------	---------------	-------------------

जुनर्यन्नोचना दिवो जुनर्यन्नप्सु सूर्यम्	वसानो गा अपो हरिः	॥ 1 ॥
एष प्रलेन मन्मना देवो देवेभ्यस्परि	धारया पवते सुतः	॥ 2 ॥
वावृधानाय तूर्वये पवन्ते वाजसातये	सोमाः सहस्रपाजसः	॥ 3 ॥
दुहानः प्रलमित्पयः पवित्रे परि षिच्यते	क्रन्दन् देवाँ अजीजनत्	॥ 4 ॥
अभि विश्वानि वार्याभि देवाँ ऋतावृधः	सोमः पुनानो अर्षति	॥ 5 ॥
गोमन्नः सोम वीरवृदश्वावृद्वाजवत्सुतः	पवस्व बृहतीरिषः	॥ 6 ॥

(6)

43

(म.9, अनु.2)

ऋषिः मेध्यातिथिः काण्वः	छन्दः गायत्री	देवता पवमानः सोमः
-------------------------	---------------	-------------------

यो अत्येव मृज्यते गोभिर्मदाय हर्यतः	तं गीर्भिर्वासयामसि	॥ 1 ॥
तं नो विश्वा अवस्युवो गिरः शुम्भन्ति पूर्वथा	इन्दुमिन्द्राय पीतये	॥ 2 ॥
पुनानो याति हर्यतः सोमो गीर्भिः परिष्कृतः	विप्रस्य मेध्यातिथेः	॥ 3 ॥
पवमान विदा रयिमस्मभ्यं सोम सुश्रियम्	इन्दो सहस्रवर्चसम्	॥ 4 ॥
इन्दुरत्यो न वाजसृत्कनिक्रन्ति पवित्र आ	यदक्षारति देव्युः	॥ 5 ॥
पवस्व वाजसातये विप्रस्य गृणतो वृधे	सोम रास्व सुवीर्यम्	॥ 6 ॥

| इति षष्ठाष्टके अष्टमोऽध्यायः समाप्तः ।

| इति षष्ठोऽष्टकः समाप्तः ।

। अथ सप्तमोऽष्टकः ।

(प्रथमोऽध्यायः ॥ वर्गाः 1-41)

(6)	44	(म.9, अनु.2)
ऋषिः अयास्यः आङ्गिरसः	छन्दः गायत्री	देवता पवमानः सोमः

प्र ण इन्दो म्हे तनं ऊर्मिं न विभ्रदर्षसि	अ॒भि देवाँ अ॒यास्यः	॥ 1 ॥
मती जुष्टो धिया हितः सोमो हिन्वे परावति	विप्रस्य॑ धारया क॒विः	॥ 2 ॥
अयं देवेषु जागृविः सुत एति पवित्र आ	सोमो॑ याति॒ विचर्षणिः	॥ 3 ॥
स नः पवस्व वाज्युश्चक्राणश्चरुमध्वरम्	ब॒र्हिष्माँ आ वि॒वासति	॥ 4 ॥
स नो भगाय वायवे विप्रवीरः सदावृधः	सोमो॑ दे॒वेष्व्वा य॑मत्	॥ 5 ॥
स नो अ॒द्य वसु॑त्तये क्रतुविद्वातुवित्तमः	वाजं॑ जेषि॒ श्रवो॑ बृहत्	॥ 6 ॥

(6)	45	(म.9, अनु.2)
ऋषिः अयास्यः आङ्गिरसः	छन्दः गायत्री	देवता पवमानः सोमः

स पवस्व मदाय कं नृचक्षां देववीतये	इन्द्र॑विन्द्राय पीतये	॥ 1 ॥
स नो अर्षाभि दूत्यं त्वमिन्द्राय तोशसे	दे॒वान्त्सखि॑भ्य आ वरम्	॥ 2 ॥
उत त्वामरुणं वयं गोभिरञ्जो मदाय कम्	वि॒नो रा॒ये दुरो॑ वृधि	॥ 3 ॥
अत्यु पवित्रमक्रमीद्वाजी धुरं न यामनि	इन्द्र॑दे॒वेषु॑ पत्यते	॥ 4 ॥
समी सखायो अस्वरन्वने क्रीळन्तमत्यविम्	इन्द्रुं॑ ना॒वा अ॑नूषत	॥ 5 ॥
तया पवस्व धारया यया पीतो विचक्षसे	इन्द्रो॑ स्तो॒त्रे सु॒वीर्य॑म्	॥ 6 ॥

(6)	46	(म.9, अनु.2)
ऋषिः अयास्यः आङ्गिरसः	छन्दः गायत्री	देवता पवमानः सोमः

असृग्रन्देववीतयेऽत्यासः कृत्व्याइव	क्षर॑न्तः पर्वतावृधः	॥ 1 ॥
परिष्कृतासह इन्दवहो योषेविह पित्यावती	वहा॑युं सोमा॑ असूक्षत	॥ 2 ॥
एते सोमास इन्दवः प्रयस्वन्तश्चमू सुताः	इन्द्रं॑ वर्धन्ति॒ कर्मा॑भिः	॥ 3 ॥
आ धावता सुहस्त्यः शुक्रा गृभ्णीत मन्थिना	गोभिः॑ श्रीणीत॒ मत्सर॑म्	॥ 4 ॥
स पवस्व धनंजय प्रयन्ता राधसो म्हेः	अ॒स्मभ्यं॑ सोम॒ गातु॑वित्	॥ 5 ॥
एतं मृजन्ति मर्ज्यं पवमानं दश क्षिपः	इन्द्राय॑ मत्सरं॒ मद॑म्	॥ 6 ॥

(5)	47	(म.9, अनु.2)
ऋषिः कविः भार्गवः	छन्दः गायत्री	देवता पवमानः सोमः

अया सोमः सुकृत्या महाश्चिदभ्यवर्धत	म॒न्दान॑ उद्वृषायते	॥ 1 ॥
कृतानीदस्य कर्त्वा चेतन्ते दस्युतर्हणा	ऋ॒णा च॑ धृष्णुश्चयते	॥ 2 ॥
आत्सोमं इन्द्रियो रसो वज्रः सहस्रसा भुवत्	उ॒क्थं॑ यदस्य॒ जाय॑ते	॥ 3 ॥
स्वयं कृविर्विधृतरि विप्राय रत्नमिच्छति	यदी॑ म॒र्मृज्य॑ते॒ धियः॑	॥ 4 ॥
सिष्ठासतू रयीणां वाजेष्वर्वातामिव	भरे॑षु जि॒ग्युषा॑मसि	॥ 5 ॥

(5)

48

(म.9, अनु.2)

ऋषिः कविः भार्गवः	छन्दः गायत्री	देवता पवमानः सोमः
-------------------	---------------	-------------------

तं त्वा नृम्णानि बिभ्रतं सधस्थेषु महो दिवः	चारुं सुकृत्ययेमहे	॥ 1 ॥
संवृक्तधृष्णमुक्थ्यं महामहिब्रतं मदम्	शतं पुरो रुरुक्षणिम्	॥ 2 ॥
अतस्त्वा रयिमभि राजानं सुक्रतो दिवः	सुपर्णो अव्यथिर्भरत्	॥ 3 ॥
विश्वस्मा इत्स्वर्दृशे साधारणं रजस्तुरम्	गोपामृतस्य विर्भरत्	॥ 4 ॥
अधा हिन्वान इन्द्रियं ज्यायो महित्वमानशे	अभिष्टिकृद्विचर्षणिः	॥ 5 ॥

(5)

49

(म.9, अनु.2)

ऋषिः कविः भार्गवः	छन्दः गायत्री	देवता पवमानः सोमः
-------------------	---------------	-------------------

पवस्व वृष्टिमा सु नोऽपामूर्मि दिवस्परि	अयक्ष्मा बृहतीरिषः	॥ 1 ॥
तया पवस्व धारया यया गाव इहागमन्	जन्यासु उप नो गृहम्	॥ 2 ॥
घृतं पवस्व धारया युज्ञेषु देववीतमः	अस्मभ्यं वृष्टिमा पव	॥ 3 ॥
स न ऊर्जे व्यथ्ययं पवित्रं धाव धारया	देवासः शृणवन् हि कम्	॥ 4 ॥
पवमानो असिष्यदद्रक्षांस्यपुजङ्गनत्	प्रलवद्वोचयन्नुचः	॥ 5 ॥

(5)

50

(म.9, अनु.2)

ऋषिः उचथ्यः आङ्गिरसः	छन्दः गायत्री	देवता पवमानः सोमः
----------------------	---------------	-------------------

उत्ते शुष्मास ईरते सिन्धोरूर्मेरिव स्वनः	वाणस्य चोदया पविम्	॥ 1 ॥
प्रसवे त उदीरते तिस्रो वाचो मखस्युर्वः	यदव्य एषि सानवि	॥ 2 ॥
अव्यो वारे परि प्रियं हरिं हिन्वन्त्यद्रिभिः	पवमानं मधुश्चुतम्	॥ 3 ॥
आ पवस्व मदिन्तम पवित्रं धारया कवे	अर्कस्य योनिमासदम्	॥ 4 ॥
स पवस्व मदिन्तम् गोभिरञ्जानो अक्तुभिः	इन्द्रविन्द्राय पीतये	॥ 5 ॥

(5)

51

(म.9, अनु.2)

ऋषिः उचथ्यः आङ्गिरसः	छन्दः गायत्री	देवता पवमानः सोमः
----------------------	---------------	-------------------

अध्वर्यो अद्रिभिः सुतं सोमं पवित्र आ सृज	पुनीहीन्द्राय पातवे	॥ 1 ॥
दिवः पीयूषमुत्तमं सोममिन्द्राय वज्रिणे	सुनोता मधुमत्तमम्	॥ 2 ॥
तव त्य इन्द्रो अन्धसो देवा मधोर्व्यश्रते	पवमानस्य मरुतः	॥ 3 ॥
त्वं हि सोम वर्धयन्त्सुतो मदाय भूर्णये	वृषन्स्तोतारमूतये	॥ 4 ॥
अभ्यर्ष विचक्षण पवित्रं धारया सुतः	अभि वाजमुत श्रवः	॥ 5 ॥

(5)

52

(म.9, अनु.2)

ऋषिः उचथ्यः आङ्गिरसः	छन्दः गायत्री	देवता पवमानः सोमः
----------------------	---------------	-------------------

परि द्युक्षः सनद्रयिर्भरद्वाजं नो अन्धसा	सुवानो अर्ष पवित्र आ	॥ 1 ॥
तव प्रत्नेभिरध्वभिरव्यो वारे परि प्रियः	सहस्रधारो यात्तना	॥ 2 ॥
चरुर्न यस्तमीङ्घ्रयेन्द्रो न दानमीङ्घ्रय	वधैर्वधस्त्रवीङ्घ्रय	॥ 3 ॥
नि शुष्ममिन्द्रवेषां पुरुहूत जनानाम्	यो अस्मां आदिदेशति	॥ 4 ॥

शतं न इन्द्र ऊतिभिः सहस्रं वा शुचीनाम् । पवस्व मंहयद्रयिः ॥ 5 ॥
(4) **53** (म.9, अनु.2)

ऋषिः अवत्सारः काश्यपः छन्दः गायत्री देवता पवमानः सोमः

उत्ते शुष्मासो अस्थू रक्षो भिन्दन्तो अद्रिवः । नुदस्व याः परिस्पृधः ॥ 1 ॥
अया निजुग्निरोजसा रथसङ्गे धने हिते । स्तवा अबिभ्युषा हृदा ॥ 2 ॥
अस्य व्रतानि नाधृषे पवमानस्य दूढ्या । रुज यस्त्वा पृतन्यति ॥ 3 ॥
तं हिन्वन्ति मदच्युतं हरिं नदीषु वाजिनम् । इन्दुमिन्द्राय मत्सरम् ॥ 4 ॥
(4) **54** (म.9, अनु.2)

ऋषिः अवत्सारः काश्यपः छन्दः गायत्री देवता पवमानः सोमः

अस्य प्रलामनु द्युतं शुक्रं दुदुहे अह्यः । पर्यः सहस्रसामृषिम् ॥ 1 ॥
अयं सूर्यइवोपृहग्यं सरांसि धावति । सप्त प्रवत् आ दिवम् ॥ 2 ॥
अयं विश्वानि तिष्ठति पुनानो भुव्नोपरि । सोमो देवो न सूर्यः ॥ 3 ॥
परि णो देववीतये वाजाँ अर्षसि गोमतः । पुनान इन्द्रविन्द्रयुः ॥ 4 ॥
(4) **55** (म.9, अनु.2)

ऋषिः अवत्सारः काश्यपः छन्दः गायत्री देवता पवमानः सोमः

यवयवं नो अन्धसा पुष्टपुष्टं परि स्रव । सोम विश्वा च सौभगा ॥ 1 ॥
इन्द्रो यथा तव स्तवो यथा ते जातमन्धसः । नि बर्हिषि प्रिये सदः ॥ 2 ॥
उत नो गोविदंश्ववित्पवस्व सोमान्धसा । मक्षूतमेभिरर्हभिः ॥ 3 ॥
यो जिनाति न जीयते हन्ति शत्रुमभीत्यं । स पवस्व सहस्रजित् ॥ 4 ॥
(4) **56** (म.9, अनु.2)

ऋषिः अवत्सारः काश्यपः छन्दः गायत्री देवता पवमानः सोमः

परि सोमं ऋतं बृहदाशुः पवित्रे अर्षति । विघ्नत्रक्षांसि देव्युः ॥ 1 ॥
यत्सोमो वाजमर्षति शतं धारा अपस्युवः । इन्द्रस्य सख्यमाविशन् ॥ 2 ॥
अभि त्वा योषणो दर्शं जारं न कन्यानुषत । मृज्यसे सोम सातये ॥ 3 ॥
त्वमिन्द्राय विष्णवे स्वादुरिन्द्रो परि स्रव । नृन्तस्तोतृन्पाह्यंहसः ॥ 4 ॥
(4) **57** (म.9, अनु.2)

ऋषिः अवत्सारः काश्यपः छन्दः गायत्री देवता पवमानः सोमः

प्र ते धारा असश्चतो दिवो न यन्ति वृष्टयः । अच्छा वाजं सहस्रिणाम् ॥ 1 ॥
अभि प्रियाणि काव्या विश्वा चक्षाणो अर्षति । हरिस्तुञ्जान आयुधा ॥ 2 ॥
स मर्मज्ञान आयुभिरिभो राजैव सुव्रतः । श्येनो न वंसुं षीदति ॥ 3 ॥
स नो विश्वा दिवो वसूतो पृथिव्या अधि । पुनान इन्द्रवा भर ॥ 4 ॥

(4)

58

(म.9, अनु.2)

ऋषिः अवत्सारः काश्यपः	छन्दः गायत्री	देवता पवमानः सोमः
-----------------------	---------------	-------------------

तरत्स मन्दी धावति धारा सुतस्यान्धसः	तरत्स मन्दी धावति	॥ 1 ॥
उस्ना वेद वसूनां मर्तस्य देव्यवसः	तरत्स मन्दी धावति	॥ 2 ॥
ध्वस्त्रयोः पुरुषन्त्योरा सहस्राणि दद्महे	तरत्स मन्दी धावति	॥ 3 ॥
आ ययोस्त्रिंशत् तना सहस्राणि च दद्महे	तरत्स मन्दी धावति	॥ 4 ॥

(4)

59

(म.9, अनु.2)

ऋषिः अवत्सारः काश्यपः	छन्दः गायत्री	देवता पवमानः सोमः
-----------------------	---------------	-------------------

पवस्व गोजिदश्वजिद्विश्वजित्सोम रण्यजित्	प्रजावद्रत्नमा भर	॥ 1 ॥
पवस्वाद्ध्यो अदाभ्युः पवस्वौषधीभ्यः	पवस्व धिषणाभ्यः	॥ 2 ॥
त्वं सोम पवमानो विश्वानि दुरिता तर	कविः सीदु नि बर्हिषि	॥ 3 ॥
पवमानु स्वर्विदो जायमानोऽभवो महान्	इन्दो विश्वाँ अभीदसि	॥ 4 ॥

(4)

60

(म.9, अनु.2)

ऋषिः अवत्सारः काश्यपः	छन्दः गायत्री 1-2,4 पुरउष्णिक् 3	देवता पवमानः सोमः
-----------------------	----------------------------------	-------------------

प्र गायत्रेण गायत् पवमानं विचर्षणिम्	इन्दुं सहस्रचक्षसम्	॥ 1 ॥
तं त्वा सहस्रचक्षसमथो सहस्रभर्णसम्	अति वारमपाविषुः	॥ 2 ॥
अति वारान्पवमानो असिष्यदत्कलशाँ अभि धावति। इन्द्रस्य हाद्याँविशन्		॥ 3 ॥
इन्द्रस्य सोम राधसे शं पवस्व विचर्षणे	प्रजावद्रेत् आ भर	॥ 4 ॥

(30)

61

(म.9, अनु.3)

ऋषिः अमहीयुः आङ्गिरसः	छन्दः गायत्री	देवता पवमानः सोमः
-----------------------	---------------	-------------------

अया वीती परिं स्रव् यस्त इन्दो मदेष्वा	अवाहन्नवतीर्नव	॥ 1 ॥
पुरः सद्य इत्थाधिये दिवोदासाय शम्बरम्	अध् त्वं तुर्वशं यदुम्	॥ 2 ॥
परिं णो अश्वमश्वविद्वोर्मदिन्दो हिरण्यवत्	क्षरा सहस्रिणीरिषः	॥ 3 ॥
पवमानस्य ते वयं पवित्रमभ्युन्दुतः	सखित्वमा वृणीमहे	॥ 4 ॥
ये ते पवित्रमूर्मयोऽभिक्षरन्ति धारया	तेर्भिनः सोम मृळय	॥ 5 ॥
स नः पुनान आ भर रुयिं वीरवतीमिषम्	ईशानः सोम विश्वतः	॥ 6 ॥
एतमु त्वं दश क्षिपो मृजन्ति सिन्धुमातरम्	समादित्येभिरख्यत	॥ 7 ॥
समिन्द्रेणोत वायुना सुत एति पवित्र आ	सं सूर्यस्य रुश्मिभिः	॥ 8 ॥
स नो भगाय वायवे पूष्णे पवस्व मधुमान्	चारुर्मित्रे वरुणे च	॥ 9 ॥
उच्चा ते जातमन्धसो दिवि षड्भूम्या ददे	उग्रं शर्म महि श्रवः	॥ 10 ॥
एना विश्वान्युर्य आ द्युम्नानि मानुषाणाम्	सिषासन्तो वनामहे	॥ 11 ॥
स न इन्द्राय यज्यवे वरुणाय मरुद्भ्यः	वरिवोवित्परिं स्रव	॥ 12 ॥

उपो षु जातमसुरं गोभिर्भुङ्गं परिष्कृतम्	इन्दुं देवा अयासिषुः	॥ 13 ॥
तमिद्वर्धन्तु नो गिरौ वत्सं संशिश्वरीरिव	य इन्द्रस्य हृदंसनिः	॥ 14 ॥
अर्षा णः सोमं शं गवे धुक्षस्व पिप्युषीमिषम्	वर्धां समुद्रमुक्थ्यम्	॥ 15 ॥
पर्वमानो अजीजनद्विवश्चित्रं न तन्युतुम्	ज्योतिर्वैश्वानरं बृहत्	॥ 16 ॥
पर्वमानस्य ते रसो मदो राजन्नदुच्छुनः	वि वारमव्यमर्षति	॥ 17 ॥
पर्वमान रसस्तव दक्षो वि राजति द्युमान्	ज्योतिर्विश्वं स्वर्दृशे	॥ 18 ॥
यस्ते मदो वरेण्यस्तेना पवस्वान्धसा	देवावीरघशंसहा	॥ 19 ॥
जघ्निर्वृत्रममित्रियं सस्त्रिर्वाजं दिवेदिवे	गोषा उ अश्वसा असि	॥ 20 ॥
संमिश्रो अरुषो भव सूपस्थाभिर्न धेनुभिः	सीदञ्छ्येनो न योनिमा	॥ 21 ॥
स पवस्व य आविथेन्द्रं वृत्राय हन्तवे	वत्रिवांसं महीरुपः	॥ 22 ॥
सुवीरासो वयं धना जयेम सोम मीद्वः	पुनानो वर्ध नो गिरः	॥ 23 ॥
त्वोतासस्तवावसा स्याम वन्वन्त आमुरः	सोमं व्रतेषु जागृहि	॥ 24 ॥
अपघ्नन्पवते मृधोऽप सोमो अराव्यः	गच्छन्निन्द्रस्य निष्कृतम्	॥ 25 ॥
महो नो राय आ भर पर्वमान जही मृधः	रास्वेन्दो वीरवृद्यशः	॥ 26 ॥
न त्वा शतं च न हृतो राधो दित्सन्तमा मिनन्	यत्पुनानो मखस्यसे	॥ 27 ॥
पवस्वेन्दो वृषा सुतः कृधी नो यशसो जने	विश्वा अप द्विषो जहि	॥ 28 ॥
अस्य ते सख्ये वयं तवेन्दो द्युम्र उतमे	सासह्याम पृतन्युतः	॥ 29 ॥
या ते भीमान्यारुधा त्रिगमानि सन्ति धूर्वणे	रक्षा समस्य नो निदः	॥ 30 ॥

(30)

62

(म.9, अनु.3)

ऋषिः जमदग्निः भार्गवः	छन्दः गायत्री	देवता पवमानः सोमः
एते असृग्रमिन्दवस्तिरः पवित्रमाशवः	विश्वान्युभि सौभगा	॥ 1 ॥
विघ्नन्तो दुरिता पुरु सुगा तोकाय वाजिनः	तना कृण्वन्तो अर्वते	॥ 2 ॥
कृण्वन्तो वरिवो गवेऽभ्यर्षन्ति सुष्टुतिम्	इळामस्मभ्यं संयतम्	॥ 3 ॥
असाव्यंशुर्मदायाप्सु दक्षो गिरिष्ठाः	श्येनो न योनिमासदत्	॥ 4 ॥
शुभ्रमन्धो देववातमप्सु धृतो नृभिः सुतः	स्वदन्ति गावः पयोभिः	॥ 5 ॥
आदीमश्वं न हेतारोऽशूशुभन्नमृताय	मध्वो रसं सधमादे	॥ 6 ॥
यास्ते धारा मधुश्चुतोऽसृग्रमिन्द ऊतये	ताभिः पवित्रमासदः	॥ 7 ॥
सो अर्षेन्द्राय पीतये तिरो रोमाण्यव्यया	सीदन् योना वनेष्वा	॥ 8 ॥
त्वमिन्दो परि स्रव स्वादिष्टो अङ्गिरोभ्यः	वरिवोविद्धृतं पर्यः	॥ 9 ॥
अयं विचर्षणिर्हितः पर्वमानः स चैतति	हिन्वान आप्यं बृहत्	॥ 10 ॥
एष वृषा वृषव्रतः पर्वमानो अशस्तिहा	करद्वसूनि दाशुषे	॥ 11 ॥
आ पवस्व सहस्रिणं रयिं गोमन्तमश्विनम्	पुरुश्चन्द्रं पुरुस्पृहम्	॥ 12 ॥

एष स्य परिं षिच्यते मर्मृज्यमान आयुभिः	उरुगायः कविक्रतुः	॥ 13 ॥
सहस्रौतिः शतामघो विमानो रजसः कविः	इन्द्राय पवते मदः	॥ 14 ॥
गिरा जात इह स्तुत इन्दुरिन्द्राय धीयते	वियोनां वसताविव	॥ 15 ॥
पर्वमानः सुतो नृभिः सोमो वाजमिवासरत्	चमूषु शकर्मनासदम्	॥ 16 ॥
तं त्रिपृष्ठे त्रिवन्धुरे रथे युञ्जन्ति यातवे	ऋषीणां सप्त धीतिभिः	॥ 17 ॥
तं सौतारो धनुस्पृतमाशुं वाजाय यातवे	हरिं हिनोत वाजिनम्	॥ 18 ॥
आविशन्कलशं सुतो विश्वा अर्षन्नभि श्रियः	शूरो न गोषु तिष्ठति	॥ 19 ॥
आ तं इन्द्रो मदाय कं पयो दुहन्त्यायवः	देवा देवेभ्यो मधु	॥ 20 ॥
आ नः सोमं पवित्र आ सृजता मधुमत्तमम्	देवेभ्यो देवश्रुत्तमम्	॥ 21 ॥
एते सोमा असृक्षत गृणानाः श्रवसे महे	मदिन्तमस्य धारया	॥ 22 ॥
अभि गव्यानि वीतये नृम्णा पुनानो अर्षसि	सनद्वाजः परिं स्रव	॥ 23 ॥
उत नो गोमतीरिषो विश्वा अर्ष परिष्टुभः	गृणानो जमदग्निना	॥ 24 ॥
पर्वस्व वाचो अग्रियः सोमं चित्राभिरूतिभिः	अभि विश्वानि काव्या	॥ 25 ॥
त्वं समुद्रिया अपोऽग्रियो वाच ईरयन्	पर्वस्व विश्वमेजय	॥ 26 ॥
तुभ्येमा भुवना कवे महिघ्ने सोम तस्थिरे	तुभ्यमर्षन्ति सिन्धवः	॥ 27 ॥
प्र ते दिवो न वृष्टयो धारा यन्त्यसृष्टतः	अभि शुक्रामुपस्तिरम्	॥ 28 ॥
इन्द्रायेन्दुं पुनीतनोग्रं दक्षाय साधनम्	ईशानं वीतिराधसम्	॥ 29 ॥
पर्वमान ऋतः कविः सोमः पवित्रमासदत्	दधत्स्तोत्रे सुवीर्यम्	॥ 30 ॥

(30)

63

(म.9, अनु.3)

ऋषिः निधुविः काश्यपः	छन्दः गायत्री	देवता पवमानः सोमः
आ पर्वस्व सहस्रिणं रथिं सोम सुवीर्यम्	अस्मे श्रवांसि धारय	॥ 1 ॥
इषमूर्जं च पिन्वसु इन्द्राय मत्सरिन्तमः	चमूष्वा नि षीदसि	॥ 2 ॥
सुत इन्द्राय विष्णावे सोमः कलशं अक्षरत्	मधुमाँ अस्तु वायवे	॥ 3 ॥
एते असृग्रमाशवोऽति हरांसि बभ्रवः	सोमा ऋतस्य धारया	॥ 4 ॥
इन्द्रं वर्धन्तो अपुरः कृण्वन्तो विश्वमार्यम्	अपुन्नन्तो अराव्यः	॥ 5 ॥
सुता अनु स्वमा रजोऽभ्यर्षन्ति बभ्रवः	इन्द्रं गच्छन्त इन्दवः	॥ 6 ॥
अया पर्वस्व धारया यया सूर्यमरोचयः	हिन्वानो मानुषीरुपः	॥ 7 ॥
अयुक्त सूर एतशं पर्वमानो मनावधि	अन्तरिक्षेण यातवे	॥ 8 ॥
उत त्या हरितो दश शूरो अयुक्त यातवे	इन्दुरिन्द्र इति ब्रुवन्	॥ 9 ॥
परीतो वायवे सुतं गिर इन्द्राय मत्सरम्	अव्यो वारेषु सिञ्चत	॥ 10 ॥
पर्वमान विदा रथिमस्मभ्यं सोम दुष्टरम्	यो दूणाशो वनुष्यता	॥ 11 ॥

अभ्यर्ष सहस्रिणं रयिं गोमन्तमश्विनम्	अभि वाजमुत श्रवः	॥ 12 ॥
सोमो देवो न सूर्योऽद्रिभिः पवते सुतः	दधानः कलशे रसम्	॥ 13 ॥
एते धामान्यार्या शुक्रा ऋतस्य धारया	वाजं गोमन्तमक्षरन्	॥ 14 ॥
सुता इन्द्राय वज्रिणे सोमासो दध्याशिरः	पवित्रमत्यक्षरन्	॥ 15 ॥
प्र सोमं मधुमत्तमो राये अर्ष पवित्र आ	मद्दो यो देववीतमः	॥ 16 ॥
तमीं मृजन्त्यायवो हरिं नदीषु वाजिनम्	इन्दुमिन्द्राय मत्सरम्	॥ 17 ॥
आ पवस्व हिरण्यवदश्रावत्सोम वीरवत्	वाजं गोमन्तमा भर	॥ 18 ॥
परि वाजे न वाज्युमव्यो वारेषु सिञ्चत	इन्द्राय मधुमत्तमम्	॥ 19 ॥
कविं मृजन्ति मर्ज्यं धीभिर्विप्रा अवस्यवः	वृषा कनिक्रदर्षति	॥ 20 ॥
वृषणं धीभिरमुं सोममृतस्य धारया	मती विप्राः समस्वरन्	॥ 21 ॥
पवस्व देवायुषगिन्द्रं गच्छतु ते मदः	वायुमा रोह धर्माणा	॥ 22 ॥
पवमान् नि तोशसे रयिं सोमं श्रवाय्यम्	प्रियः समुद्रमा विश	॥ 23 ॥
अपघ्नन्वसे मृधः क्रतुवित्सोम मत्सरः	नुदस्वादव्युं जनम्	॥ 24 ॥
पवमाना असृक्षत् सोमाः शुक्रास् इन्दवः	अभि विश्वानि काव्या	॥ 25 ॥
पवमानास आशवः शुभ्रा असृग्मिन्दवः	घन्तो विश्वा अप द्विषः	॥ 26 ॥
पवमाना दिवस्पर्यन्तरिक्षादसृक्षत	पृथिव्या अधि सानवि	॥ 27 ॥
पुनानः सोमं धारयेन्दो विश्वा अप स्त्रिधः	जहि रक्षांसि सुक्रतो	॥ 28 ॥
अपघ्नन्त्सोम रक्षसोऽभ्यर्ष कनिक्रदत्	द्युमन्तं शुष्ममुत्तमम्	॥ 29 ॥
अस्मे वसूनि धारय सोमं दिव्यानि पार्थिवा	इन्दो विश्वानि वार्या	॥ 30 ॥

(30)

64

(म.9, अनु.3)

ऋषिः मारीचः कश्यपः	छन्दः गायत्री	देवता पवमानः सोमः
वृषा सोमं द्युमाँ असि वृषा देव वृषव्रतः	वृषा धर्माणि दधिषे	॥ 1 ॥
वृष्णास्ते वृष्ण्यं शवो वृषा वनं वृषा मदः	सत्यं वृषन्वृषेदसि	॥ 2 ॥
अश्वो न चक्रदो वृषा सं गा इन्दो समर्वतः	वि नो राये दुरो वृधि	॥ 3 ॥
असृक्षत् प्र वाजिनो गव्या सोमासो अश्वया	शुक्रासो वीरयाशवः	॥ 4 ॥
शुम्भमाना ऋतायुभिर्मृज्यमाना गभस्त्योः	पवन्ते वारो अव्ययै	॥ 5 ॥
ते विश्वा द्राशुषे वसु सोमा दिव्यानि पार्थिवा	पवन्तामान्तरिक्ष्या	॥ 6 ॥
पवमानस्य विश्ववित्प्र ते सर्गा असृक्षत	सूर्यस्येव न रश्मयः	॥ 7 ॥
केतुं कृण्वन्दिवस्परि विश्वा रूपाभ्यर्षसि	समुद्रः सोम पिन्वसे	॥ 8 ॥
हिन्वानो वाचमिष्यसि पवमान् विधर्मणि	अक्रान्देवो न सूर्यः	॥ 9 ॥
इन्दुः पविष्ट चेतनः प्रियः कवीनां मती	सृजदश्वं रथीरिव	॥ 10 ॥
ऊर्मिर्यस्ते पवित्र आ देवावीः पर्यक्षरत्	सीदन्नृतस्य योनिमा	॥ 11 ॥

स नो अर्ष पवित्र आ मदो यो देववीतमः	इन्द्रविन्द्राय पीतये	॥ 12 ॥
इषे पवस्व धारया मृज्यमानो मनीषिभिः	इन्द्रो रुचाभि गा इहि	॥ 13 ॥
पुनानो वरिवस्कृध्यूर्जं जनाय गिर्वणः	हरे सृजान आशिरम्	॥ 14 ॥
पुनानो देववीतय इन्द्रस्य याहि निष्कृतम्	द्युतानो वाजिभिर्यतः	॥ 15 ॥
प्र हिन्वानासु इन्द्रवोऽच्छा समुद्रमाशवः	धिया जूता असृक्षत	॥ 16 ॥
मर्मृजानास आयवो वृथा समुद्रमिन्दवः	अगमन्नृतस्य योनिमा	॥ 17 ॥
परि णो याह्यस्मयुर्विश्वा वसून्योजसा	पाहि नः शर्म वीरवत्	॥ 18 ॥
मिमाति वह्निरेतशः पदं युजान ऋक्भिः	प्र यत्समुद्र आहितः	॥ 19 ॥
आ यद्योनिं हिरण्ययमाशुर्ऋतस्य सीदति	जहात्यप्रचेतसः	॥ 20 ॥
अभि वेना अनूषतेयक्षन्ति प्रचेतसः	मञ्जन्त्यविचेतसः	॥ 21 ॥
इन्द्रायेन्दो मरुत्वते पवस्व मधुमत्तमः	ऋतस्य योनिमासदम्	॥ 22 ॥
तं त्वा विप्रा वचोविदुः परिष्कृण्वन्ति वेधसः	सं त्वा मृजन्त्यायवः	॥ 23 ॥
रसं ते मित्रो अर्यमा पिबन्ति वरुणः कवे	पवमानस्य मरुतः	॥ 24 ॥
त्वं सोम विपश्चितं पुनानो वार्चमिष्यसि	इन्द्रो सहस्रभर्णसम्	॥ 25 ॥
उतो सहस्रभर्णसं वार्चं सोम मखस्युवम्	पुनान इन्द्रवा भर	॥ 26 ॥
पुनान इन्द्रवेषां पुरुहूत जनानाम्	प्रियः समुद्रमा विश	॥ 27 ॥
दविद्युतत्या रुचा परिष्टोभन्त्या कृपा	सोमाः शुक्रा गवाशिरः	॥ 28 ॥
हिन्वानो हेतृभिर्यत आ वाजं वाज्यक्रमीत्	सीदन्तो वनुषो यथा	॥ 29 ॥
ऋधक्सौम स्वस्तये संजगमानो दिवः कविः	पवस्व सूर्यो दृशे	॥ 30 ॥

| इति सप्तमाष्टके प्रथमोऽध्यायः समाप्तः ।

(द्वितीयोऽध्यायः ॥ वर्गाः 1-33)

(30)

65

(म.9, अनु.3)

ऋषिः वारुणिः भृगुः भार्गवः जमदग्निः वा	छन्दः गायत्री	देवता पवमानः सोमः
हिन्वन्ति सूरमुस्रयः स्वसारो जामयस्पतिम्	महामिन्दुं महीयुवः	॥ 1 ॥
पवमान रुचारुचा देवो देवेभ्यस्परि	विश्व्वा वसून्या विश	॥ 2 ॥
आ पवमान सुष्टुतिं वृष्टिं देवेभ्यो दुवः	इषे पवस्व संयतम्	॥ 3 ॥
वृषा ह्यसि भानुना द्युमन्तं त्वा हवामहे	पवमान स्वाध्यः	॥ 4 ॥
आ पवस्व सुवीर्यं मन्दमानः स्वायुध	इहो ष्विन्दुवा गहि	॥ 5 ॥
यद्भिः परिषिच्यसे मृज्यमानो गभस्त्योः	द्वुणा सधस्थमश्रुषे	॥ 6 ॥
प्र सोमाय व्यश्वत्पवमानाय गायत	महे सहस्रचक्षसे	॥ 7 ॥
यस्य वर्णं मधुश्रुतं हरिं हिन्वन्त्यद्रिभिः	इन्दुमिन्द्राय पीतये	॥ 8 ॥
तस्य ते वाजिनो वयं विश्वा धनानि जिग्युषः	सखित्वमा वृणीमहे	॥ 9 ॥
वृषा पवस्व धारया मरुत्वते च मत्सरः	विश्व्वा दधान् ओजसा	॥ 10 ॥
तं त्वा धृतरामोण्योः पवमान स्वर्दशम्	हिन्वे वाजेषु वाजिनम्	॥ 11 ॥
अया चित्तो विपानया हरिः पवस्व धारया	युजं वाजेषु चोदय	॥ 12 ॥
आ न इन्दो महीमिषं पवस्व विश्वदर्शतः	अस्मभ्यं सोम गातुवित्	॥ 13 ॥
आ कुलशा अनूषतेन्दो धाराभिरोजसा	एन्द्रस्य पीतये विश	॥ 14 ॥
यस्य ते मद्यं रसं तीव्रं दुहन्त्यद्रिभिः	स पवस्वाभिमातिहा	॥ 15 ॥
राजा मेधाभिरीयते पवमानो मनावधि	अन्तरिक्षेण यातवे	॥ 16 ॥
आ न इन्दो शतग्विनं गवां पोषं स्वर्ध्वम्	वहा भगन्तिमूतये	॥ 17 ॥
आ नः सोम सहो जुवो रूपं न वर्चसे भर	सुष्वाणो देववीतये	॥ 18 ॥
अर्षा सोम द्युमन्तमोऽभि द्रोणानि रोरुवत्	सीदञ्छ्येनो न योनिमा	॥ 19 ॥
अप्सा इन्द्राय वायवे वरुणाय मरुद्भ्यः	सोमो अर्षति विष्णवे	॥ 20 ॥
इषं तोकार्यं नो दधदस्मभ्यं सोम विश्वतः	आ पवस्व सहस्रिणम्	॥ 21 ॥
ये सोमासः परावति ये अर्वावति सुन्विरे	ये वादः शर्यणावति	॥ 22 ॥
य आर्जीकेषु कृत्वसु ये मध्ये पस्त्यानाम्	ये वा जनेषु पञ्चसु	॥ 23 ॥
ते नो वृष्टिं दिवस्परि पवन्तामा सुवीर्यम्	सुवाना देवास इन्दवः	॥ 24 ॥
पवते हर्यतो हरिर्गृणानो जमदग्निना	हिन्वानो गोरधि त्वचि	॥ 25 ॥
प्र शुक्रासो वयोजुवो हिन्वानासो न सप्तयः	श्रीणाना अप्सु मृञ्जत	॥ 26 ॥
तं त्वा सुतेष्वाभुवो हिन्विरे देवतातये	स पवस्वानया रुचा	॥ 27 ॥
आ ते दक्षं मयोभुवं वह्निमद्या वृणीमहे	पान्तमा पुरुस्पृहम्	॥ 28 ॥
आ मन्द्रमा वरेण्यमा विप्रमा मनीषिणम्	पान्तमा पुरुस्पृहम्	॥ 29 ॥

ऋषिः शतं वैखानसाः

छन्दः गायत्री 1-17,19-30, अनुष्टुप् 18

देवता पवमानः

सोमः 1-18,22-30,

अग्निः पवमानः 19-21

पर्वस्व विश्वचर्षणेऽभि विश्वानि काव्या	सखा सखिभ्य ईड्यः	॥ 1 ॥
ताभ्यां विश्वस्य राजसि ये पवमान धामनी	प्रतीची सोम तस्थतुः	॥ 2 ॥
परि धामानि यानि ते त्वं सोमासि विश्वतः	पवमान ऋतुभिः कवे	॥ 3 ॥
पर्वस्व जूनयन्निषोऽभि विश्वानि वार्या	सखा सखिभ्य ऊतये	॥ 4 ॥
तव शुक्रासौ अर्चयो दिवस्पृष्टे वि तन्वते	पवित्रं सोम धामभिः	॥ 5 ॥
तवेमे सप्त सिन्धवः प्रशिषं सोम सिस्त्रते	तुभ्यं धावन्ति धेनवः	॥ 6 ॥
प्र सोम याहि धारया सुत इन्द्राय मत्सुरः	दधानो अक्षिति श्रवः	॥ 7 ॥
समु त्वा धीभिरस्वरन् हिन्वतीः सप्त जामयः	विप्रमाजा विवस्वतः	॥ 8 ॥
मृजन्ति त्वा समग्रुवोऽव्ये जीरावधि प्वणि	रेभो यदज्यसे वने	॥ 9 ॥
पवमानस्य ते कवे वाजिन्त्सर्गा असृक्षत	अर्वन्तो न श्रवस्यवः	॥ 10 ॥
अच्छा कोशं मधुश्रुतमसृग्रं वारं अव्यये	अवावशन्त धीतर्यः	॥ 11 ॥
अच्छा समुद्रमिन्दुवोऽस्तं गावो न धेनवः	अगमन्नृतस्य योनिमा	॥ 12 ॥
प्र ण इन्दो महे रण आपो अर्षन्ति सिन्धवः	यद्गोभिर्वासयिष्यसे	॥ 13 ॥
अस्य ते सख्ये वयमिर्यक्षन्तस्त्वोतयः	इन्दो सखित्वमुश्मसि	॥ 14 ॥
आ पवस्व गविष्टये महे सोम नृचक्षसे	एन्द्रस्य जठरं विश	॥ 15 ॥
महाँ असि सोम ज्येष्ठ उग्राणामिन्दु ओजिष्ठः	युध्वा सञ्छश्चञ्जिगेथ	॥ 16 ॥
य उग्रेभ्यश्चिदोजीयाञ्छूरेभ्यश्चिच्छूरतरः	भूरिदाभ्यश्चिन्मंहीयान्	॥ 17 ॥
त्वं सोम सूर एषस्तोकस्य साता तनूनाम्	वृणीमहे सख्याय वृणीमहे युज्याय	॥ 18 ॥
अग्र आयुषि पवसु आ सुवोर्जमिषं च नः	आरे बाधस्व दुच्छुनाम्	॥ 19 ॥
अग्निर्ऋषिः पवमानः पाञ्चजन्यः पुरोहितः	तमीमहे महागयम्	॥ 20 ॥
अग्रे पवस्व स्वपा अस्मे वर्चः सुवीर्यम्	दधद्रयिं मयि पोषम्	॥ 21 ॥
पवमानो अति स्निधोऽभ्यर्षति सुष्टुतिम्	सूरु न विश्वदर्शतः	॥ 22 ॥
स मर्मज्ञान आयुभिः प्रयस्वान्प्रयसे हितः	इन्दुरत्यो विचक्षणः	॥ 23 ॥
पवमान ऋतं बृहच्छुक्रं ज्योतिरजीजनत्	कृष्णा तमांसि जङ्घनत्	॥ 24 ॥
पवमानस्य जङ्घतो हरेश्चन्द्रा असृक्षत	जीरा अजिरशोचिषः	॥ 25 ॥
पवमानो रथीतमः शुभ्रेभिः शुभ्रशस्तमः	हरिश्चन्द्रो मरुद्गणः	॥ 26 ॥
पवमानो व्यश्रवद्रश्मिभिर्वाजसातमः	दधत्स्तोत्रे सुवीर्यम्	॥ 27 ॥
प्र सुवान इन्दुरक्षाः पवित्रमत्यव्ययम्	पुनान इन्दुरिन्द्रमा	॥ 28 ॥

एष सोमो अधि त्वचि गवां क्रीळत्यद्रिभिः । इन्द्रं मदायु जोहुवत् ॥ 29 ॥
यस्य ते द्युम्वत्पयः पवमानाभृतं दिवः । तेन नो मृळ जीवसे ॥ 30 ॥

(32)

67

(म.9, अनु.3)

ऋषिः बार्हस्पत्यः भरद्वाजः 1-3, कश्यपः मारीचः 4-6, गोतमः राहूगणः 7-9, अत्रिः भौमः 10-12,
गाथिनः विश्वामित्रः 13-15, जमदग्निः भार्गवः 16-18, वसिष्ठः मैत्रावरुणिः 19-21, पवित्रः आङ्गिरसः वा
वसिष्ठः वा उभौ वा 22-32, छन्दः गायत्री 1-15, 19-26, 28-29, नित्यद्विपदा गायत्री 16-18, अनुष्टुप्
27, 31-32, पुरउष्णिक् 30 देवता पवमानः सोमः 1-9, 13-22, 28-30, पवमानः सोमः पवमानः पूषा वा
10-12, पवमानः अग्निः 23-24, पवमानः अग्निः सविता वा 25, पवमानाग्निः सवितारः 26, पवमानः अग्निः
विश्वे देवाः वा 27, पावमान्यध्येता 31-32

त्वं सोमासि धारयुर्मन्द्र ओजिष्ठो अध्वरे । पवस्व मंहयद्रयिः ॥ 1 ॥
त्वं सुतो नृमार्दनो दधन्वान्मत्सुरिन्तमः । इन्द्राय सूरिरन्धसा ॥ 2 ॥
त्वं सुष्वाणो अद्रिभिरुभ्यर्ष कनिक्रदत् । द्युमन्तं शुष्ममुत्तमम् ॥ 3 ॥
इन्दुर्हिन्वानो अर्षति त्तिरो वाराण्यव्यया । हरिर्वाजमचिक्रदत् ॥ 4 ॥
इन्दो व्यव्यमर्षसि वि श्रवांसि वि सौभगा । वि वाजान्तसोम गोमंतः ॥ 5 ॥
आ न इन्दो शतृग्विनं रयिं गोमन्तमश्विनम् । भरां सोम सहस्रिणम् ॥ 6 ॥
पवमानासु इन्दवस्तिरः पवित्रमाशवः । इन्द्रं यामैभिराशत ॥ 7 ॥
कुकुहः सोम्यो रसु इन्दुरिन्द्राय पूर्व्यः । आयुः पवत आयवै ॥ 8 ॥
हिन्वन्ति सूरमुस्रयः पवमानं मधुश्चुतम् । अग्नि गिरा समस्वरन् ॥ 9 ॥
अविता नो अजाश्वः पूषा यामनियामनि । आ भक्षत्कन्यासु नः ॥ 10 ॥
अयं सोमः कपर्दिने घृतं न पवते मधु । आ भक्षत्कन्यासु नः ॥ 11 ॥
अयं त आघृणे सुतो घृतं न पवते शुचि । आ भक्षत्कन्यासु नः ॥ 12 ॥
वाचो जन्तुः कवीनां पवस्व सोम धारया । देवेषु रत्नधा असि ॥ 13 ॥
आ कलशेषु धावति श्येनो वर्म वि गाहते । अग्नि द्रोणा कनिक्रदत् ॥ 14 ॥
परि प्र सोम ते रसोऽसर्जि कलशै सुतः । श्येनो न त्तको अर्षति ॥ 15 ॥
पवस्व सोम मन्दयन्निन्द्राय मधुमत्तमः ॥ 16 ॥
असृग्रन् देववीतये वाजयन्तो रथाइव ॥ 17 ॥
ते सुतासो मदिन्तमाः शुक्रा वायुमसृक्षत ॥ 18 ॥
ग्राव्यां तुन्नो अग्निष्टुतः पवित्रं सोम गच्छसि । दधत्स्तोत्रे सुवीर्यम् ॥ 19 ॥
एष तुन्नो अग्निष्टुतः पवित्रमति गाहते । रक्षोहा वारमव्ययम् ॥ 20 ॥
यदन्ति यच्च दूरके भयं विन्दति मामिह । पवमान् वि तज्जहि ॥ 21 ॥
पवमानः सो अद्य नः पवित्रेण विचर्षणिः । यः पोता स पुनातु नः ॥ 22 ॥
यत्तं पवित्रमर्चिष्यग्रे विततमन्तरा । ब्रह्म तेन पुनीहि नः ॥ 23 ॥

यत्ते पवित्रमर्चिर्वदग्रे तेने पुनीहि नः	ब्रह्मसवैः पुनीहि नः	॥ 24 ॥
उभाभ्यां देव सवितः पवित्रेण सवेन च	मां पुनीहि विश्वतः	॥ 25 ॥
त्रिभिष्ट्वं देव सवितर्वर्षिष्ठैः सोम धामभिः	अग्रे दक्षैः पुनीहि नः	॥ 26 ॥
पुनन्तु मां देवजनाः पुनन्तु वसवो धिया	विश्वे देवाः पुनीत मा जातवेदः पुनीहि मां	॥ 27 ॥
प्र प्यायस्व प्र स्यन्दस्व सोम विश्वेभिरंशुभिः	देवेभ्य उत्तमं हविः	॥ 28 ॥
उप प्रियं पनिप्रतं युवानमाहुतीवृधम्	अगन्म बिभ्रतो नमः	॥ 29 ॥
अलाय्यस्य परशुर्ननाश तमा पवस्व देव सोम	आखुं चिदेव देव सोम	॥ 30 ॥
यः पावमानीरुध्येत्यृषिभिः संभृतं रसम्	सर्वं स पूतमश्नाति स्वदितं मातरिश्वना	॥ 31 ॥
पावमानीर्यो अध्येत्यृषिभिः संभृतं रसम्	तस्मै सरस्वती दुहे क्षीरं सर्पिर्मधूदुकम्	॥ 32 ॥

(10)

68

(म.9, अनु.4)

ऋषिः वत्सप्रिः भालन्दनः	छन्दः जगती 1-9, त्रिष्टुप् 10	देवता पवमानः सोमः
-------------------------	-------------------------------	-------------------

प्र देवमच्छा मधुमन्त इन्दुवोऽसिष्यदन्त गाव आ न धेनवः	
बर्हिषदो वचनावन्त ऊर्धभिः परिस्रुतमुस्त्रिया निर्णिजं धिरे	॥ 1 ॥
स रोरुवद्भि पूर्वा अचिक्रददुपारुहः श्रथयन्त्स्वादते हरिः	
तिरः पवित्रं परियन्नुरु ज्रयो नि शर्याणि दधते देव आ वरम्	॥ 2 ॥
वि यो ममे यम्या संयती मदः साकुंवृधा पर्यसा पिन्वदक्षिता	
मही अपारे रजसी विवेविददभिर्व्रजन्नक्षितं पाज आ ददे	॥ 3 ॥
स मातरा विचरन्वाजयन्नपः प्र मेधिरः स्वधया पिन्वते पदम्	
अंशुर्यवेन पिपिशे यतो नृभिः सं जामिभिर्नसते रक्षते शिरः	॥ 4 ॥
सं दक्षेण मनसा जायते क्विर्ऋतस्य गर्भो निहितो यमा पुरः	
यूना ह सन्ता प्रथमं वि जज्ञतुर्गुहा हितं जनिम् नेममुद्यतम्	॥ 5 ॥
मन्द्रस्य रूपं विविदुर्मनीषिणः श्येनो यदन्धो अभरत्परावतः	
तं मर्जयन्त सुवृधं नदीष्वा उशन्तमंशुं परियन्तमृगमियम्	॥ 6 ॥
त्वां मृजन्ति दश योषणः सुतं सोम ऋषिभिर्मतिभिर्धीतिभिर्हितम्	
अव्यो वारैभिरुत देवहूतिभिर्नृभिर्यतो वाजुमा दर्षि सातये	॥ 7 ॥
परिप्रयन्तं व्य्यं सुषंसदं सोमं मनीषा अभ्यनूषत् स्तुभः	
यो धारया मधुमां ऊर्मिणा दिव इयति वाचं रयिषाळमर्त्यः	॥ 8 ॥
अयं दिव इयति विश्वमा रजः सोमः पुनानः कलशेषु सीदति	
अद्भिर्गोभिर्मृज्यते अद्रिभिः सुतः पुनान इन्दुर्वरिवो विदत्प्रियम्	॥ 9 ॥
एवा नः सोम परिषिच्यमानो वयो दधच्चित्रतमं पवस्व	
अद्वेषे द्यावापृथिवी हुवेम देवा धत्त रयिमुस्मे सुवीरम्	॥ 10 ॥

ऋषिः हिरण्यस्तूपः आङ्गिरसः

छन्दः जगती 1-8, त्रिष्टुप् 9-10

देवता पवमानः सोमः

इषुर्न धन्वन् प्रति धीयते मतिर्वत्सो न मातुरुपं सृज्यूर्धनि	
उरुधारेव दुहे अग्रं आयत्यस्य व्रतेष्वपि सोमं इष्यते	॥ 1 ॥
उपो मतिः पृच्यते सिच्यते मधु मन्द्रार्जनी चोदते अन्तरासनि	
पवमानः संतनिः प्रघ्नतामिव मधुमान्द्रप्सः परि वारमर्षति	॥ 2 ॥
अव्यं वधूयुः पवते परि त्वचि श्रुधीते नृमीरदितेऋतं यते	
हरिरक्रान् यजतः संयतो मदो नृम्णा शिशानो महिषो न शोभते	॥ 3 ॥
उक्षा मिमाति प्रति यन्ति धेनवो देवस्य देवीरुपं यन्ति निष्कृतम्	
अत्यक्रमीदर्जुनं वारमव्ययमत्कं न नितं परि सोमो अव्यत	॥ 4 ॥
अमृक्तेन रुशता वाससा हरिरमर्त्यो निर्णिजानः परि व्यत	
दिवस्पृष्टं बर्हणा निर्णिजे कृतोपस्तरणं चम्बोर्नभस्मयम्	॥ 5 ॥
सूर्यस्येव रश्मयो द्रावयिन्वो मत्सुरासः प्रसुपः साकमीरते	
तन्तुं ततं परि सर्गास आशवो नेन्द्रादृते पवते धाम किं चन	॥ 6 ॥
सिन्धोरिव प्रवणे निम्न आशवो वृषच्युता मदासो गातुमाशत	
शं नो निवेशे द्विपदे चतुष्पदेऽस्मे वाजाः सोम तिष्ठन्तु कृष्टयः	॥ 7 ॥
आ नः पवस्व वसुमद्विरण्यवदश्वावद्गोमद्यवमत्सुवीर्यम्	
यूयं हि सोम पितरो मम स्थनं दिवो मूर्धानः प्रस्थिता वयस्कृतः	॥ 8 ॥
एते सोमाः पवमानासु इन्द्रं रथाइव प्र ययुः सातिमच्छं	
सुताः पवित्रमति यन्त्यव्यं हित्वी वृत्रि हरितो वृष्टिमच्छं	॥ 9 ॥
इन्दुविन्द्राय बृहते पवस्व सुमृळीको अनवद्यो रिशादाः	
भरा चन्द्राणि गृणते वसूनि देवैर्द्यावापृथिवी प्रावतं नः	॥ 10 ॥

ऋषिः रेणुः वैश्वामित्रः

छन्दः जगती 1-9, त्रिष्टुप् 10

देवता पवमानः सोमः

त्रिरस्मै सप्त धेनवो दुदुहे सत्यामाशिरं पूर्व्ये व्योमनि	
चत्वार्यन्या भुवनानि निर्णिजे चारुणि चक्रे यदृतेरवर्धत	॥ 1 ॥
स भिक्षमाणो अमृतस्य चारुण उभे द्यावा काव्येना वि शश्रथे	
तेजिष्ठा अपो मंहना परि व्यत् यदी देवस्य श्रवसा सदो विदुः	॥ 2 ॥
ते अस्य सन्तु केतवोऽमृत्यवोऽदाभ्यासो जनुषी उभे अनु	
येभिर्नृम्णा च देव्या च पुनत आदिद्राजानं मनना अगृभ्णत	॥ 3 ॥
स मृज्यमानो दशभिः सुकर्माभिः प्र मध्यमासु मातृषु प्रमे सचा	
व्रतानि पानो अमृतस्य चारुण उभे नृचक्षा अनु पश्यते विशौ	॥ 4 ॥

स मर्मजान इन्द्रियाय धायसु ओभे अन्ता रोदसी हर्षते हितः |
 वृषा शुष्मैण बाधते वि दुर्मतीरादेदिशानः शर्यहेव शुरुधः || 5 ||
 स मातरा न ददृशान उस्त्रियो नानददेति मरुतामिव स्वनः |
 जानन्नृतं प्रथमं यत्स्वर्णरं प्रशस्तये कर्मवृणीत सुक्रतुः || 6 ||
 रुवति भीमो वृषभस्ताविष्यया शृङ्गे शिशानो हरिणी विचक्षणः |
 आ योनिं सोमः सुकृतं नि षीदति गव्ययी त्वग्भवति निर्णिगव्ययी || 7 ||
 शुचिः पुनानस्तन्वमरेपसमव्ये हरिर्न्यधाविष्ट सानवि |
 जुष्टो मित्राय वरुणाय वायवे त्रिधातु मधु क्रियते सुकर्माभिः || 8 ||
 पवस्व सोम देववीतये वृषेन्द्रस्य हार्दिं सोमधानमा विश |
 पुरा नो ब्राधाद्दुरितातिं पारय क्षेत्रविद्धि दिश आहा विपृच्छते || 9 ||
 हितो न सप्तिरभि वाजमर्षेन्द्रस्येन्दो जठरमा पवस्व |
 नावा न सिन्धुमतिं पर्षि विद्वाञ्छूरो न युध्यन्नव नो निदः स्पः || 10 ||

(9)

71

(म.9, अनु.4)

ऋषिः ऋषभः वैश्वामित्रः

छन्दः जगती 1-8, त्रिष्टुप् 9

देवता पवमानः सोमः

आ दक्षिणा सृज्यते शुष्म्याऽसदं वेति द्रुहो रुक्षसः पाति जागृविः |
 हरिरोपशं कृणुते नभस्पय उपस्तिरे चम्बोऽर्ब्रह्म निर्णिजे || 1 ||
 प्र कृष्टिहेव शूष एति रोरुवदसुर्यं वर्णं नि रिणीते अस्य तम् |
 जहाति वृत्रि पितुरेति निष्कृतमुपप्रुतं कृणुते निर्णिजं तना || 2 ||
 अद्रिभिः सुतः पवते गर्भस्त्योर्वृषायते नभसा वेपते मती |
 स मोदते नसते साधते गिरा नैन्तिके अप्सु यजते परीमणि || 3 ||
 परि द्युक्षं सहसः पर्वतावृधं मध्वः सिञ्चन्ति हर्म्यस्य सक्षणिम् |
 आ यस्मिन्नावः सुहुताद् ऊर्धनि मूर्धञ्छ्रीणन्त्यग्रियं वरीमभिः || 4 ||
 समी रथं न भुरिजोरहेषत् दश स्वसारो अदितेरुपस्थ आ |
 जिगादुपं ज्रयति गोरपीच्यं पदं यदस्य मतुथा अजीजनन् || 5 ||
 श्येनो न योनिं सदनं धिया कृतं हिरण्ययमासदं देव एषति |
 ए रिणन्ति बर्हिषि प्रियं गिराश्वो न देवां अप्येति यज्ञियः || 6 ||
 परा व्यक्तो अरुषो दिवः क्विवर्षा त्रिपृष्ठो अनविष्ट गा अभि |
 सहस्रणीतिर्यतिः परायतीं रेभो न पूर्वोरुषसो वि राजति || 7 ||
 त्वेषं रूपं कृणुते वर्णो अस्य स यत्राशयत्समृता सेधति सिधः |
 अप्सा याति स्वधया दैव्यं जनं सं सुष्टुती नसते सं गोअग्रया || 8 ||
 उक्षेवं यूथा परियन्नरावीदधि त्विषीरधित् सूर्यस्य |
 दिव्यः सुपर्णोऽव चक्षत् क्षां सोमः परि क्रतुना पश्यते जाः || 9 ||

ऋषिः हरिमन्तः आङ्गिरसः

छन्दः जगती

देवता पवमानः सोमः

हरिं मृजन्त्यरुषो न युज्यते सं धेनुभिः कलशे सोमो अज्यते	
उद्वाचमीरयति हिन्वते मती पुरुष्टुतस्य कति चित्परिप्रियः	॥ 1 ॥
साकं वदन्ति बहवो मनीषिण इन्द्रस्य सोमं जठरे यदादुहुः	
यदी मृजन्ति सुगभस्तयो नरः सनीळाभिर्दशभिः काम्यं मधु	॥ 2 ॥
अरममाणो अत्येति गा अभि सूर्यस्य प्रियं दुहितुस्तिरो रवम्	
अन्वस्मै जोषमभरद्विनंगृसः सं द्वयीभिः स्वसृभिः क्षेति जामिभिः	॥ 3 ॥
नृधूतो अद्रिषुतो बर्हिषि प्रियः पतिर्गवां प्रदिव इन्दुर्ऋत्विजः	
पुरंधिवान्मनुषो यज्ञसार्धनः शुचिर्धिया पवते सोम इन्द्र ते	॥ 4 ॥
नृबाहुभ्यां चोदितो धारया सुतोऽनुष्वधं पवते सोम इन्द्र ते	
आप्राः क्रतुन्त्समजैरध्वरे मतीर्वेन द्रुषञ्चम्वोऽरासदद्धरिः	॥ 5 ॥
अंशुं दुहन्ति स्तनयन्तमक्षितं कविं क्वयोऽपसो मनीषिणः	
समी गावो मतयो यन्ति संयत ऋतस्य योना सदाने पुनर्भुवः	॥ 6 ॥
नाभा पृथिव्या धरुणो महो दिवोऽपामूर्मो सिन्धुष्वन्तरिक्षितः	
इन्द्रस्य वज्रो वृषभो विभूर्वसुः सोमो हृदे पवते चारु मत्सरः	॥ 7 ॥
स तू पवस्व परि पार्थिवं रजः स्तोत्रे शिक्षन्नाधून्वते च सुक्रतो	
मा नो निर्भाग्वसुनः सादनुस्पृशो रयिं पिशङ्गं बहुलं वसीमहि	॥ 8 ॥
आ तू न इन्दो शतदात्वश्व्यं सहस्रदातु पशुमद्धिरण्यवत्	
उप मास्व बृहती रेवतीरिषोऽधि स्तोत्रस्य पवमान नो गहि	॥ 9 ॥

ऋषिः पवित्रः आङ्गिरसः

छन्दः जगती

देवता पवमानः सोमः

स्रक्के द्रप्सस्य धमतः समस्वरवृतस्य योना समरन्त नाभयः	
त्रीन्त्स मूर्धो असुरश्चक्र आरभे सत्यस्य नावः सुकृतमपीपरन्	॥ 1 ॥
सुम्यक् सुम्यञ्चो महिषा अहेषत् सिन्धोरूर्मावधि वेना अवीविपन्	
मधोर्धाराभिर्जनयन्तो अर्कमित्त्रियामिन्द्रस्य तन्वमवीवृधन्	॥ 2 ॥
पवित्रवन्तः परि वाचमासते पितैषां प्रलो अभि रक्षति व्रतम्	
महः समुद्रं वरुणस्तिरो दधे धीरा इच्छेकुर्धरुणेष्वारभम्	॥ 3 ॥
सहस्रधारेऽव ते समस्वरन्दिवो नाके मधुजिह्वा असुश्रतः	
अस्य स्पशो न नि मिषन्ति भूर्णयः पदेपदे पाशिनः सन्ति सेतवः	॥ 4 ॥
पितुर्मातुरध्या ये समस्वरवृचा शोचन्तः संदहन्तो अब्रतान्	

इन्द्रद्विष्टामपं धमन्ति मायया त्वचमसिक्रीं भूमनो दिवस्परि	॥ 5 ॥
प्रवान्मानादध्या ये समस्वरञ्छ्लोकयन्त्रासो रभसस्य मन्तवः	
अपान्क्षासो बधिरा अहासत ऋतस्य पन्थां न तरन्ति दुष्कृतः	॥ 6 ॥
सहस्रधारे वितते पवित्र आ वाचं पुनन्ति कवयो मनीषिणः	
रुद्रास एषामिषिरासो अद्बुहः स्पशः स्वञ्चः सुदृशो नृचक्षसः	॥ 7 ॥
ऋतस्य गोपा न दभाय सुक्रतुस्त्री ष पवित्रा हृद्यन्तरा दधे	
विद्वान्त्स विश्वा भुवनाभि पश्यत्यवाजुष्टान् विध्यति कर्ते अब्रतान्	॥ 8 ॥
ऋतस्य तन्तुर्विततः पवित्र आ जिह्वाया अग्रे वरुणस्य मायया	
धीराश्चित्तस्मिन्क्षन्त आशतात्रा कर्तमव पदात्यप्रभुः	॥ 9 ॥

(9)

74

(म.9, अनु.4)

ऋषिःकक्षीवान् दैर्घतमसः

छन्दः जगती 1-7,9, त्रिष्टुप् 8

देवता पवमानः सोमः

शिशुर्न जातोऽव चक्रद्वने स्वर्श्यद्वाज्यरुषः सिषासति	
दिवो रेतसा सचते पयोवृधा तमीमहे सुमती शर्म सप्रथः	॥ 1 ॥
दिवो यः स्कम्भो धरुणः स्वातत् आपूर्णो अंशुः पर्यति विश्वतः	
सेमे मही रोदसी यक्षदावृता समीचीने दाधार समिषः कविः	॥ 2 ॥
महि प्सरः सुकृतं सोम्यं मधूर्वा गव्यूतिरदितेऋतं यते	
ईशे यो वृष्टेरित उस्त्रियो वृषापां नेता य इतर्कतिऋग्मियः	॥ 3 ॥
आत्मन्वन्नभो दुह्यते घृतं परं ऋतस्य नाभिरमृतं वि जायते	॥
समीचीनाः सुदानवः प्रीणन्ति तं नरो हितमव मेहन्ति परवः	॥ 4 ॥
अरावीदंशुः सचमान ऊर्मिणा देवाव्यं मनुषे पिन्वति त्वचम्	
दधाति गर्भमदितेरुपस्थ आ येन तोकं च तनयं च धामहे	॥ 5 ॥
सहस्रधारेऽव ता असञ्चतस्तृतीये सन्तु रजसि प्रजावतीः	
चतस्रो नाभो निर्हिता अ्वो दिवो हविर्भरन्त्यमृतं घृतश्चुतः	॥ 6 ॥
श्वेतं रूपं कृणुते यत्सिषासति सोमो मीढ्वं असुरो वेद भूमनः	
धिया शमी सचते सेमभि प्रवद्विस्वकवन्धमव दर्षदुद्रिणम्	॥ 7 ॥
अध श्वेतं कलशं गोभिरक्तं कार्ष्मन्ना वाज्यक्रमीत् ससवान्	
आ हिन्विरे मनसा देवयन्तः कक्षीवते शतहिमाय गोनाम्	॥ 8 ॥
अद्भिः सोम पृचानस्य ते रसोऽव्यो वारं वि पवमान धावति	
स मृज्यमानः क्विभिर्मदित्तम् स्वदस्वेन्द्राय पवमान पीतये	॥ 9 ॥

ऋषिः कविः भार्गवः

छन्दः जगती

देवता पवमानः सोमः

अ॒भि प्रि॒याणि॑ प॒वते॑ च॒नो॑हि॒तो ना॒मानि॑ य॒हो अ॒धि॒ येषु॑ वर्धते ।
 आ सूर्य॑स्य बृ॒हतो॑ बृ॒हन्न॑धि॒ रथं॑ वि॒ष्वञ्च॑म॒रुह॑द्वि॒चक्ष॑णः ॥ 1 ॥
 ऋ॒तस्य॑ जि॒ह्वा प॑वते॒ मधु॑ प्रि॒यं व॒क्ता प॑ति॒र्धियो॑ अ॒स्या अ॒दा॒भ्यः ।
 द॒धाति॑ पु॒त्रः पि॒त्रोरे॑पी॒च्यंश्च॑ नाम॒ तृती॑यमधि॒ रोच॑ने दि॒वः ॥ 2 ॥
 अ॒व॑ द्यु॒तानः॑ क॒लशाँ॑ अ॒चि॒क्रद॑न्वृ॒र्भिर्ये॑मा॒नः को॒श आ॑ हि॒र॒ण्यये॑ ।
 अ॒भीमृ॑तस्य॒ दोह॑ना॒ अनू॑ष॒ताधि॑ त्रि॒पृष्ठ॑ उ॒षसो॑ वि॒ रा॒जति॑ ॥ 3 ॥
 अ॒द्रि॒भिः सु॒तो म॒तिभि॑श्च॒नो॑हि॒तः प्र॒रोच॑य॒न्नोद॑सी॒ मा॒तरा॑ शु॒चिः ।
 रो॒मा॒ण्यव्या॑ स॒मया॑ वि॒ धा॑वति॒ मधो॑र्धा॒रा पि॒न्व॑मा॒ना दि॒वेदि॑वे ॥ 4 ॥
 परि॑ सो॒म प्र॑ ध॒न्वा स्व॑स्तये॒ नृभिः॑ पु॒नानो॑ अ॒भि वा॑स॒याशि॑र॒म् ।
 ये ते॒ मदा॑ आ॒ह॒नसो॑ वि॒हाय॑स॒स्तोभि॑रि॒न्द्रं चो॑दय॒ दा॒त॒वे म॒घम् ॥ 5 ॥

। इति सप्तमाष्टके द्वितीयोऽध्यायः समाप्तः ।

(तृतीयोऽध्यायः ॥ वर्गाः 1-26)

(5)

76

(म.9, अनु.4)

ऋषिः कविः भार्गवः	छन्दः जगती	देवता पवमानः सोमः
-------------------	------------	-------------------

धृता दिवः पवते कृत्व्यो रसो दक्षो देवानामनुमाद्यो नृभिः	
हरिः सृजानो अत्यो न सत्वाभिर्वृथा पाजांसि कृणुते नदीष्व्वा	॥ 1 ॥
शूरो न धत्त आयुधा गभस्त्योः स्वशः सिषासन्नथिरो गविष्टिषु	
इन्द्रस्य शुष्ममीरयन्नपस्युभिरिन्दुहिन्वानो अज्यते मनीषिभिः	॥ 2 ॥
इन्द्रस्य सोम पवमान ऊर्मिणां तविष्यमाणो जठरेष्व्वा विश	
प्र णः पिन्व विद्युदध्रेव रोदसी धिया न वाजाँ उप मासि शश्वतः	॥ 3 ॥
विश्वस्य राजा पवते स्वर्दश ऋतस्य धीतिमृषिषाळवीवशत्	
यः सूर्यस्यासिरेण मृज्यते पिता मतीनामसमष्टकाव्यः	॥ 4 ॥
वृषेव यूथा परि कोशमर्षस्यपामुपस्थे वृषभः कर्निक्रदत्	
स इन्द्राय पवसे मत्सरिन्तमो यथा जेषाम समिथे त्वोतयः	॥ 5 ॥

(5)

77

(म.9, अनु.4)

ऋषिः कविः भार्गवः	छन्दः जगती	देवता पवमानः सोमः
-------------------	------------	-------------------

एष प्र कोशे मधुमाँ अचिक्रददिन्द्रस्य वज्रो वपुषो वपुष्टरः	
अभीमृतस्य सुदुघा घृतश्चुतो वाश्रा अर्षन्ति पर्यसेव धेनवः	॥ 1 ॥
स पूर्व्यः पवते यं दिवस्परि श्येनो मथायदिषितस्तिरो रजः	
स मध्व आ युवते वेविजान इत्कृशानोरस्तुर्मनसाह बिभ्युषा	॥ 2 ॥
ते नः पूर्वास उपरास इन्द्रो महे वाजाय धन्वन्तु गोमते	
ईक्षेण्यासो अह्योऽ न चारवो ब्रह्मब्रह्म ये जुजुषुर्हविर्हीविः	॥ 3 ॥
अयं नो विद्वान् वनवद्वनुष्युत इन्दुः सत्राचा मनसा पुरुष्टुतः	
इनस्य यः सदने गर्भमादधे गवामुरुब्जमभ्यर्षति व्रजम्	॥ 4 ॥
चक्रिदिवः पवते कृत्व्यो रसो म्हाँ अदब्धो वरुणो हुरुग्यते	
असावि मित्रो वृजनेषु यज्ञियोऽत्यो न यूथे वृषयुः कर्निक्रदत्	॥ 5 ॥

(5)

78

(म.9, अनु.4)

ऋषिः कविः भार्गवः	छन्दः जगती	देवता पवमानः सोमः
-------------------	------------	-------------------

प्र राजा वाचं जनयन्नसिष्यददुपो वसानो अभि गा इयक्षति	
गृष्णाति रिप्रमविरस्य तान्वा शुद्धो देवानामुप याति निष्कृतम्	॥ 1 ॥
इन्द्राय सोम परि षिच्यसे नृभिर्नृचक्षा ऊर्मिः क्विरज्यसे वने	

पूर्वाहिं ते सुतयुः सन्ति यातवे सहस्रमश्वः हरयश्चमूषदः	॥ 2 ॥
समुद्रिया अप्सरसो मनीषिण्मासीना अन्तरभि सोममक्षरन्	
ता ईं हिन्वन्ति हर्म्यस्य सक्षणिं याचन्ते सुम्रं पवमानमक्षितम्	॥ 3 ॥
गोजिन्नः सोमो रथजिद्धिरण्यजित्स्वर्जिदुब्जित्पवते सहस्रजित्	
यं देवासश्चक्रिरे पीतये मदं स्वादिष्ठं द्रप्समरुणं मयोभुवम्	॥ 4 ॥
एतानि सोम पवमानो अस्मयुः सत्यानि कृण्वन् द्रविणान्यर्षसि	
जहि शत्रुमन्तिके दूरके च य उर्वो गव्यूतिमभयं च नस्कृधि	॥ 5 ॥

(5)

79

(म.9, अनु.4)

ऋषिः कविः भार्गवः	छन्दः जगती	देवता पवमानः सोमः
-------------------	------------	-------------------

अचोदसो नो धन्वन्त्विन्दवः प्र सुवानासो बृहद्विषेषु हरयः	
वि च नशन्न इषो अरातयोऽर्यो नशन्तु सनिषन्त नो धियः	॥ 1 ॥
प्र णो धन्वन्त्विन्दवो मदच्युतो धना वा येभिरर्वतो जुनीमसि	
तिरो मर्तस्य कस्य चित्परिहृतिं वयं धनानि विश्वधा भरेमहि	॥ 2 ॥
उत स्वस्या अरात्या अरिहिं ष उतान्यस्या अरात्या वृको हि षः	
धन्वन्न तृष्णा समरीत् तां अभि सोम जहि पवमान दुराध्यः	॥ 3 ॥
दिवि ते नाभा परमो य आददे पृथिव्यास्ते रुरुहुः सानवि क्षिपः	
अद्रयस्त्वा बप्सति गोरधिं त्वच्यंस्सु त्वा हस्तैर्दुहुर्मनीषिणः	॥ 4 ॥
एवा त इन्दो सुभ्वं सुपेशंसं रसं तुञ्जन्ति प्रथमा अभिश्रियः	
निदंनिदं पवमान नि तारिष आविस्ते शुष्मो भवतु प्रियो मदः	॥ 5 ॥

(5)

80

(म.9, अनु.4)

ऋषिः वसुः भारद्वाजः	छन्दः जगती	देवता पवमानः सोमः
---------------------	------------	-------------------

सोमस्य धारा पवते नृचक्षस ऋतेन देवान् हवते दिवस्परि	
बृहस्पते र्वथेना वि दिद्युते समुद्रासो न सर्वनानि विव्यचुः	॥ 1 ॥
यं त्वा वाजिन्नध्या अभ्यनूषतायोहत्तं योनिमा रोहसि द्युमान्	
मघोनामार्युः प्रतिरन् महि श्रव इन्द्राय सोम पवसे वृषा मदः	॥ 2 ॥
एन्द्रस्य कुक्षा पवते म्दिन्तम् ऊर्जं वसानः श्रवसे सुमङ्गलः	
प्रत्यङ् स विश्वा भुवनाभि पप्रथे क्रीळन् हरिरत्यः स्यन्दते वृषा	॥ 3 ॥
तं त्वा देवेभ्यो मधुमत्तमं नरः सहस्रधारं दुहते दश क्षिपः	
नृभिः सोम प्रच्युतो ग्रावभिः सुतो विश्वान् देवाँ आ पवस्वा सहस्रजित्	॥ 4 ॥
तं त्वा हस्तिनो मधुमन्तमर्द्रिभिर्दुहन्त्यप्सु वृषभं दश क्षिपः	
इन्द्रं सोम मादयन् दैव्यं जनं सिन्धोरिवोर्मिः पवमानो अर्षसि	॥ 5 ॥

(5)

81

(म.9, अनु.4)

ऋषिः वसुः भारद्वाजः

छन्दः जगती 1-4, त्रिष्टुप् 5

देवता पवमानः सोमः

प्र सोमस्य पवमानस्योर्मय इन्द्रस्य यन्ति जठरं सुपेशसः |
 दध्ना यदीमुन्नीता यशसा गवां दानाय शूरमुदमन्दिषुः सुताः || 1 ||
 अच्छा हि सोमः कलशां असिष्यदुदत्यो न वोळ्हा रघुवर्तनिर्वृषा |
 अथा देवानामुभयस्य जन्मनो विद्वां अश्रोत्यमुत इतश्च यत् || 2 ||
 आ नः सोम पवमानः किरा वस्विन्दो भव मघवा राधसो महः |
 शिक्षा वयोधो वसवे सु चेतुना मा नो गयमारे अस्मत्परा सिचः || 3 ||
 आ नः पूषा पवमानः सुरातयो मित्रो गच्छन्तु वरुणः सजोषसः |
 बृहस्पतिर्मरुतो वायुरश्विना त्वष्टा सविता सुयमा सरस्वती || 4 ||
 उभे द्यावापृथिवी विश्वमिन्वे अर्यमा देवो अदितिर्विधाता |
 भगो नृशंस उर्वन्तरिक्षं विश्वे देवाः पवमानं जुषन्त || 5 ||

(5)

82

(म.9, अनु.4)

ऋषिः वसुः भारद्वाजः

छन्दः जगती 1-4, त्रिष्टुप् 5

देवता पवमानः सोमः

असावि सोमो अरुषो वृषा हरी राजेव दुस्मो अभि गा अचिक्रदत् |
 पुनानो वारं पर्येत्यव्ययं श्येनो न योनिं घृतवन्तमासदम् || 1 ||
 क्विवेधस्या पर्येषि माहिन्मत्यो न मृष्टो अभि वाजमर्षसि |
 अप्सेधन्दुरिता सोम मृळ्य घृतं वसानः परि यासि निर्णिजम् || 2 ||
 पर्जन्यः पिता महिषस्य पर्णिनो नाभा पृथिव्या गिरिषु क्षयं दधे |
 स्वसार आपो अभि गा उतासरन्तसं ग्रावभिर्नसते वीते अध्वरे || 3 ||
 जायेव पत्यावधि शेवं मंहसे पज्राया गर्भं शृणुहि ब्रवीमि ते |
 अन्तर्वाणीषु प्र चरा सु जीवसेऽनिन्द्यो वृजनै सोम जागृहि || 4 ||
 यथा पूर्वेभ्यः शतसा अमृधः सहस्रसाः पर्यया वाजमिन्दो |
 एवा पवस्व सुविताय नव्यसे तव व्रतमन्वापः सचन्ते || 5 ||

(5)

83

(म.9, अनु.4)

ऋषिः पवित्रः आङ्गिरसः

छन्दः जगती

देवता पवमानः सोमः

पवित्रं ते विततं ब्रह्मणस्पते प्रभुर्गात्राणि पर्येषि विश्वतः |
 अतप्ततनूनं तदामो अश्रुते शृतासु इद्वहन्तस्तत्समाशत || 1 ||
 तपोषुपवित्रं विततं दिवस्पदे शोचन्तो अस्य तन्तवो व्यस्थिरन् |
 अवन्त्यस्य पवीतारमाशवो दिवस्पृष्ठमधि तिष्ठन्ति चेतसा || 2 ||
 अरुरुचदुषसुः पृश्निरग्रिय उक्षा बिभर्ति भुवनानि वाज्युः |
 मायाविनो ममिरे अस्य मायया नृक्षसः पितरो गर्भमा दधुः || 3 ||

गन्धर्व इत्था पदमस्य रक्षति पाति देवानां जनिमान्यद्भुतः |
 गृभ्णाति रिपुं निधया निधापतिः सुकृत्तमा मधुनो भक्षमाशत || 4 ||
 हविर्हविष्मो महि सद्म दैव्यं नभो वसानः परि यास्यध्वरम् |
 राजा पवित्ररथो वाजमारुहः सहस्रभृष्टिर्जयसि श्रवो बृहत् || 5 ||

(5)

84

(म.9, अनु.4)

ऋषिः प्रजापतिः वाच्यः	छन्दः जगती	देवता पवमानः सोमः
-----------------------	------------	-------------------

पवस्व देवमादनो विचर्षणिरप्सा इन्द्राय वरुणाय वायवे |
 कृधी नो अद्य वरिवः स्वस्तिमदुरुक्षितौ गृणीहि दैव्यं जनम् || 1 ||
 आ यस्तस्थौ भुवनान्यमर्त्यो विश्वानि सोमः परि तान्यर्षति |
 कृण्वन्त्संचृतं विचृतमभिष्टय इन्दुः सिषक्त्युषसं न सूर्यः || 2 ||
 आ यो गोभिः सृज्यत् ओषधीष्वा देवानां सुम्न इषयन्नुपावसुः |
 आ विद्युता पवते धारया सुत इन्द्रं सोमो मादयन्दैव्यं जनम् || 3 ||
 एष स्य सोमः पवते सहस्रजिद्धिन्वानो वाचमिषिरामुषुर्बुधम् |
 इन्दुः समुद्रमुदिर्यति वायुभिरेन्द्रस्य हार्दि कलशेषु सीदति || 4 ||
 अभि त्यं गावः पर्यसा पयोवृधं सोमं श्रीणन्ति मतिभिः स्वर्विदम् |
 धनंजयः पवते कृत्व्यो रसो विप्रः कविः काव्येना स्वर्चनाः || 5 ||

(12)

85

(म.9, अनु.4)

ऋषिः वेनः भार्गवः	छन्दः जगती 1-10, त्रिष्टुप् 11-12	देवता पवमानः सोमः
-------------------	-----------------------------------	-------------------

इन्द्राय सोम सुषुतः परि स्रवापामीवा भवतु रक्षसा सह |
 मा ते रसस्य मत्सत द्रयाविनो द्रविणस्वन्त इह सन्त्विन्दवः || 1 ||
 अस्मान्त्समर्ये पवमान चोदय दक्षो देवानामसि हि प्रियो मर्दः |
 जुहि शत्रूरभ्या भन्दनायतः पिबेन्द्र सोममव नो मृधो जहि || 2 ||
 अर्दब्ध इन्दो पवसे मदिन्ताम आत्मेन्द्रस्य भवसि धासिरुत्तमः |
 अभि स्वरन्ति बृहवो मनीषिणो राजानमस्य भुवनस्य निसते || 3 ||
 सहस्रणीथः शतधारो अबद्धत् इन्द्रायेन्दुः पवते काम्यं मधु |
 जयन्क्षेत्रमभ्यर्षा जयन्नप उरुं नो गातुं कृणु सोम मीढ्वः || 4 ||
 कनिक्रदत्कलशे गोभिरज्यसे व्यश्व्ययं समया वारमर्षसि |
 मर्मृज्यमानो अत्यो न सानसिरिन्द्रस्य सोम जठरे समक्षरः || 5 ||
 स्वादुः पवस्व दिव्याय जन्मने स्वादुरिन्द्राय सुहवीतुनाम्ने |
 स्वादुर्मित्राय वरुणाय वायवे बृहस्पतये मधुमाँ अदाभ्यः || 6 ||
 अत्यं मृजन्ति कलशे दश क्षिपुः प्र विप्राणां मृतयो वाच ईरते |

पर्वमाना अ॒भ्यर्षन्ति सुष्टुतिमेन्द्रं विशन्ति मदिरासु इन्द्रवः	॥ 7 ॥
पर्वमानो अ॒भ्यर्षा सुवीर्य॑मुर्वी गव्यूतिं महि शर्म॑ सप्रथः	
माकि॑र्नो अस्य परि॑षूतिरीश॒तेन्दो जये॑म॒ त्वया धन॑धनम्	॥ 8 ॥
अधि॑ द्याम॒स्थाद्वृष॑भो विचक्षणोऽरू॒रुच॑द्वि दिवो रो॑चना कृविः	
राजा॑ प॒वित्र॑मत्येति॒ रोरु॑वद्विवः पी॒यूषं दु॑हते नृचक्ष॑सः	॥ 9 ॥
दिवो॑ नाके मधु॑जिह्वा अस॒श्चतो॑ वे॒ना दु॑हन्त्युक्षणं गिरि॑ष्ठाम्	
अ॒प्सु द्र॒प्तं वा॑वृ॒धानं॑ समु॒द्र आ सिन्धो॑रू॒र्मा मधु॑मन्तं प॒वित्र॑ आ	॥ 10 ॥
नाके॑ सु॒पर्णमु॑पप॒प्तिवांसं॑ गिरो॑ वे॒नाना॑मकृपन्त॒ पूर्वाः	
शि॒शुं रि॑हन्ति म॒तयः॑ प॒निप्र॑तं हि॒रुण्य॑यं शकु॒नं क्षाम॑णि॒ स्थाम्	॥ 11 ॥
ऊ॒र्ध्वो ग॑न्ध॒र्वो अधि॑ नाके॒ अस्था॑द्वि॒श्वो रू॒पा प्र॑तिचक्षा॒णो अस्य॑	
भानुः॑ शु॒क्रेण॑ शोचिषा॒ व्यद्यौ॑त्प्रा॒रू॒रुच॑द्रो॒दसी मा॑तरा शुचिः	॥ 12 ॥

(48)

86

(म.9, अनु.5)

ऋषिः आकृष्टाः माषाः 1-10, सिकता निवावरी 11-20,	पृश्नयः अजाः 21-30,
आकृष्टाः माषाः सिकता निवावरी पृश्नयः अजाः च 31-40,	भौमः अत्रिः 41-45, गृत्समदः 46-48
छन्दः जगती देवता पवमानः सोमः	

प्र त आ॒शवः॑ पवमान॒ धीज॑वो मदा॑ अर्षन्ति रघु॒जाइ॑व॒ त्मना॑	
दिव्याः॑ सु॒पर्णा मधु॑मन्त॒ इन्द्र॑वो म॒दिन्त॑मासुः परि॒ कोश॑मासते	॥ 1 ॥
प्र ते॑ मदा॑सो मदिरास॑ आ॒शवोऽसृ॑क्षत् रथ्या॑सो यथा॒ पृथक्	
धे॒नुर्न व॑त्सं पर्य॑साभि वृ॒ज्जिण॑मिन्द्रमिन्द्र॒वो मधु॑मन्त॒ ऊर्म॑यः	॥ 2 ॥
अत्यो॑ न हि॒यानो॑ अ॒भि वा॑ज॒मर्ष॑ स्व॒र्वित्कोशं॑ दिवो अ॒द्रिमा॑तरम्	
वृषा॑ प॒वित्रे॑ अधि॒ सानो॑ अ॒व्यये॑ सोमः पु॒नान॑ इन्द्रि॒याय॑ धाय॑से	॥ 3 ॥
प्र त आ॒श्विनीः॑ पवमान॒ धीजु॑वो॒ दिव्या॑ अ॒सृग्र॑न् पर्य॑सा धरी॑मणि	
प्रान्त॑र्ऋष॒यः स्था॑विरीरसृक्षत्॒ ये त्वा॑ मृ॒जन्त्यृ॑षिषाण वे॒धसः॑	॥ 4 ॥
वि॒श्वो धा॑मानि वि॒श्वच॑क्ष ऋ॒भ्वसः॑ प्र॒भोस्ते॑ स॒तः परि॑ यन्ति के॒तवः॑	
व्या॒न॒शिः प॑वसे सोम॒ धर्मा॑भिः पति॒र्वि॒श्वस्य॑ भु॒र्वन॑स्य राजसि	॥ 5 ॥
उ॒भय॑तः पर्व॑मानस्य र॒श्मयो॑ ध्रु॒वस्य॑ स॒तः परि॑ यन्ति के॒तवः॑	
यदी॑ प॒वित्रे॑ अधि॒ मृज्य॑ते हरिः स॒त्ता नि॑ योना॒ कल॑शेषु सीदति	॥ 6 ॥
य॒ज्ञस्य॑ के॒तुः प॑वते स्व॒ध्वरः॑ सोमो॑ दे॒वाना॑मुप॒ याति॑ निष्कृतम्	
स॒हस्र॑धारः परि॒ कोश॑मर्षति॒ वृषा॑ प॒वित्र॑मत्येति॒ रोरु॑वत्	॥ 7 ॥
राजा॑ समु॒द्रं न॒द्योर् वि॑ गा॒हते॑ऽपामूर्मि॑ संच॒ते सिन्धु॑षु श्रितः	
अ॒ध्य॒स्थात्सानु॑ पर्व॑मानो अ॒व्ययं॑ नाभा॑ पृथि॒व्या ध॑रु॒णो महो॑ दिवः	॥ 8 ॥

दिवो न सानुं स्तनयन्नचिक्रदद् द्यौश्च यस्य पृथिवी च धर्मभिः ।
 इन्द्रस्य सुख्यं पवते विवेविदत्सोमः पुनानः कलशेषु सीदति ॥ 9 ॥
 ज्योतिर्यज्ञस्य पवते मधु प्रियं पिता देवानां जनिता विभूर्वसुः ।
 दधाति रत्नं स्वधयोरपीच्यं मदिन्तमो मत्सर इन्द्रियो रसः ॥ 10 ॥
 अभिक्रन्दन् कलशं वाज्यर्षति पतिर्दिवः शतधारो विचक्षणः ।
 हरिर्मित्रस्य सदेनेषु सीदति मर्मजानोऽविभिः सिन्धुभिर्वृषा ॥ 11 ॥
 अग्रे सिन्धूनां पवमानो अर्षत्यग्रे वाचो अग्रियो गोषु गच्छति ।
 अग्रे वाजस्य भजते महाधुनं स्वायुधः सोतृभिः पूयते वृषा ॥ 12 ॥
 अयं मत्वाञ्छकुनो यथा हितोऽव्यै ससार पवमान ऊर्मिणा ।
 तव क्रत्वा रोदसी अन्तरा कवे शुचिर्धिया पवते सोम इन्द्र ते ॥ 13 ॥
 द्वापिं वसानो यजतो दिविस्पृशमन्तरिक्षप्रा भुवनेष्वर्षितः ।
 स्वर्जज्ञानो नभसाभ्यक्रमीत्प्रलमस्य पितरमा विवासति ॥ 14 ॥
 सो अस्य विशे महि शर्मं यच्छति यो अस्य धामं प्रथमं व्यानशे ।
 पदं यदस्य परमे व्योमन्यतो विश्वा अभि सं याति संयतः ॥ 15 ॥
 प्रो अयासीदिन्दुरिन्द्रस्य निष्कृतं सखा सख्युर्न प्र मिनाति संगिरम् ।
 मर्यइव युवतिभिः समर्षति सोमः कलशे शतयाम्ना पथा ॥ 16 ॥
 प्र वो धियो मन्द्रयुवो विपन्युवः पनस्युवः संवसनेष्वक्रमुः ।
 सोमं मनीषा अभ्यनूषत् स्तुभोऽभि धेनवः पर्यसेमशिश्रयुः ॥ 17 ॥
 आ नः सोम संयतं पिप्युषीमिषमिन्दो पवस्व पवमानो अस्त्रिधम् ।
 या नो दोहते त्रिरहन्नसंश्रुषी क्षुमद्वाजवन्मधुमत्सुवीर्यम् ॥ 18 ॥
 वृषा मतीनां पवते विचक्षणः सोमो अह्नः प्रतरीतोषसो दिवः ।
 क्राणा सिन्धूनां कलशां अवीवशदिन्द्रस्य हाद्यांविशन्मनीषिभिः ॥ 19 ॥
 मनीषिभिः पवते पूर्व्यः क्विर्नृभिर्यतः परि कोशां अचिक्रदत् ।
 त्रितस्य नाम जनयन्मधु क्षरदिन्द्रस्य वायोः सुख्याय कर्तवे ॥ 20 ॥
 अयं पुनान उषसो वि रोचयदयं सिन्धुभ्यो अभवदु लोककृत् ।
 अयं त्रिः सप्त दुदुहान आशिरुं सोमो हृदे पवते चारु मत्सरः ॥ 21 ॥
 पवस्व सोम दिव्येषु धामसु सृजान इन्दो कलशे पवित्र आ ।
 सीदन्निन्द्रस्य जठरे कनिक्रदन्नभिर्यतः सूर्यमारोहयो दिवि ॥ 22 ॥
 अद्रिभिः सुतः पवसे पवित्र आँ इन्दुविन्द्रस्य जठरेष्वाविशन् ।
 त्वं नृचक्षां अभवो विचक्षण सोमं गोत्रमङ्गिरोभ्योऽवृणोरप ॥ 23 ॥
 त्वां सोम पवमानं स्वाध्योऽनु विप्रासो अमदन्नवस्यवः ।

त्वां सुपुर्ण आभरद्विवस्परीन्दो विश्वाभिर्मतिभिः परिष्कृतम्	॥ 24 ॥
अव्ये पुनानं परि वारं ऊर्मिणा हरिं नवन्ते अभि सप्त धेनवः	
अपामुपस्थे अध्यायवः क्विमृतस्य योना महिषा अहेषत	॥ 25 ॥
इन्दुः पुनानो अतिं गाहते मृधो विश्वानि कृण्वन्सुपथानि यज्यवे	
गाः कृण्वानो निर्णिजं हर्यतः क्विरत्यो न क्रीळन् परि वारमर्षति	॥ 26 ॥
असृश्चतः शतधारा अभिश्रियो हरिं नवन्तेऽव ता उदन्युवः	
क्षिपो मृजन्ति परि गोभिरावृतं तृतीये पृष्ठे अधि रोचने दिवः	॥ 27 ॥
तवेमाः प्रजा दिव्यस्य रेतसस्त्वं विश्वस्य भुवनस्य राजसि	
अथेदं विश्वं पवमान ते वशे त्वमिन्दो प्रथमो धाम्धा असि	॥ 28 ॥
त्वं समुद्रो असि विश्ववित्कवे तवेमाः पञ्च प्रदिशो विधर्मणि	
त्वं द्यां च पृथिवीं चाति जभिषे तव ज्योतीषि पवमान् सूर्यः	॥ 29 ॥
त्वं पवित्रे रजसो विधर्मणि देवेभ्यः सोम पवमान पूयसे	
त्वामुशिजः प्रथमा अंगृभ्णत् तुभ्येमा विश्वा भुवनानि येमिरे	॥ 30 ॥
प्र रेभ एत्यति वारमव्ययं वृषा वनेष्वव चक्रदद्धरिः	
सं धीतयो वावशाना अनूषत् शिशुं रिहन्ति मृतयुः पनिप्रतम्	॥ 31 ॥
स सूर्यस्य रश्मिभिः परि व्यत् तन्तुं तन्वानस्त्रिवृतं यथा विदे	
नयन्नृतस्य प्रशिषो नवीयसीः पतिर्जनीनामुप याति निष्कृतम्	॥ 32 ॥
राजा सिन्धूनां पवते पतिर्दिव ऋतस्य याति पृथिभिः कर्निक्रदत्	
सहस्रधारः परि षिच्यते हरिः पुनानो वाचं जनयन्नुपावसुः	॥ 33 ॥
पवमान मह्यर्णो वि धावसि सूरु न चित्रो अव्ययानि पव्यया	
गभस्तिपूतो नृभिरद्रिभिः सुतो महे वाजाय धन्याय धन्वसि	॥ 34 ॥
इषुमूर्जं पवमानाभ्यर्षसि श्येनो न वंसु कलशेषु सीदसि	
इन्द्राय मद्वा मद्यो मदः सुतो दिवो विष्टम्भ उपमो विचक्षणः	॥ 35 ॥
सप्त स्वसारो अभि मातरः शिशुं नवं जज्ञानं जेन्यं विपश्चितम्	
अपां गन्धर्वं दिव्यं नृचक्षसं सोमं विश्वस्य भुवनस्य राजसे	॥ 36 ॥
ईशान इमा भुवनानि वीर्यसे युजान इन्दो हरितः सुपर्ण्यः	
तास्ते क्षरन्तु मधुमद्धृतं पयस्तव व्रते सोम तिष्ठन्तु कृष्टयः	॥ 37 ॥
त्वं नृचक्षा असि सोम विश्वतः पवमान वृषभ ता वि धावसि	
स नः पवस्व वसुमद्धिरण्यवद्वयं स्याम भुवनेषु जीवसे	॥ 38 ॥
गोवित्पवस्व वसुविद्धिरण्यविद्रेतोधा इन्दो भुवनेष्वर्पितः	
त्वं सुवीरो असि सोम विश्ववित्तं त्वा विप्रा उप गिरेम आसते	॥ 39 ॥

उन्मध्वं ऊर्मिर्वनना अतिष्ठिपदपो वसानो महिषो वि गाहते	
राजा पवित्ररथो वाजुमारुहत्सहस्रभृष्टिर्जयति श्रवो बृहत्	॥ 40 ॥
स भन्दना उदिर्यति प्रजावतीर्विश्वायुर्विश्वाः सुभरा अर्हदिवि	
ब्रह्म प्रजावद्रयिमश्वपस्त्यं पीत इन्द्रविन्द्रमस्मभ्यं याचतात्	॥ 41 ॥
सो अग्रे अह्नां हरिर्हर्यतो मदः प्र चेतसा चेतयते अनु द्युभिः	
द्वा जना यातयन्नन्तरीयते नरा च शंसं दैव्यं च धर्तरि	॥ 42 ॥
अञ्जते व्यञ्जते समञ्जते क्रतुं रिहन्ति मधुनाभ्यञ्जते	
सिन्धोरुच्छ्रासे पृतयन्तमुक्षणं हिरण्यपावाः पशुमासु गृभ्णते	॥ 43 ॥
विपुश्चिते पर्वमानाय गायत मही न धारात्यन्धो अर्षति	
अहिर्न जूर्णामति सर्पति त्वचमत्यो न क्रीळन्नसरद्वेषा हरिः	॥ 44 ॥
अग्रेगो राजाप्यस्तविष्यते विमानो अह्नां भुवनेष्वर्षितः	
हरिर्घृतस्रुः सुदृशीको अर्णवो ज्योतीरथः पवते राय ओक्थः	॥ 45 ॥
असर्जि स्कुम्भो दिव उद्यतो मदः परि त्रिधातुर्भुवनान्यर्षति	
अंशुं रिहन्ति मत्यः परिप्रतं गिरा यदि निर्णिजमृग्मिणो ययुः	॥ 46 ॥
प्र ते धारा अत्यण्वानि मेष्यः पुनानस्य संयतो यन्ति रंहयः	
यद्गोभिरिन्दो चम्बोः समज्यस आ सुवानः सोम कलशेषु सीदसि	॥ 47 ॥
पवस्व सोम क्रतुविन्न उक्थ्योऽव्यो वारे परि धाव मधु प्रियम्	
जहि विश्वान्नक्षस इन्दो अत्रिणो बृहद्वदेम विदथे सुवीराः	॥ 48 ॥

(9)

87

(म.9, अनु.5)

ऋषिः उशनाः काव्यः	छन्दः त्रिष्टुप्	देवता पवमानः सोमः
-------------------	------------------	-------------------

प्र तु द्रव परि कोशं नि षीदु नृभिः पुनानो अभि वाजमर्ष	
अश्वं न त्वा वाजिनं मर्जयन्तोऽच्छा बर्ही रशनाभिर्नयन्ति	॥ 1 ॥
स्वायुधः पवते देव इन्द्ररशस्तिहा वृजनं रक्षमाणः	
पिता देवानां जनिता सुदक्षो विष्टम्भो दिवो धरुणः पृथिव्याः	॥ 2 ॥
ऋषिर्विप्रः पुरएता जनानामृभुर्धीर उशना काव्येन	
स चिद्विवेदु निहितं यदासामपीच्यं गुह्यं नाम् गोनाम्	॥ 3 ॥
एष स्य ते मधुमाँ इन्द्र सोमो वृषा वृष्णे परि पवित्रे अक्षाः	
सहस्रसाः शतसा भूरिदावा शश्वत्तमं बर्हिरा वाज्यस्थात्	॥ 4 ॥
एते सोमा अभि गव्या सहस्रा महे वाजायामृताय श्रवांसि	
पवित्रेभिः पर्वमाना असृग्रञ्छ्रवस्यवो न पृतनाजो अत्याः	॥ 5 ॥
परि हि ष्मा पुरुहूतो जनानां विश्वासरद्धोर्जना पूयमानः	
अथा भर श्येनभृत् प्रयांसि रयिं तुञ्जानो अभि वाजमर्ष	॥ 6 ॥
एष सुवानः परि सोमः पवित्रे सर्गो न सृष्टो अदधावदवा	

तिग्मे शिशानो महिषो न शृङ्गे गा गव्यन्नभि शूरो न सत्वा	॥ 7 ॥
एषा ययौ परमादन्तरद्रेः कूर्चित्सतीरूर्वे गा विवेद	
दिवो न विद्युत्स्तनयन्त्यभ्रैः सोमस्य ते पवत इन्द्र धारा	॥ 8 ॥
उत स्म राशिं परिं यासि गोनामिन्द्रैण सोम स्रथं पुनानः	
पूर्वारिषो बृहतीर्जीरदानो शिक्षा शचीवस्तव ता उपष्टुत्	॥ 9 ॥

(8)

88

(म.9, अनु.5)

ऋषिः उशानाः काव्यः	छन्दः त्रिष्टुप्	देवता पवमानः सोमः
--------------------	------------------	-------------------

अयं सोमं इन्द्र तुभ्यं सुन्वे तुभ्यं पवते त्वमस्य पाहि	
त्वं ह यं चकृषे त्वं ववृष इन्दुं मदाय युज्याय सोमम्	॥ 1 ॥
स ई रथो न भुरिषाळयोजि महः पुरुणि सातये वसूनि	
आदीं विश्वा नहुष्याणि जाता स्वर्षाता वन ऊर्ध्वा नवन्त	॥ 2 ॥
वायुर्न यो नियुत्वाँ इष्टयामा नासत्येव हव आ शंभविष्टः	
विश्ववारो द्रविणोदाइव त्मन्पूषेवं धीजवनोऽसि सोम	॥ 3 ॥
इन्द्रो न यो महा कर्माणि चक्रिर्हन्ता वृत्राणामसि सोम पूर्भित्	
पैद्वो न हि त्वमहिनाम्रां हन्ता विश्वस्यासि सोम दस्योः	॥ 4 ॥
अग्रिर्न यो वन आ सृज्यमानो वृथा पाजांसि कृणुते नदीषु	
जनो न युध्वा महत उपब्दिरियति सोमः पवमान ऊर्मिम्	॥ 5 ॥
एते सोमा अति वाराण्यव्या दिव्या न कोशासो अभ्रवर्षाः	
वृथा समुद्रं सिन्धवो न नीचीः सुतासो अभि कलशाँ असृग्रन्	॥ 6 ॥
शुष्मी शर्धो न मारुतं पवस्वानभिशास्ता दिव्या यथा विट्	
आपो न मक्षू सुमतिर्भवा नः सहस्राप्साः पृतनाषाण्ण यज्ञः	॥ 7 ॥
राज्ञो नु ते वरुणस्य व्रतानि बृहद्भीरं तव सोम धाम	
शुचिष्टमसि प्रियो न मित्रो दुक्षाय्यो अर्यमेवासि सोम	॥ 8 ॥

(7)

89

(म.9, अनु.5)

ऋषिः उशानाः काव्यः	छन्दः त्रिष्टुप्	देवता पवमानः सोमः
--------------------	------------------	-------------------

प्रो स्य वह्निः पृथ्याभिरस्यान् दिवो न वृष्टिः पवमानो अक्षाः	
सहस्रधारो असद्व्यश्स्मे मातुरुपस्थे वन आ च सोमः	॥ 1 ॥
राजा सिन्धूनामवसिष्ट वासं ऋतस्य नावमारुहद्रजिष्ठाम्	
अप्सु द्रप्सो वावृधे श्येनजूतो दुह ई पिता दुह ई पितुर्जाम्	॥ 2 ॥
सिंहं नसन्त मध्वो अयासं हरिमरुषं दिवो अस्य पतिम्	
शूरो युत्सु प्रथमः पृच्छते गा अस्य चक्षसा परिं पात्युक्षा	॥ 3 ॥
मधुपृष्ठं घोरमयासमश्वं रथे युञ्जन्त्युरुचक्र ऋष्वम्	

स्वसार ईं जामयो मर्जयन्ति सनाभयो वाजिनमूर्जयन्ति	॥ 4 ॥
चतस्र ईं घृतदुहः सचन्ते समाने अन्तर्धरुणे निषत्ताः	
ता ईमर्षन्ति नमसा पुनानास्ता ईं विश्वतः परि षन्ति पूर्वीः	॥ 5 ॥
विष्टम्भो दिवो धरुणः पृथिव्या विश्वा उत क्षितयो हस्तै अस्य	
असत्त उत्सो गृणते नियत्वान्मध्वो अंशुः पवत इन्द्रियाय	॥ 6 ॥
वन्वन्नवातो अभि देववीतिमिन्द्राय सोम वृत्रहा पवस्व	
शग्धि महः पुरुश्चन्द्रस्य रायः सुवीर्यस्य पतयः स्याम	॥ 7 ॥

(6)

90

(म.9, अनु.5)

ऋषिः वसिष्ठः मैत्रावरुणिः	छन्दः त्रिष्टुप्	देवता पवमानः सोमः
---------------------------	------------------	-------------------

प्र हिन्वानो जनिता रोदस्यो रथो न वाजं सनिष्यन्नयासीत्	
इन्द्रं गच्छन्नायुधा संशिशानो विश्वा वसु हस्तयोरादधानः	॥ 1 ॥
अभि त्रिपृष्ठं वृषणं वयोधामाङ्गुषाणामवावशन्त वाणीः	
वना वसानो वरुणो न सिन्धून्वि रत्नधा दयते वार्याणि	॥ 2 ॥
शूरग्रामः सर्ववीरः सहावाञ्जेता पवस्व सनिता धनानि	
तिग्मायुधः क्षिप्रधन्वा समत्स्वषाळहः साह्वान्पृतनासु शत्रून्	॥ 3 ॥
उरुगव्यूतिरभयानि कृण्वन्त्समीचीने आ पवस्वा पुरंधी	
अपः सिषासन्नुषसः स्वर्गाः सं चिक्रदो महो अस्मभ्यं वाजान्	॥ 4 ॥
मत्सि सोम वरुणं मत्सि मित्रं मत्सीन्द्रमिन्द्रो पवमान् विष्णुम्	
मत्सि शर्धो मारुतं मत्सि देवान्मत्सि महामिन्द्रमिन्द्रो मदाय	॥ 5 ॥
एवा राजेव क्रतुमाँ अमेन् विश्वा घनिघ्नद्वुरिता पवस्व	
इन्द्रो सूक्ताय वचसे वयो धा यूयं पात स्वस्तिभिः सदा नः	॥ 6 ॥

| इति सप्तमाष्टके तृतीयोऽध्यायः समाप्तः ।

(चतुर्थीऽध्यायः ॥ वर्गाः 1-28)

(6)

91

(म.9, अनु.5)

ऋषिःमारीचः कश्यपः	छन्दः त्रिष्टुप्	देवता पवमानः सोमः
-------------------	------------------	-------------------

असर्जि वक्त्रा रथ्ये यथाजौ धिया मनोता प्रथमो मनीषी	
दश स्वसारो अधि सानो अव्येऽर्जन्ति वह्निं सदनान्यच्छ	॥ 1 ॥
वीती जनस्य दिव्यस्य कव्यैरधि सुवानो नहुष्यैभिरिन्दुः	
प्र यो नृभिरमृतो मर्त्यैर्भर्मृजानोऽविभिर्गोभिरिन्द्रिः	॥ 2 ॥
वृषा वृष्णे रोरुवदंशुरस्मै पवमानो रुशदीर्ते पयो गोः	
सहस्रमृका पृथिर्भिवचोविदध्वस्मभिः सूरु अण्वं वि याति	॥ 3 ॥
रुजा दृळ्हा चिद्रक्षसः सदांसि पुनान इन्द ऊर्णहि वि वाजान्	
वृश्चोपरिष्ठात्तुजता वधेन ये अन्ति दूरादुपनायमेषाम्	॥ 4 ॥
स प्रलवन्नव्यसे विश्ववार सूक्ताय पथः कृणुहि प्राचः	
ये दुष्पहासो वनुषा बृहन्तस्ताँस्तै अश्याम पुरुकृत्पुरुक्षो	॥ 5 ॥
एवा पुनानो अपः स्वर्गा अस्मभ्यं तोका तनयानि भूरि	
शं नः क्षेत्रमुरु ज्योतीषि सोम ज्योङ्गः सूर्यं दृशये रिरिहि	॥ 6 ॥

(6)

92

(म.9, अनु.5)

ऋषिः मारीचः कश्यपः	छन्दः त्रिष्टुप्	देवता पवमानः सोमः
--------------------	------------------	-------------------

परि सुवानो हरिरंशुः पवित्रे रथो न सर्जि सनये हियानः	
आपच्छ्लोकमिन्द्रियं पूयमानः प्रति देवाँ अजुषत् प्रयोभिः	॥ 1 ॥
अच्छा नृचक्षा असरत्पवित्रे नाम् दधानः कविरस्य योनौ	
सीदन् होतेव सदने चमूषूपैमग्मृषयः सप्त विप्राः	॥ 2 ॥
प्र सुमेधा गातुविद्विश्वदेवः सोमः पुनानः सदे एति नित्यम्	
भुवद्विश्वेषु काव्येषु रन्तानु जनान्यतते पञ्च धीरः	॥ 3 ॥
तव त्वे सौम पवमान निण्ये विश्वे देवास्त्रय एकादशासः	
दश स्वधाभिरधि सानो अव्ये मृजन्ति त्वा नद्यः सप्त यद्हीः	॥ 4 ॥
तत्रु सत्यं पवमानस्यास्तु यत्र विश्वे कारवः संनसन्त	
ज्योतिर्यदहे अकृणोदु लोकं प्रावन्मनुं दस्यवे करभीकम्	॥ 5 ॥
परि सद्यैव पशुमान्ति होता राजा न सत्यः समितीरियानः	
सोमः पुनानः कलशाँ अयासीत्सीदन्मृगो न महिषो वनेषु	॥ 6 ॥

(5)

93

(म.9, अनु.5)

ऋषिः नोधाः गौतमः

छन्दः त्रिष्टुप्

देवता पवमानः सोमः

साकमुक्षो मर्जयन्त स्वसारो दश धीरस्य धीतयो धनुत्रीः	
हरिः पर्यद्रवज्जाः सूर्यस्य द्रोणं ननक्षे अत्यो न वाजी	॥ 1 ॥
सं मातृभिर्न शिशुर्वावशानो वृषा दधन्वे पुरुवारो अद्भिः	
मर्यो न योषामभि निष्कृतं यन्त्सं गच्छते कलश उस्त्रियाभिः	॥ 2 ॥
उत प्र पिप्य ऊधुरघ्याया इन्दुर्धाराभिः सचते सुमेधाः	
मूर्धानं गावः पर्यसा चमूष्वभि श्रीणन्ति वसुभिर्न नित्तेः	॥ 3 ॥
स नो देवेभिः पवमान रुदेन्दो रयिमुश्विनं वावशानः	
रथिरायतामुशती पुरंधिरस्मद्भ्यश्गा दावने वसूनाम्	॥ 4 ॥
नू नो रयिमुप मास्व नृवन्तं पुनानो वाताप्यं विश्वश्चन्द्रम्	
प्र वन्दितुरिन्दो तार्यायुः प्रातर्मक्षू धियावसुर्जगम्यात्	॥ 5 ॥

(5)

94

(म.9, अनु.5)

ऋषिः कण्वः आङ्गिरसः

छन्दः त्रिष्टुप्

देवता पवमानः सोमः

अधि यदस्मिन्वाजिनीव शुभः स्पर्धन्ते धियः सूर्ये न विशः	
अपो वृणानः पवते कवीयन्व्रजं न पशुवर्धनाय मन्म	॥ 1 ॥
द्विता व्यूर्ण्वन्नमृतस्य धाम स्वर्विदे भुवनानि प्रथन्त	
धियः पिन्वानाः स्वसरे न गाव ऋतायन्तीरुभि वावश्रु इन्दुम्	॥ 2 ॥
परि यत्कविः काव्या भरते शूरो न रथो भुवनानि विश्वा	
देवेषु यशो मर्ताय भूषन्दक्षाय रायः पुरुभूषु नव्यः	॥ 3 ॥
श्रिये जातः श्रिय आ निरियाय श्रियं वयो जरितृभ्यो दधाति	
श्रियं वसाना अमृतत्वमायुन्भवन्ति सत्या समिथा मितद्रौ	॥ 4 ॥
इषमूर्जमभ्यर्षाश्वं गामुरु ज्योतिः कृणुहि मत्सि देवान्	
विश्वानि हि सुषहा तानि तुभ्यं पवमान् बाधसे सोम शत्रून्	॥ 5 ॥

(5)

95

(म.9, अनु.5)

ऋषिः प्रस्कण्वः काण्वः

छन्दः त्रिष्टुप्

देवता पवमानः सोमः

कनिक्रन्ति हरिरा सृज्यमानः सीदन्वनस्य जठरे पुनानः	
नृभिर्यतः कृणुते निर्णिजं गा अतो मतीर्जनयत स्वधाभिः	॥ 1 ॥
हरिः सृजानः पथ्यामृतस्येर्यति वाचमरितेव नावम्	
देवो देवानां गुह्यानि नामाविष्कृणोति बर्हिषि प्रवाचे	॥ 2 ॥
अपामिवेदूमयस्तर्तुराणाः प्र मनीषा ईरते सोममच्छ	
नमस्यन्तीरुप च यन्ति सं चा च विशन्त्युशतीरुशन्तम्	॥ 3 ॥

तं मर्मजानं महिषं न सानावंशुं दुहन्त्युक्षणं गिरिष्ठाम् |
तं वावशानं मृतयः सचन्ते त्रितो बिभर्ति वरुणं समुद्रे || 4 ||
इष्यन्वाचमुपवृक्तेव होतुः पुनान इन्दो वि ष्या मनीषाम् |
इन्द्रश्च यत्क्षयथः सौभगाय सुवीर्यस्य पतयः स्याम || 5 ||

(24)

96

(म.9, अनु.5)

ऋषिः प्रतर्दनः दैवोदासिः

छन्दः त्रिष्टुप्

देवता पवमानः सोमः

प्र सैनानीः शूरो अग्रे रथानां गव्यन्नेति हर्षते अस्य सेना |
भद्रान्कृण्वन्निन्द्रहवान्तसखिभ्य आ सोमो वस्त्रा रभसानि दत्ते || 1 ||
समस्य हरिं हरयो मृजन्त्यश्वहयैरनिशितं नमोभिः |
आ तिष्ठति रथमिन्द्रस्य सखा विद्धां एना सुमतिं यात्यच्छ | || 2 ||
स नो देव देवताते पवस्व महे सोम प्सरस इन्द्रपानः |
कृण्वन्नपो वर्षयन्धामुतेमामुरोरा नो वरिवस्या पुनानः || 3 ||
अजीतयेऽहतये पवस्व स्वस्तये सर्वतातये बृहते |
तदुशन्ति विश्व इमे सखायस्तदहं वशिम पवमान सोम || 4 ||
सोमः पवते जनिता मतीनां जनिता दिवो जनिता पृथिव्याः |
जनिताग्रेर्जनिता सूर्यस्य जनितेन्द्रस्य जनितोत विष्णोः || 5 ||
ब्रह्मा देवानां पदवीः कवीनामृषिर्विप्राणां महिषो मृगाणाम् |
श्येनो गृध्राणां स्वधितिर्वनानां सोमः पवित्रमत्येति रेभन् || 6 ||
प्रावीविपद्वाच ऊर्मि न सिन्धुर्गिरः सोमः पवमानो मनीषाः |
अन्तः पश्यन्वृजनेमावराण्या तिष्ठति वृषभो गोषु जानन् || 7 ||
स मत्सरः पृत्सु वृन्वन्नवातः सहस्रेता अभि वाजमर्ष |
इन्द्रायेन्दो पवमानो मनीष्यंशोरूर्मिमीरय गा इष्यन् || 8 ||
परि प्रियः कुलशो देववात् इन्द्राय सोमो रण्यो मदाय |
सहस्रधारः शतवाज इन्दुर्वाजी न सप्तिः समना जिगाति || 9 ||
स पूव्यो वसुविज्जायमानो मृजानो अप्सु दुदुहानो अद्रौ |
अभिश्स्तिपा भुवनस्य राजा विद्धातुं ब्रह्मणे पूयमानः || 10 ||
त्वया हि नः पितरः सोम पूर्वे कर्माणि चक्रुः पवमान धीराः |
वृन्वन्नवातः परिधीरपोर्णु वीरेभिरश्वैर्मघवा भवा नः || 11 ||
यथापवथा मनवे वयोधा अमित्रहा वरिवोविद्धविष्मान् |

एवा पवस्व द्रविणं दधान् इन्द्रे सं तिष्ठ जिनययुधानि	॥ 12 ॥
पवस्व सोम मधुमाँ ऋतावापो वसानो अधि सानो अव्ये	
अव द्रोणानि घृतवान्ति सीद मदिन्तमो मत्सर इन्द्रपानः	॥ 13 ॥
वृष्टिं दिवः शतधारः पवस्व सहस्रसा वाजयुर्देववीतौ	
सं सिन्धुभिः कलशै वावशानः समुस्त्रियाभिः प्रतिरन्न आयुः	॥ 14 ॥
एष स्य सोमो मतिभिः पुनानोऽत्यो न वाजी तरतीदरातीः	
पयो न दुग्धमदितेरिषिरमुर्विव गातुः सुयमो न वोळ्हा	॥ 15 ॥
स्वायुधः सोतृभिः पूयमानोऽभ्यर्षु गुह्यं चारु नाम	
अभि वाजं सप्तिरिव श्रवस्याभि वायुमभि गा देव सोम	॥ 16 ॥
शिशुं जज्ञानं हर्यतं मृजन्ति शुम्भन्ति वह्निं मरुतो गणेन	
कविर्गीभिः काव्यैना कविः सन्त्सोमः पवित्रमत्येति रेभन्	॥ 17 ॥
ऋषिमना य ऋषिकृत्स्वर्षाः सहस्रणीथः पदवीः कवीनाम्	
तृतीयं धाम महिषः सिषासन्त्सोमो विराजमनु राजति ष्टुप्	॥ 18 ॥
चमूषच्छयेनः शकुनो विभृत्वा गोविन्दुर्द्रप्स आयुधानि बिभ्रत्	
अपामूर्मि सचमानः समुद्रं तुरीयं धाम महिषो विवक्ति	॥ 19 ॥
मर्यो न शुभ्रस्तन्वं मृजानोऽत्यो न सृत्वा सनये धनानाम्	
वृषेव यूथा परि कोशमर्षन्कनिक्रदञ्चम्वोऽरा विवेश	॥ 20 ॥
पवस्वेन्दो पवमानो महोभिः कनिक्रदत्परि वाराण्यर्ष	
क्रीळञ्चम्वोऽरा विश पूयमान् इन्द्रं ते रसो मदिरो ममत्तु	॥ 21 ॥
प्रास्य धारा बृहतीरसृग्रन्नक्तो गोभिः कलशाँ आ विवेश	
सामं कृण्वन्त्सामन्यो विपश्चित्क्रन्दन्नेत्यभि सख्युर्न जामिम्	॥ 22 ॥
अपुघ्नत्रैषि पवमान शत्रून् प्रियां न जारो अभिगीत् इन्दुः	
सीदन्वनेषु शकुनो न पत्वा सोमः पुनानः कलशेषु सत्ता	॥ 23 ॥
आ ते रुचः पवमानस्य सोम योषेव यन्ति सुदुघाः सुधाराः	
हरिरानीतः पुरुवारो अप्स्वर्चिक्रदत्कलशै देवयूनाम्	॥ 24 ॥

ऋषिः वसिष्ठः मैत्रावरुणिः 1-3, वासिष्ठः इन्द्रप्रमतिः 4-6, वासिष्ठः वृषगणः 7-9, वासिष्ठः मन्युः 10-12,
वासिष्ठः उपमन्युः 13-15, वासिष्ठः व्याघ्रपात् 16-18, वासिष्ठः शक्तिः 19-21, वासिष्ठः कर्णश्रुत् 22-24,
वासिष्ठः मृळीकः 25-27, वासिष्ठः वसुक्रः 28-30, पराशरः शाक्त्यः 31-44, कुत्सः आङ्गिरसः 45-58

छन्दः त्रिष्टुप् देवता पवमानः सोमः

अस्य प्रेषा हेमना पूयमानो देवो देवेभिः समपृक्त रसम्
सुतः पवित्रं पर्येति रेभन् मितेव सद्मं पशुमान्ति होता ॥ 1 ॥
भद्रा वस्त्रा समन्याः वसानो महान् कविर्निवचनानि शंसन्
आ वच्यस्व चम्बोः पूयमानो विचक्षणो जागृविर्देववीतौ ॥ 2 ॥
समु प्रियो मृज्यते सानो अव्यै यशस्तरो यशसां क्षैतो अस्मे
अभि स्वर धन्वा पूयमानो यूयं पात स्वस्तिभिः सदा नः ॥ 3 ॥
प्र गायताभ्यर्चाम देवान्सोमं हिनोम महते धनाय
स्वादुः पवाते अति वारुमव्यमा सीदाति कलशं देवयुनीः ॥ 4 ॥
इन्दुर्देवानामुप सख्यमायन्त्सहस्रधारः पवते मदाय
नृभिः स्तवानो अनु धाम पूर्वमगन्निन्द्रं महते सौभगाय ॥ 5 ॥
स्तोत्रे राये हरिरर्षा पुनान इन्द्रं मदो गच्छतु ते भराय
देवैर्याहि सरथं राधो अच्छा यूयं पात स्वस्तिभिः सदा नः ॥ 6 ॥
प्र काव्यमुशनैव ब्रुवाणो देवो देवानां जनिमा विवक्ति
महिब्रतः शुचिबन्धुः पावकः पदा वराहो अभ्येति रेभन् ॥ 7 ॥
प्र हंसासस्तृपलं मन्युमच्छामादस्तं वृषगणा अयासुः
आङ्गुष्पं पवमानं सखायो दुर्मर्षं साकं प्र वदन्ति वाणम् ॥ 8 ॥
स रंहत उरुगायस्य जूतिं वृथा क्रीळन्तं मिमते न गावः
प्रीणसं कृणुते तिग्मशृङ्गो दिवा हरिर्ददृशे नक्तमृज्रः ॥ 9 ॥
इन्दुर्वाजी पवते गोन्योघा इन्द्रे सोमः सह इन्वन्मदाय
हन्ति रक्षो बाधते पर्यरातीर्वरिवः कृण्वन् वृजनस्य राजा ॥ 10 ॥
अधु धारया मध्वा पृचानस्तिरो रोमं पवते अद्रिदुग्धः
इन्दुरिन्द्रस्य सख्यं जुषाणो देवो देवस्य मत्सुरो मदाय ॥ 11 ॥
अभि प्रियाणि पवते पुनानो देवो देवान्स्वेन रसेन पृञ्चन्
इन्दुर्धर्माण्यृतुथा वसानो दश क्षिपो अव्यत् सानो अव्यै ॥ 12 ॥
वृषा शोणो अभिकनिक्रदद्वा नदयन्नेति पृथिवीमुत द्याम्
इन्द्रस्येव वग्रुरा शृण्व आजौ प्रचेतयन्नर्षति वाचमेमाम् ॥ 13 ॥
रसाय्युः पर्यसा पिन्वमान ईरयन्नेषि मधुमन्तमंशुम्
पवमानः संतनिमेषि कृण्वन्निन्द्राय सोम परिषिच्यमानः ॥ 14 ॥

एवा पवस्व मदिरो मदायोदग्राभस्य नमयन् वधुस्रैः	
परि वर्णं भरमाणो रुशन्तं गव्यूनीं अर्षं परि सोम सिक्तः	॥ 15 ॥
जुष्टी न इन्दो सुपथा सुगान्युरौ पवस्व वरिवांसि कृण्वन्	
घनेव विष्वग्दुरितानि विघ्नन्नधि ष्णुना धन्व सानो अव्यै	॥ 16 ॥
वृष्टिं नो अर्ष दिव्यां जिगत्सुमिळावतीं शंगयीं जीरदानुम्	
स्तुकैव वीता धन्वा विचिन्वन्बन्धूरिमाँ अवराँ इन्दो वायून्	॥ 17 ॥
ग्रन्थिं न वि ष्यं ग्रथितं पुनान ऋजुं च गातुं वृजिनं च सोम	
अत्यो न क्रदो हरिरा सृजानो मयीं देव धन्व पुस्त्यावान्	॥ 18 ॥
जुष्टो मदाय देवतात इन्दो परि ष्णुना धन्व सानो अव्यै	
सहस्रधारः सुरभिरदब्धः परि स्रव वाजसातौ नृषह्यै	॥ 19 ॥
अरश्मानो येऽरथा अयुक्ता अत्यासो न संसृजानास आजौ	
एते शुक्रासो धन्वन्ति सोमा देवासस्ताँ उप याता पिबन्ध्वै	॥ 20 ॥
एवा न इन्दो अभि देववीतिं परि स्रव नभो अर्णश्चमूषु	
सोमो अस्मभ्यं काम्यं बृहन्तं रयिं ददातु वीरवन्तमुग्रम्	॥ 21 ॥
तक्षद्यदी मनसो वेनतो वाग्ज्येष्ठस्य वा धर्माणि क्षोरनीके	
आदीमायन्वरमा वावशाना जुष्टं पतिं कलशे गाव इन्दुम्	॥ 22 ॥
प्र दानुदो दिव्यो दानुपिन्व ऋतमृताय पवते सुमेधाः	
धर्मा भुवद्भजन्यस्य राजा प्र रश्मिभिर्दशभिर्भारि भूम	॥ 23 ॥
पवित्रैभिः पवमानो नृचक्षा राजा देवानामुत मर्त्यानाम्	
द्विता भुवद्रयिपती रयीणामृतं भरत्सुभृतं चार्विन्दुः	॥ 24 ॥
अवाँइव श्रवसे सातिमच्छेन्द्रस्य वायोरभि वीतिमर्ष	
स नः सहस्रा बृहतीरिषो दा भवा सोम द्रविणोवित्पुनानः	॥ 25 ॥
देवाव्यो नः परिषिच्यमानाः क्षयं सुवीरं धन्वन्तु सोमाः	
आयज्यवः सुमतिं विश्ववारा होतारो न दिवियजो मन्द्रतमाः	॥ 26 ॥
एवा देव देवताते पवस्व महे सोम प्सरसे देवपानः	
महश्चिद्धि ष्मसि हिताः समर्ये कृधि सुष्ठाने रोदसी पुनानः	॥ 27 ॥
अश्वो न क्रदो वर्षभिर्युजानः सिंहो न भीमो मनसो जवीयान्	
अर्वाचीनैः पृथिभिर्ये रजिष्ठा आ पवस्व सौमनुसं न इन्दो	॥ 28 ॥
शतं धारा देवजाता असृग्रन्त्सहस्रमेनाः कुवयो मृजन्ति	
इन्दो सनित्रं दिव आ पवस्व पुरएतासि महतो धनस्य	॥ 29 ॥
दिवो न सर्गा असृग्रमह्नां राजा न मित्रं प्र मिनाति धीरः	

पितुर्न पुत्रः क्रतुभिर्यतान आ पवस्व विशे अस्या अजीतिम्	॥ 30 ॥
प्र ते धारा मधुमतीरसृग्रन्वारान्यत्पूतो अत्येष्यव्यान्	
पर्वमान् पर्वसे धाम् गोनां जज्ञानः सूर्यमपिन्वो अर्कैः	॥ 31 ॥
कनिक्रददनु पन्थामृतस्य शुक्रो वि भास्यमृतस्य धाम	
स इन्द्राय पवसे मत्स्रवान् हिन्वानो वाचं मृतिभिः कवीनाम्	॥ 32 ॥
दिव्यः सुपर्णोऽव चक्षि सोमं पिन्वन्धाराः कर्मणा देववीतौ	
एन्दो विश कलशं सोमधानं क्रन्दन्निहि सूर्यस्योप रश्मिम्	॥ 33 ॥
तिस्रो वाच ईरयति प्र वह्निर्ऋतस्य धीतिं ब्रह्मणो मनीषाम्	
गावो यन्ति गोपतिं पृच्छमानाः सोमं यन्ति मृतयो वावशानाः	॥ 34 ॥
सोमं गावो धेनवो वावशानाः सोमं विप्रा मृतिभिः पृच्छमानाः	
सोमः सुतः पूयते अज्यमानः सोमं अर्कास्त्रिष्टुभः सं नवन्ते	॥ 35 ॥
एवा नः सोम परिषिच्यमान् आ पवस्व पूयमानः स्वस्ति	
इन्द्रमा विश बृहता रवेण वर्धया वाचं जनया पुरंधिम्	॥ 36 ॥
आ जागृर्विप्रं ऋता मतीनां सोमः पुनानो असदच्चमूषु	
सपन्ति यं मिथुनासो निकामा अध्वर्यवो रथिरासः सुहस्ताः	॥ 37 ॥
स पुनान उप सूरु न धातोभे अप्रा रोदसी वि ष आवः	
प्रिया चिद्यस्य प्रियसास ऊती स तू धनं कारिणे न प्र यंसत्	॥ 38 ॥
स वर्धिता वर्धनः पूयमानः सोमो मीढ्वं अभि नो ज्योतिषावीत्	
येना नः पूर्वे पितरः पदज्ञाः स्वर्विदो अभि गा अद्रिमुष्णन्	॥ 39 ॥
अक्रान्त्समुद्रः प्रथमे विधर्मञ्जनयन्त्रजा भुवनस्य राजा	
वृषा पवित्रे अधि सानो अव्ये बृहत्सोमो वावृधे सुवान इन्दुः	॥ 40 ॥
महत्तत्सोमो महिषश्चकारापां यद्गर्भोऽवृणीत देवान्	
अदधादिन्द्रे पर्वमान् ओजोऽजनयत्सूर्ये ज्योतिरिन्दुः	॥ 41 ॥
मत्सि वायुमिष्टये राधसे च मत्सि मित्रावरुणा पूयमानः	
मत्सि शर्धो मारुतं मत्सि देवान्मत्सि द्यावापृथिवी देव सोम	॥ 42 ॥
ऋजुः पवस्व वृजिनस्य हन्तापामीवां बार्धमानो मृधश्च	
अभिश्चीणन्पयः पर्यसाभि गोनामिन्द्रस्य त्वं तव वयं सखायः	॥ 43 ॥
मध्वः सूदं पवस्व वस्व उत्सं वीरं च न आ पवस्वा भगं च	
स्वदुस्वेन्द्राय पर्वमान इन्दो रयिं च न आ पवस्वा समुद्रात्	॥ 44 ॥
सोमः सुतो धारयात्यो न हित्वा सिन्धुर्न निम्नमभि वाज्यक्षाः	
आ योनिं वन्यमसदत्पुनानः समिन्दुर्गोभिरसरत्समुद्भिः	॥ 45 ॥

एष स्य ते पवत इन्द्र सोमश्चमूषु धीरं उशते तवस्वान्	
स्वर्चक्षा रथिरः सत्यशुष्मः कामो न यो देवयतामसर्जि	॥ 46 ॥
एष प्रत्नेन वयसा पुनानस्तिरो वर्षीसि दुहितुर्दधानः	
वसानः शर्म त्रिवरूथमप्सु होतैव याति समनेषु रेभन्	॥ 47 ॥
नू नुस्त्वं रथिरो देव सोम परि स्रव चम्बोः पूयमानः	
अप्सु स्वादिष्टो मधुमां ऋतावा देवो न यः सविता सत्यमन्मा	॥ 48 ॥
अभि वायुं वीत्यर्षा गृणानोर्षिभि मित्रावरुणा पूयमानः	
अभी नरं धीजवनं रथेष्ठामभीन्द्रं वृषणं वज्रबाहुम्	॥ 49 ॥
अभि वस्त्रा सुवसनान्यर्षाभि धेनूः सुदुघाः पूयमानः	
अभि चन्द्रा भर्तवे नो हिरण्याभ्यश्वात्रथिनो देव सोम	॥ 50 ॥
अभी नो अर्ष दिव्या वसून्यभि विश्वा पार्थिवा पूयमानः	
अभि येन द्रविणमश्रवामाभ्यार्षेयं जमदग्निवन्नः	॥ 51 ॥
अया पवा पवस्वैना वसूनि मांश्चत्व इन्दो सरसि प्र धन्व	
ब्रध्नश्चिदत्र वातो न जूतः पुरुमेधश्चित्तकवे नरं दात्	॥ 52 ॥
उत न एना पव्या पवस्वार्धि श्रुते श्रवाय्यस्य तीर्थे	
षष्टि सहस्रा नैगुतो वसूनि वृक्षं न पक्वं धूनवद्रणाय	॥ 53 ॥
महीमे अस्य वृषनाम शूषे मांश्चत्वे वा पृशने वा वधत्रे	
अस्वापयन्निगुतः स्नेहयन्नापामित्रा अपाचितो अचेतः	॥ 54 ॥
सं त्री पवित्रा विततान्येष्यन्वेकं धावसि पूयमानः	
असि भगो असि दात्रस्य दातासि मघवा मघवद्भ्य इन्दो	॥ 55 ॥
एष विश्ववित्पवते मनीषी सोमो विश्वस्य भुवनस्य राजा	
द्रप्सा ईरयन्विदथेष्विन्दुर्वि वारमव्यं समयाति याति	॥ 56 ॥
इन्दुं रिहन्ति महिषा अदब्धाः पदे रेभन्ति क्वयो न गृध्राः	
हिन्वन्ति धीरा दशभिः क्षिपाभिः समञ्जते रूपम्पां रसेन	॥ 57 ॥
त्वया वयं पवमानेन सोम भरे कृतं वि चिनुयाम शश्वत्	
तन्नो मित्रो वरुणो मामहन्तामदितिः सिन्धुः पृथिवी उत द्यौः	॥ 58 ॥

(12)

98

(म.9, अनु.6)

ऋषिः अम्बरीषः वार्षागिरः भारद्वाजः ऋजिश्वा च

छन्दः अनुष्टुप् 1-10,12, बृहती 11

देवता पवमानः सोमः

अभि नो वाजसातमं रयिमर्ष पुरुस्पृहम् । इन्दो सहस्रभर्णसं तुविद्युमं विश्वासहम् ॥ 1 ॥

परि ष्य सुवानो अव्ययं रथे न वर्माव्यत । इन्दुरभि द्रुणा हितो हियानो धाराभिरक्षाः ॥ 2 ॥

परि ष्य सुवानो अक्षा इन्दुरव्ये मदच्युतः । धारा य ऊर्ध्वो अध्वरे भ्राजा नैति गव्ययुः ॥ 3 ॥
 स हि त्वं देव शश्वते वसु मर्तीय दाशुषे । इन्दो सहस्रिणं रयिं शतात्मानं विवाससि ॥ 4 ॥
 वयं ते अस्य वृत्रहन्वसो वस्वः पुरुस्पृहः । नि नेदिष्ठतमा इषः स्याम सुम्रस्याधिगो ॥ 5 ॥
 द्विर्यं पञ्च स्वयंशसं स्वसारो अद्रिसंहतम् । प्रियमिन्द्रस्य काम्यं प्रस्नापर्यन्त्यूर्मिणम् ॥ 6 ॥
 परि त्वं हर्यतं हरिं बभ्रुं पुनन्ति वारेण । यो देवान्विश्वो इत्परि मदेन सह गच्छति ॥ 7 ॥
 अस्य वो ह्यवसा पान्तो दक्षसार्धनम् । यः सूरिषु श्रवो बृहद्वधे स्वर्णं हर्यतः ॥ 8 ॥
 स वां यज्ञेषु मानवी इन्दुर्जनिष्ट रोदसी । देवो देवी गिरिष्ठा अस्त्रेधन्तं तुविष्वणि ॥ 9 ॥
 इन्द्राय सोमं पातवे वृत्रघ्ने परि षिच्यसे । नरे च दक्षिणावते देवाय सदनासदे ॥ 10 ॥
 ते प्रत्नासो व्युष्टिषु सोमाः पवित्रे अक्षरन् । अपुप्रोर्थन्तः सनुतर्हुरश्चितः प्रातस्तां अप्रचेतसः ॥ 11 ॥
 तं सखायः पुरोरुचं यूयं वयं च सूरयः । अश्याम् वाजगन्ध्यं सुनेम् वाजपस्त्यम् ॥ 12 ॥

(8)

99

(म.9, अनु.6)

ऋषिः रेभसूनु काश्यपौ

छन्दः बृहती 1, अनुष्टुप् 2-8

देवता पवमानः सोमः

आ हर्यताय धृष्णावे धनुस्तन्वन्ति पौंस्यम् । शुक्रां वयन्त्यसुराय निर्णिजं विपामग्रै महीयुर्वः ॥ 1 ॥
 अध क्षपा परिष्कृतो वाजां अभि प्र गाहते । यदीं विवस्वतो धियो हरिं हिन्वन्ति यातवे ॥ 2 ॥
 तमस्य मर्जयामसि मदो य इन्द्रपातमः । यं गाव आसभिर्दधुः पुरा नूनं च सूरयः ॥ 3 ॥
 तं गार्थया पुराण्या पुनानमभ्यनूषत । उतो कृपन्त धीतयो देवानां नाम् बिभ्रतीः ॥ 4 ॥
 तमुक्षमाणमव्यये वारे पुनन्ति धर्णसिम् । दूतं न पूर्वचित्तय आ शासते मनीषिणः ॥ 5 ॥
 स पुनानो मदिन्तमः सोमश्चमूषु सीदति । पशौ न रेत आदधत्पतिर्वचस्यते धियः ॥ 6 ॥
 स मृज्यते सुकर्माभिर्देवो देवेभ्यः सुतः । विदे यदासु संददिर्महीरपो वि गाहते ॥ 7 ॥
 सुत इन्दो पवित्र आ नृभिर्यतो वि नीयसे । इन्द्राय मत्सरिन्तमश्चमूष्वा षीदसि ॥ 8 ॥

(9)

100

(म.9, अनु.6)

ऋषिः रेभसूनु काश्यपौ

छन्दः अनुष्टुप्

देवता पवमानः सोमः

अभी नवन्ते अद्बुहः प्रियमिन्द्रस्य काम्यम् । वत्सं न पूर्वं आयुनि जातं रिहन्ति मातरः ॥ 1 ॥
 पुनान इन्दुवा भरु सोमं द्विबर्हसं रयिम् । त्वं वसूनि पुष्यसि विश्वानि दाशुषो गृहे ॥ 2 ॥
 त्वं धियं मनोयुजं सृजा वृष्टिं न तन्यतुः । त्वं वसूनि पार्थिवा दिव्या च सोम पुष्यसि ॥ 3 ॥
 परि ते जिग्युषो यथा धारा सुतस्य धावति । रंहमाणा व्युव्ययं वारं वाजीव सानसिः ॥ 4 ॥
 क्रत्वे दक्षाय नः कवे पवस्व सोम धारया । इन्द्राय पातवे सुतो मित्राय वरुणाय च ॥ 5 ॥
 पवस्व वाजसातमः पवित्रे धारया सुतः । इन्द्राय सोम विष्णावे देवेभ्यो मधुमत्तमः ॥ 6 ॥
 त्वां रिहन्ति मातरो हरिं पवित्रे अद्बुहः । वत्सं जातं न धेनवः पवमान् विधर्मणि ॥ 7 ॥
 पवमान् महि श्रवश्चित्रेभिर्यासि रश्मिभिः । शर्धन् तमांसि जिघ्रसे विश्वानि दाशुषो गृहे ॥ 8 ॥
 त्वं द्यां च महिब्रत पृथिवीं चाति जभिषे । प्रति द्वापिममुञ्चथाः पवमान महित्वना ॥ 9 ॥

। इति सप्तमाष्टके चतुर्थोऽध्यायः समाप्तः ।

(पञ्चमोऽध्यायः ॥ वर्गाः 1-33)

(16)

101

(म.9, अनु.6)

ऋषिः अन्धीगुः श्यावाश्विः 1-3, ययातिः नाहुषः 4-6, नहुषः मानवः 7-9, मनुः सांवरणः 10-12,
वैश्वामित्रः वाच्यः वा प्रजापतिः 13-16 छन्दः अनुष्टुप् 1,4-16, गायत्री 2-3 देवता पवमानः सोमः

पुरोजिती वो अन्धसः सुताय मादयित्वे । अप् श्वानं श्रथिष्टन् सखायो दीर्घजिह्वयम् ॥ 1 ॥
यो धारया पावकया परिप्रस्यन्दते सुतः । इन्दुरश्वो न कृत्यः ॥ 2 ॥
तं दुरोषमभी नरः सोमं विश्वाच्या धिया । यज्ञं हिन्वन्त्यद्रिभिः ॥ 3 ॥
सुतासो मधुमत्तमाः सोमा इन्द्राय मन्दिनः । पवित्रवन्तो अक्षरन्देवानाच्छन्तु वो मदाः ॥ 4 ॥
इन्दुरिन्द्राय पवत् इति देवासो अब्रुवन् । वाचस्पतिर्मखस्यते विश्वस्येशान् ओजसा ॥ 5 ॥
सहस्रधारः पवते समुद्रो वाचमीडुयः । सोमः पती रयीणां सखेन्द्रस्य दिवेदिवे ॥ 6 ॥
अयं पूषा रयिर्भगः सोमः पुनानो अर्षति । पतिर्विश्वस्य भूमनो व्यख्यद्रोदसी उभे ॥ 7 ॥
समु प्रिया अनूषत् गावो मदाय घृष्वयः । सोमासः कृण्वते पथः पवमानासु इन्दवः ॥ 8 ॥
य ओजिष्टस्तमा भरु पवमान श्रवाय्यम् । यः पञ्च चर्षणीरुभि रयिं येन वनामहै ॥ 9 ॥
सोमाः पवन्तु इन्दवोऽस्मभ्यं गातुवित्तमाः । मित्राः सुवाना अरेपसः स्वाध्यः स्वविदः ॥ 10 ॥
सुष्वाणासो व्यद्रिभिश्चिताना गोरधि त्वचि । इषमस्मभ्यमभितः समस्वरन्वसुविदः ॥ 11 ॥
एते पूता विपश्चितः सोमासो दध्याशिरः । सूर्यासो न दर्शतासो जिगत्त्वो ध्रुवा घृते ॥ 12 ॥
प्र सुन्वानस्यान्धसो मर्तो न वृत् तद्वचः । अप् श्वानमराधसं हता मुखं न भृगवः ॥ 13 ॥
आ जामिरत्के अव्यत भुजे न पुत्र ओण्योः । सरञ्जारो न योषणां वरो न योनिमासदम् ॥ 14 ॥
स वीरो दक्षसार्धनो वि यस्तस्तम्भ रोदसी । हरिः पवित्रे अव्यत वेधा न योनिमासदम् ॥ 15 ॥
अव्यो वारैभिः पवते सोमो गव्ये अधि त्वचि । कनिक्रददृष्टा हरिरिन्द्रस्याभ्येति निष्कृतम् ॥ 16 ॥

(8)

102

(म.9, अनु.6)

ऋषिः त्रितः आस्यः छन्दः उष्णिक् देवता पवमानः सोमः

क्राणा शिशुर्महीनां हिन्वन्नृतस्य दीधितिम् । विश्वा परि प्रिया भुवदध द्विता ॥ 1 ॥
उप त्रितस्य पाष्योऽरभक्तु यद्गहा पदम् । यज्ञस्य सप्त धामभिरध प्रियम् ॥ 2 ॥
त्रीणि त्रितस्य धारया पृष्ठेरेया रयिम् । मिमीते अस्य योजना वि सुक्रतुः ॥ 3 ॥
जज्ञानं सप्त मातरां वेधामशासत श्रिये । अयं ध्रुवो रयीणां चिकेत यत् ॥ 4 ॥
अस्य व्रते सजोषसो विश्वे देवासो अद्गहः । स्पार्हा भवन्ति रन्तयो जुषन्त यत् ॥ 5 ॥
यमी गर्भमृतावृधो दृशे चारुमजीजनन् । क्वि मंहिष्ठमध्वरे पुरुस्पृहम् ॥ 6 ॥
समीचीने अभि त्मना यद्ही ऋतस्य मातरां । तन्वाना यज्ञमानुषग्यदञ्जते ॥ 7 ॥
क्रत्वा शुक्रैर्भिरक्षभिर्ऋणोरप ब्रजं दिवः । हिन्वन्नृतस्य दीधितिं प्राध्वरे ॥ 8 ॥

(6)

103

(म.9, अनु.6)

ऋषिःद्वितः आस्यः छन्दः उष्णिक् देवता पवमानः सोमः

प्र पुनानाय वेधसे सोमाय वच् उद्यतम् । भृतिं न भरा मतिभिर्जुजोषते ॥ 1 ॥

परि वाराण्यव्यया गोभिरञ्जानो अर्षति	त्री षुधस्था पुनानः कृणुते हरिः	॥ 2 ॥
परि कोशं मधुश्रुतमव्यये वारं अर्षति	अग्नि वाणीर्ऋषीणां सप्त नूषत	॥ 3 ॥
परि णेता मतीनां विश्वदेवो अदाभ्यः	सोमः पुनानश्चम्वोर्विशुद्धरिः	॥ 4 ॥
परि दैवीरनु स्वधा इन्द्रेण याहि सरथम्	पुनानो वाघद्वाघद्विरमर्त्यः	॥ 5 ॥
परि सप्तिर्न वाज्युर्देवो देवेभ्यः सुतः	व्यानुशिः पर्वमानो वि धावति	॥ 6 ॥

(6)

104

(म.9, अनु.7)

ऋषिः काण्वौ पर्वतनारदौ काश्यप्यौ शिखण्डिन्यौ अप्सरसौ वा	छन्दः उष्णिक्	देवता पवमानः सोमः
---	---------------	-------------------

सखायु आ नि षीदत पुनानायु प्र गायत	शिशुं न युजैः परि भूषत श्रिये	॥ 1 ॥
समी वृत्सं न मातृभिः सृजता गयुसाधनम्	देवाव्यंशं मदमभि द्विशवसम्	॥ 2 ॥
पुनाता दक्षसाधनं यथा शर्धाय वीतये	यथा मित्राय वरुणाय शंतमः	॥ 3 ॥
अस्मभ्यं त्वा वसुविदमभि वाणीरनूषत	गोभिष्टे वर्णमभि वासयामसि	॥ 4 ॥
स नो मदानां पत् इन्द्रो देवप्सरा असि	सखेव सख्ये गातुवित्तमो भव	॥ 5 ॥
स नैमि कृध्यंस्मदा रक्षसं कं चिदत्रिणम्	अपादेवं द्वयुमंहो युयोधि नः	॥ 6 ॥

(6)

105

(म.9, अनु.7)

ऋषिः पर्वतनारदौ काण्वौ	छन्दः उष्णिक्	देवता पवमानः सोमः
------------------------	---------------	-------------------

तं वः सखायो मदाय पुनानमभि गायत	शिशुं न युजैः स्वदयन्त गुर्तिभिः	॥ 1 ॥
सं वृत्सइव मातृभिरिन्दुर्हिन्वानो अज्यते	देवावीर्मदो मतिभिः परिष्कृतः	॥ 2 ॥
अयं दक्षायु साधनोऽयं शर्धाय वीतये	अयं देवेभ्यो मधुमत्तमः सुतः	॥ 3 ॥
गोमन्न इन्द्रो अश्ववत्सुतः सुदक्ष धन्व	शुचिं ते वर्णमधि गोषु दीधरम्	॥ 4 ॥
स नो हरीणां पत् इन्द्रो देवप्सरस्तमः	सखेव सख्ये नयो रूचे भव	॥ 5 ॥
सनेमि त्वमस्मदा अदेवं कं चिदत्रिणम्	साह्वं इन्द्रो परि बाधो अपं द्वयुम्	॥ 6 ॥

(14)

106

(म.9, अनु.7)

ऋषिः अग्निः चाक्षुषः 1-3, 10-14, चक्षुः मानवः 4-6, मनुः आप्सवः 7-9	छन्दः उष्णिक्	देवता पवमानः सोमः
--	---------------	-------------------

इन्द्रमच्छ सुता इमे वृषणं यन्तु हरयः	श्रुष्टी जातासु इन्द्रवः स्वविदः	॥ 1 ॥
अयं भराय सान्सिरिन्द्राय पवते सुतः	सोमो जैत्रस्य चेतति यथा विदे	॥ 2 ॥
अस्येदिन्द्रो मदेष्वा ग्राभं गृभ्णीत सान्सिम्	वज्रं च वृषणं भरत्समप्सुजित्	॥ 3 ॥
प्र धन्वा सोम जागृविरिन्द्रायेन्द्रो परि स्रव	द्युमन्तं शुष्ममा भरा स्वविदम्	॥ 4 ॥
इन्द्राय वृषणं मदं पर्वस्व विश्वदर्शतः	सहस्रयामा पथिकृद्विचक्षणः	॥ 5 ॥
अस्मभ्यं गातुवित्तमो देवेभ्यो मधुमत्तमः	सहस्रं याहि पथिभिः कर्निक्रदत्	॥ 6 ॥
पर्वस्व देववीतयु इन्द्रो धाराभिरोजसा	आ क्लशं मधुमान्तसोम नः सदः	॥ 7 ॥
तव द्रप्सा उदप्रुत् इन्द्रं मदाय वावृधुः	त्वां देवासो अमृतायु कं पपुः	॥ 8 ॥
आ नः सुतासु इन्द्रवः पुनाना धावता रयिम्	वृष्टिद्यावो रीत्यापः स्वविदः	॥ 9 ॥
सोमः पुनान ऊर्मिणाव्यो वारं वि धावति	अग्रै वाचः पर्वमानः कर्निक्रदत्	॥ 10 ॥

धीभिर्हिन्वन्ति वाजिनं वने क्रीळन्तमत्यविम् । अ॒भि त्रि॑पृ॒ष्ठं म॒तयुः॑ सम॒स्वरन् ॥ 11 ॥	
अस॑र्जि क॒लशाँ॑ अ॒भि मी॒ळ्हे स॑प्तिर्न वा॒जयुः॑ । पु॒नानो॑ वाचं॒ ज॒नय॑न्नसिष्यदत् ॥ 12 ॥	
पव॑ते ह॒र्यतो॑ हरि॒रति॑ ह्व॒रसि॑ रं॒ह्या । अ॒भ्यर्ष॑न्तस्तो॒तृभ्यो॑ वी॒रवृ॑द्यशः ॥ 13 ॥	
अ॒या प॑वस्व दे॒व्युर्म॑धो॒र्धारा॑ असृक्षत । रेभ॑न्प॒वित्रं॑ प॒र्येषि॑ विश्वतः ॥ 14 ॥	

(26)

107

(म.9, अनु.7)

ऋषिः सप्तर्षयः	छन्दः बृहती 1,4,6,8-10,12,14,17,19,21,23,25,
सतोबृहती 2,5,7,11,13,15,18,20,22,24,26, द्विपदा विराट् 3,16	देवता पवमानः सोमः

प॒रीतो॑ षिञ्चता सु॒तं सो॒मो य उ॑त्त॒मं ह॒विः । द॒धुन्वाँ॑ यो न॒र्यो॑ अ॒प्स्वः॑न्तरा सु॒षाव॑ सोम॒मद्रि॑भिः ॥ 1 ॥	
नूनं पु॒नानो॑ऽवि॒भिः परि॑ स्र॒वाद॑ब्धः सु॒रभित॑रः	
सु॒ते चि॑त्वा॒प्सु म॑दामो अन्ध॒सा श्री॑णन्तो गो॒भि॒रुत्त॑रम् ॥ 2 ॥	
परि॑ सु॒वान॑श्चक्ष॒से दे॒वमा॑द॒नः क्र॑तुरि॒न्दुर्वि॑चक्षणः ॥ 3 ॥	
पु॒नानः॑ सो॒म॒ धार॑यापो व॒सानो॑ अ॒र्षसि॑ । आ रं॒त्वा यो॑नि॒मृत॑स्य॒ सीद॑स्युत्सो॑ दे॒व हि॒र॒ण्ययः॑ ॥ 4 ॥	
दु॒हान ऊ॑र्ध॒द्विव्यं॑ मधु॒ प्रियं॑ प्र॒त्नं स॒धस्थ॑मासदत् । आ॒पृच्छ॑यं ध॒रुणं॑ वा॒ज्यर्ष॑ति नृ॒भिर्धू॑तो वि॒चक्ष॑णः ॥ 5 ॥	
पु॒नानः॑ सो॒म॒ जागृ॑विर॒व्यो वारे॑ परि॒ प्रियः॑ । त्वं वि॒प्रो॑ अ॒भवो॑ऽङ्गि॒रस्त॑मो म॒ध्वा य॒ज्ञं मि॑मिक्ष नः ॥ 6 ॥	
सोमो॑ मी॒द्वान्प॑वते गा॒तुवि॑त्त॒म॒ ऋषि॑र्वि॒प्रो॑ वि॒चक्ष॑णः	
त्वं क॒विर॑भवो दे॒ववी॑त॒म॒ आ सू॑र्यं रो॒हयो॑ दि॒वि ॥ 7 ॥	
सोम॑ उ षु॒वाणः॑ सो॒तृभि॑रधि षु॒भि॒रवी॑नाम् । अ॒श्वये॑व ह॒रिता॑ याति॒ धार॑या म॒न्द्रया॑ याति॒ धार॑या ॥ 8 ॥	
अ॒नूपे॑ गो॒मानो॑भि॒रक्षाः॑ सोमो॑ दु॒ग्धा॑भि॒रक्षाः॑ । स॒मुद्रं॑ न स॒ंवर॑णान्य॒गम॑न्म॒न्दी म॑दाय तोशते ॥ 9 ॥	
आ सो॑म सु॒वानो॑ अ॒द्रिभि॑स्ति॒रो वारा॑ण्य॒व्यया॑ । ज॒नो न पु॑रि च॒म्बोर्वि॑श॒द्धरिः॑ स॒दो वने॑षु दधिषे ॥ 10 ॥	
स मा॑मृजे ति॒रो अ॑ण्वानि मे॒ष्यो मी॒ळ्हे स॑प्तिर्न वा॒जयुः॑	
अ॒नुमा॑द्यः प॒वमा॑नो म॒नीषि॑भिः सोमो॑ वि॒प्रैभि॑र्ऋ॒क्त्र॑भिः ॥ 11 ॥	
प्र सो॑म दे॒ववी॑तये सि॒न्धुर्न पि॑प्ये अ॒र्णसा॑	
अं॒शोः प॑यसा म॒दिरो॑ न जागृ॒विर॑च्छा कोशं मधु॒श्रुत॑म् ॥ 12 ॥	
आ ह॑र्यतो अ॒र्जुने॑ अ॒त्के॑ अ॒व्यत॑ प्रियः सू॒नुर्न म॑र्ज्यः	
तमी॑ हि॒न्वन्त्य॑प॒सो यथा॑ रथं न॒दीष्वा॑ ग॒र्भस्त्योः॑ ॥ 13 ॥	
अ॒भि सो॑मा॒स आ॒यवः॑ प॒वन्ते॑ म॒द्यं म॑दम् । स॒मुद्र॑स्याधि॒ विष्ट॑पि॒ मनी॑षिणो॑ मत्स॒रासः॑ स्व॒र्विदः॑ ॥ 14 ॥	
तर॑त्स॒मुद्रं॑ प॒वमा॑न ऊ॒र्मिणा॑ राजा॒ देव॑ ऋ॒तं बृ॑हत्	
अ॒र्षन्मि॑त्रस्य॒ वरु॑णस्य॒ धर्म॑णा॒ प्र हि॑न्वान॒ ऋ॒तं बृ॑हत् ॥ 15 ॥	
नृ॒भिर्ये॑मानो ह॒र्यतो॑ वि॒चक्ष॑णो राजा॒ देवः॑ स॒मुद्रि॑यः ॥ 16 ॥	
इ॒न्द्राय॑ पवते म॒दः सो॑मो॒ मरु॑त्वंते सु॒तः । स॒हस्र॑धारो अ॒त्यव्य॑मर्षति॒ तमी॑ मृ॒जन्त्या॑यवः ॥ 17 ॥	
पु॒नान॑श्च॒मू ज॒नय॑न्मतिं क॒विः सो॑मो॒ देवेषु॑ रण्यति	
अ॒पो व॑सानुः परि॒ गोभि॑रुत्त॒रः सी॒दन्वने॑ष्वव्यत ॥ 18 ॥	
तवा॑हं सो॑म रा॒रण स॒ख्य इ॒न्दो दि॒वेदि॑वे	
पु॒रूणि॑ बभ्रु॒ नि च॑रन्ति॒ मामव॑ परि॒धीर॑ति ताँ इ॒हि ॥ 19 ॥	
उ॒ताहं॑ न॒क्त॑मु॒त सो॑म ते दि॒वा स॒ख्याय॑ बभ्रु ऊ॒र्धनि॑	

घृणा तपन्तमति सूर्यं परः शकुनाइव पप्तिम	॥ 20 ॥
मृज्यमानः सुहस्त्य समुद्रे वार्चमिन्वसि । रुयिं पिशङ्गं बहुलं पुरुस्पृहं पवमानाभ्यर्षसि	॥ 21 ॥
मृजानो वारे पवमानो अव्यये वृषाव चक्रदो वने	
देवानां सोम पवमान निष्कृतं गोभिरञ्जानो अर्षसि	॥ 22 ॥
पवस्व वाजसातयेऽभि विश्वानि काव्या	
त्वं संमुद्रं प्रथमो वि धारयो देवेभ्यः सोम मत्सुरः	॥ 23 ॥
स तू पवस्व परि पार्थिवं रजो दिव्या च सोम धर्माभिः	
त्वां विप्रासो मतिभिर्विचक्षण शुभ्रं हिन्वन्ति धीतिभिः	॥ 24 ॥
पवमाना असृक्षत पवित्रमति धारया	
मरुत्वन्तो मत्सुरा इन्द्रिया हया मेधामभि प्रयांसि च	॥ 25 ॥
अपो वसानः परि कोशमर्षतीन्दुर्हियानः सोतृभिः	
जनयञ्ज्योतिर्मन्दना अवीवशद्वाः कृण्वानो न निर्णिजम्	॥ 26 ॥

(16)

108

(म.9, अनु.7)

ऋषिः गौरिवीतिः शाक्त्यः 1-2, शक्तिः वासिष्ठः 3,14-16, ऊरुः आङ्गिरसः 4-5, ऋजिश्वा भारद्वाजः 6-7, ऊर्ध्वसद्वा आङ्गिरसः 8-9, कृतयशाः आङ्गिरसः 10-11, ऋणचयः राजर्षिः 12-13 छन्दः ककुप् 1,3,5,7,9,11,15, सतोबृहती 2,4,6,8,10,12,14,16, यवमध्या गायत्री 13 देवता पवमानः सोमः

पवस्व मधुमत्तम् इन्द्राय सोम क्रतुवित्तमो मदः । महिं द्युक्षतमो मदः	॥ 1 ॥
यस्य ते पीत्वा वृषभो वृषायतेऽस्य पीता स्वर्विदः	
स सुप्रकेतो अभ्यक्रमीदिषोऽच्छा वाजं नैतशः	॥ 2 ॥
त्वं ह्यङ्ग देव्या पवमान् जनिमानि द्युमत्तमः । अमृतत्वार्यं घोषयः	॥ 3 ॥
येना नवग्वो दध्यङ्ङपोर्णुते येन् विप्रास आपिरे	
देवानां सुम्ने अमृतस्य चारुणो येन् श्रवांस्यानशुः	॥ 4 ॥
एष स्य धारया सुतोऽव्यो वारैभिः पवते मदिन्तमः । क्रीळ्त्रूर्मिरुपामिव	॥ 5 ॥
य उस्त्रिया अप्या अन्तरश्मनो निर्गा अकृन्तदोजसा	
अभि व्रजं तलिषे गव्यमश्व्यं वर्माव धृष्णावा रुज	॥ 6 ॥
आ सोता परि षिञ्चताश्वं न स्तोममपुंरं रजस्तुरम् । वनक्रक्षमुदप्रुतम्	॥ 7 ॥
सहस्रधारं वृषभं पयोवृधं प्रियं देवाय जन्मने	
ऋतेन य ऋतजातो विवावृधे राजा देव ऋतं बृहत्	॥ 8 ॥
अभि द्युमं बृहद्यश इषस्पते दिदीहि देव देव्युः । वि कोशं मध्यमं युव	॥ 9 ॥
आ वच्यस्व सुदक्ष चम्बोः सुतो विशां वह्निर्न विशपतिः	
वृष्टिं दिवः पवस्व रीतिम्पां जिन्वा गविष्टये धियः	॥ 10 ॥
एतमु त्यं मद्दच्युतं सहस्रधारं वृषभं दिवो दुहुः विश्वा वसूनि बिभ्रतम्	॥ 11 ॥
वृषा वि जज्ञे जनयन्नमर्त्यः प्रतपञ्ज्योतिषा तमः	

स सुष्टुतः कृविभिर्निर्णिजं दधे त्रिधात्वस्य दंससा	॥ 12 ॥
स सुन्वे यो वसूनां यो रायामानेता य इळानाम् । सोमो यः सुक्षितीनाम्	॥ 13 ॥
यस्य न इन्द्रः पिबाद्यस्य मरुतो यस्य वार्यमणा भगः	॥ 14 ॥
आ येन मित्रावरुणा करामह एन्द्रमवसे महे	॥ 14 ॥
इन्द्राय सोम पातवे नृभिर्यतः स्वायुधो मुदिन्तमः । पवस्व मधुमत्तमः	॥ 15 ॥
इन्द्रस्य हार्दि सोमधानमा विश समुद्रमिव सिन्धवः	॥ 16 ॥
जुष्टो मित्राय वरुणाय वायवे दिवो विष्टम्भ उत्तमः	॥ 16 ॥

(22)

109

(म.9, अनु.7)

ऋषिः अग्रयः धिष्याः ऐश्वराः	छन्दः द्विपदा विराट्	देवता पवमानः सोमः
-----------------------------	----------------------	-------------------

परि प्र धन्वेन्द्राय सोम स्वादुर्मित्राय पूष्णे भगाय	॥ 1 ॥
इन्द्रस्ते सोम सुतस्य पेयाः क्रत्वे दक्षाय विश्वे च देवाः	॥ 2 ॥
एवामृताय महे क्षयाय स शुक्रो अर्ष दिव्यः पीयूषः	॥ 3 ॥
पवस्व सोम महान्तसमुद्रः पिता देवानां विश्वाभि धाम	॥ 4 ॥
शुक्रः पवस्व देवेभ्यः सोम दिवे पृथिव्यै शं च प्रजायै	॥ 5 ॥
दिवो धर्तासि शुक्रः पीयूषः सत्ये विधर्मन्वाजी पवस्व	॥ 6 ॥
पवस्व सोम द्युम्नी सुधारो महामवीनामनु पूर्यः	॥ 7 ॥
नृभिर्येमानो जज्ञानः पूतः क्षरद्विश्वानि मन्द्रः स्ववित्	॥ 8 ॥
इन्दुः पुनानः प्रजामुराणः करद्विश्वानि द्रविणानि नः	॥ 9 ॥
पवस्व सोम क्रत्वे दक्षायाश्चो न निक्तो वाजी धनाय	॥ 10 ॥
तं तं सोतारो रसं मदाय पुनन्ति सोमं महे द्युम्नाय	॥ 11 ॥
शिशुं जज्ञानं हरिं मृजन्ति पवित्रे सोमं देवेभ्य इन्दुम्	॥ 12 ॥
इन्दुः पविष्ट चारुर्मदायापामुपस्थे कृविर्भगाय	॥ 13 ॥
बिभर्ति चार्विन्द्रस्य नाम येन विश्वानि वृत्रा जघान	॥ 14 ॥
पिबन्त्यस्य विश्वे देवासो गोभिः श्रीतस्य नृभिः सुतस्य	॥ 15 ॥
प्र सुवानो अक्षाः सहस्रधारस्तिरः पवित्रं वि वारमव्यम्	॥ 16 ॥
स वाज्यक्षाः सहस्ररेता अद्भिर्मृजानो गोभिः श्रीणानः	॥ 17 ॥
प्र सोम याहीन्द्रस्य कुक्षा नृभिर्येमानो अद्रिभिः सुतः	॥ 18 ॥
असर्जि वाजी तिरः पवित्रमिन्द्राय सोमः सहस्रधारः	॥ 19 ॥
अञ्जन्त्येनं मध्वो रसेनेन्द्राय वृष्ण इन्दु मदाय	॥ 20 ॥
देवेभ्यस्त्वा वृथा पाजसेऽपो वसानं हरिं मृजन्ति	॥ 21 ॥
इन्दुरिन्द्राय तोशते नि तोशते श्रीणन्नुग्रो रिणन्नपः	॥ 22 ॥

(12)

110

(म.9, अनु.7)

ऋषिः त्र्यरुणत्रसदस्यू छन्दः पिपीलिकमध्या अनुष्टुप् 1-3, ऊर्ध्वबृहती 4-9, विराट् 10-12 देवता पवमानः सोमः

पर्यु षु प्र धन्व वाजसातये परि वृत्राणि सुक्षणिः । द्विषस्त्रध्या ऋणया न ईयसे ॥ 1 ॥
 अनु हि त्वा सुतं सोम मदांसि महे संमर्यराज्ये । वाजाँ अ॒भि प॑वमान् प्र गा॒हसे ॥ 2 ॥
 अजी॑जनो हि प॑वमान् सूर्यं वि॒धारे श॑कम॒ना प॑यः । गो॒जीर॑या र॒हमाणः॑ पु॒रंध्या ॥ 3 ॥
 अजी॑जनो अमृत॒ मर्त्येष्वँ ऋ॑तस्य॒ धर्म॑न्नमृतस्य॒ चारु॑णः । सदा॑सरो वाज॒मच्छा॑ सनि॒ष्यदत् ॥ 4 ॥
 अ॒भ्यभि॑ हि श्रव॑सा त॒तर्दि॑थोत्सं न कं चि॒ज्ज॒नपा॑न॒मक्षि॑तम् । शर्या॑भिर्न भर॒माणो ग॑भस्त्योः ॥ 5 ॥
 आर्दी॑ के चि॒त्पश्य॑मानासु आ॒प्यं वसु॑रुचो॑ दि॒व्या अ॒भ्यनू॑षत । वारं॑ न देवः स॒विता व्यू॑र्णुते ॥ 6 ॥
 त्वे सोम॑ प्रथ॒मा वृ॑क्तब॒र्हिषो म॒हे वाजा॑य॒ श्रव॑से धि॒र्यं दधुः॑ । स त्वं नो॑ वी॒र वी॑र्या॒य चो॑दय ॥ 7 ॥
 दि॒वः पी॒यूषं॑ पू॒र्यं यदु॑क्थ्यं म॒हो गा॒हाद्वि॒व आ नि॑र॒धुक्ष॑त । इन्द्र॑म॒भि जा॑यमानं॒ सम॑स्वरन् ॥ 8 ॥
 अध॑ यदि॒मे प॑वमान् रोद॑सी इ॒मा च॑ विश्वा भु॒वना॑भि म॒ज्मना॑यू॒थे न निः॑ष्ठा वृ॒षभो॑ वि ति॒ष्ठसे ॥ 9 ॥
 सोमः॑ पु॒नानो॑ अ॒व्यये॑ वारे शि॒शुर्न क्री॑ळन्प॒वमानो॑ अक्षाः । स॒हस्र॑धारः श॒तवा॑ज् इन्द्रुः ॥ 10 ॥
 एष॑ पु॒नानो॑ मधु॒माँ ऋ॒तावेन्द्रा॑येन्द्रुः पव॑ते स्वा॒दुरू॑र्मिः । वा॒जस॑निर्व॒रिवो॑वि॒द्वयो॑धाः ॥ 11 ॥
 स प॑वस्व॒ सह॑मानः पृ॒तन्य॑न्त्सेध॒त्रक्षा॑स्यप॒ दुर्ग॑हाणि । स्वा॒युधः॑ सा॒सहान्त्सो॑म॒ शत्रू॑न् ॥ 12 ॥

(3)

111

(म.9, अनु.7)

ऋषिः अनानतः पारुच्छेपिः छन्दः अत्यष्टिः देवता पवमानः सोमः

अ॒या रु॒चा हरि॑ण्या पु॒नानो॑ विश्वा द्वेषा॑ंसि तरति स्व॒युर्व॑भिः सूर॑ो न स्व॒युर्व॑भिः ।
 धारा॑ सु॒तस्य॑ रोचते पु॒नानो॑ अ॒रुषो॑ हरिः ।
 विश्वा॑ यद्रूपा परि॒यात्यृ॑क॒भिः स॒प्तास्ये॑भिर्ऋ॒क॒भिः ॥ 1 ॥
 त्वं त्य॑र्पणी॒नां वि॒दो वसु॑ सं मा॒तृभि॑र्म॒र्जय॑सि स्व आ द॒म ऋ॑तस्य॒ धीति॑भिर्द॒मे
 प॒राव॑तो न साम् तद्यत्रा र॒णन्ति॑ धी॒तयः॑ ।
 त्रि॒धातु॑भि॒ररु॑षीभिर्वयो॑ दधे रोच॑मानो वयो॑ दधे ॥ 2 ॥
 पूर्वा॑मनु॒ प्रदि॑शं याति चे॒कित॑त्सं र॒श्मिभि॑र्य॒तते द॑र्शतो रथो॑ दै॒व्यो द॑र्शतो रथः ।
 अ॒गम॑न्नुक्थानि॒ पौ॑स्येन्द्रं॒ जैत्रा॑य ह॒र्षय॑न् । वज्र॑श्च॒ यद्व॑वथो॒ अन॑पच्युता॒ सम॑त्स्वन॒पच्यु॑ता ॥ 3 ॥

(4)

112

(म.9, अनु.7)

ऋषिः शिशुः आङ्गिरसः छन्दः पङ्क्तिः देवता पवमानः सोमः

ना॒नानं॑ वा उ॒ नो धि॒यो वि वृ॑तानि॒ जना॑नाम् ।
 तक्षा॑ रिष्टं॒ रूतं॑ भि॒षग्ब्र॑ह्मा सु॒न्वन्त॑मिच्छ॒तीन्द्रा॑येन्द्रो परि॒ स्रव॑ ॥ 1 ॥
 ज॒रती॑भि॒रोष॑धीभिः पु॒र्णेभिः॑ शकु॒नाना॑म् ।
 कार्मारो॑ अ॒श्मभि॑र्द्युभिर्हि॒रण्य॑वन्तमिच्छ॒तीन्द्रा॑येन्द्रो परि॒ स्रव॑ ॥ 2 ॥
 कारु॑रुहं ततो भि॒षगु॑पलप्र॒क्षिणी॑ न॒ना
 नाना॑धियो वसू॒यवोऽनु॑ गाइव तस्थि॒मेन्द्रा॑येन्द्रो परि॒ स्रव॑ ॥ 3 ॥
 अश्वो॑ वोळ्हा सु॒खं रथं॑ ह॒सना॑मु॒पम॑न्नि॒र्णः ।

शेषो रोमण्वन्तौ भेदौ वारिन्मण्डूकं इच्छतीन्द्रायेन्दो परि स्रव ॥ 4 ॥

(11)

113

(म.9, अनु.7)

ऋषिः कश्यपः मारीचः

छन्दः पङ्क्तिः

देवता पवमानः सोमः

शर्युणार्वाति सोममिन्द्रः पिबतु वृत्रहा	
बलं दधान आत्मनि करिष्यन्वीर्यं महदिन्द्रायेन्दो परि स्रव	॥ 1 ॥
आ पवस्व दिशां पत आर्जीकात्सोम म द्वः	
ऋतवाकेन सत्येन श्रद्धया तपसा सुत इन्द्रायेन्दो परि स्रव	॥ 2 ॥
पर्जन्यवृद्धं महिषं तं सूर्यस्य दुहिताभरत्	
तं गन्धर्वाः प्रत्यगृभ्णन्तं सोमे रसमादधुरिन्द्रायेन्दो परि स्रव	॥ 3 ॥
ऋतं वदन्नृतद्युम्न सत्यं वदन्त्सत्यकर्मन्	
श्रद्धां वदन्त्सोम राजन्धात्रा सोम परिष्कृत इन्द्रायेन्दो परि स्रव	॥ 4 ॥
सत्यमुग्रस्य बृहतः सं स्रवन्ति संस्रवाः	
सं यन्ति रसिनो रसाः पुनानो ब्रह्मणा हर इन्द्रायेन्दो परि स्रव	॥ 5 ॥
यत्र ब्रह्मा पवमान छन्दस्यांश् वाचं वदन्	
ग्राव्या सोमे महीयते सोमेनानन्दं जनयन्निन्द्रायेन्दो परि स्रव	॥ 6 ॥
यत्र ज्योतिरजस्रं यस्मिँल्लोके स्वीहितम्	
तस्मिन्मां धेहि पवमानामृतं लोके अक्षित इन्द्रायेन्दो परि स्रव	॥ 7 ॥
यत्र राजा वैवस्वतो यत्रावरोधनं दिवः	
यत्रामूर्यहतीरापस्तत्र माममृतं कृधीन्द्रायेन्दो परि स्रव	॥ 8 ॥
यत्रानुकामं चरणं त्रिनाके त्रिदिवे दिवः	
लोका यत्र ज्योतिष्मन्तस्तत्र माममृतं कृधीन्द्रायेन्दो परि स्रव	॥ 9 ॥
यत्र कामा निकामाश्च यत्र ब्रध्नस्य विष्टपम्	
स्वधा च यत्र तृप्तिश्च तत्र माममृतं कृधीन्द्रायेन्दो परि स्रव	॥ 10 ॥
यत्रानन्दाश्च मोदाश्च मुदः प्रमुद आसते	
कामस्य यत्राप्ताः कामास्तत्र माममृतं कृधीन्द्रायेन्दो परि स्रव	॥ 11 ॥

(4)

114

(म.9, अनु.7)

ऋषिः कश्यपः मारीचः

छन्दः पङ्क्तिः

देवता पवमानः सोमः

य इन्दोः पवमानस्यानु धामान्यक्रमीत्	
तमाहुः सुप्रजा इति यस्तं सोमाविधुन्मन् इन्द्रायेन्दो परि स्रव	॥ 1 ॥
ऋषे मन्त्रकृतां स्तोमैः कश्यपोद्धर्धयनिरः	
सोमं नमस्य राजानं यो जज्ञे वीरुधां पतिरिन्द्रायेन्दो परि स्रव	॥ 2 ॥

सप्त दिशो नानासूर्याः सप्त होतार ऋत्विजः ।

देवा आदित्या ये सप्त तेभिः सोमाभि रक्ष न इन्द्रायेन्द्रो परि स्रव ॥ 3 ॥

यत्ते राजञ्छृतं हविस्तेन सोमाभि रक्ष नः ।

अरातीवा मा नस्तारीन्मो च नः किं चनाममिन्द्रायेन्द्रो परि स्रव ॥ 4 ॥

। इति नवमं मण्डलं समाप्तम् ।